


# NKONKO NÈ

## MANDAMUNA PA GENÈSÈ

 Mpindyewu, kòkù muntu kampàndà nè nkonko yidiye muswa kufila, mòna's, yitumaayi ànu kuneeku, nùyipèeshà mwànà kampàndà àlwe naayi anyi cyònsò cinùdì baswè aci. Anyi, pàmwàpa, twètù bayjikije. . . Ndi—ndi naayi mwab'ewu mitwè ku yisambòmbò pa dibèji òmwè, nè pashiishe mwab'ewu, pashiishe tudi nè yibidì lwà kuntu kwàka.

<sup>2</sup> Mpindyewu, tudi. . . tudi baswè kujandula's. Citùdì twenzela cyòcì eci mbwà kujandula cìdì mu meeji à bantu, cìdìbo bèèla meeji. Nwamònu anyi? Nènku ke cìdì cyènza èkèleeziyà mwîmpè, wa dikàndà ncyòcì aci. Bikèngela nwikalè nè—nè bikondo, ànu mùdìbi bikèngela bwà nwènù kukèbulula mpoopù, nudi bamanyè's, nè bintu byònsò, kupàtula byònsò—bintu byònsò mu njila bwà nwamòna mwà kutentemukà nè cisùmì. Pa nàнку mpindyewu ke bwà cinyi tudi nè dilòòlò dyà nkonko ku musangu nè ku musangu, mbwà kujandula.

<sup>3</sup> Mpindyewu, kòkò kwikàle nkonko yidi. . . Mpindyewu, cikondo eci ndi mwenzè ànu bu mucikàngùle, cyalàbàle. Ke mèmè kwamba. . . Mpindyewu, kale wàwa mvwa mufwànyine kwamba nè: “Mpindyewu, bu muntu kanà yònsò ewu. . . cintu kanà cyònsò cìdì ci—citàngilà Mifùndu; dyandamuna. Nùcikonkàayi.” (Twasàkidila, mwanèètù.) Ke mèmè kwamba nè: “Ànu cintu kanà cyònsò cìdì citàngilà Mufùndu; dyandamuna.” Nwamònu's, nènu tudi bafwànyine kucyàndamuna. Kàdi dilòòlò edi mèmè kwamba. . .

<sup>4</sup> Nudi bamanyè's, pashiishe bàdi bàlwa, bàmba nè: “Mwanèètù Bill,” kungeela lukonko nè: “udi wela meeji nè bu—bu—bu *Kampàndà* mwenzè cintu *kampàndà*, aci mbwena Kilistò anyi?”

<sup>5</sup> Èè, aci's cìdì ànu bu kwamba muntu kampàndà. Kàdi mèmè kwamba nè: “Bàlekèlè bàpetè aci nàнку dilòòlò edi.” Nwamònu's, bìdì ànu bìmpè. Pa nàнку tudi ànu mwà kujandula ní kùdikù dibanda kampàndà munkaci mwà kwenjiibwa.

<sup>6</sup> Kaa, ndi—ndi—ndi ndyùmvwà bìmpè menemene dilòòlò edi. Mvwa nkòsa mashinda mu mapingaja mònsò, ke mèmè kudyùmvwà bìmpè menemene, pambèlu mu munyà mukolè.

<sup>7</sup> Tudi nè di—disangisha dilwalwà àbidì àdì panshì aa mpindyewu, kanùpu mwoyi to. Ditùkù dyà makùmi àbidì nè diisàtù dyà ngondo wa cimungu wa mashika, mu Cipalu cyà ndundu cyà mu Chicago, too nè mu ditùkù diitànù dyà ngondo wa kaabitende. Tudi bindile cikondo cinène mu Mukalenge

kuntwaku. Nè mbacifidile dimanyisha myaba yònsò mpindyewu, nè bibèjibeji byònsò bishiilèshiiilàngàne mbicimanyishe. Nè tudi tutèkemena cikondo cyà dicyònkomoka.

<sup>8</sup> Mpindyewu, ndi nè lùmchè, yibidi, yisàtù, yinaayi, yitaanu, yisambòmbò, ngèèla meeji, pa dibèji dimwèpelè apa. Nè yònsò yidi bu yitàngila cintu cimwècimwè, mwàmwa mu—mu Mukàndà wà Genèsè.

<sup>9</sup> Mpindyewu, dyàmbedi Genèsè 1.26, anyi 1.26 too nè ku 28, ke kùvwà mu—muntu uvwa . . . uvwa mukonkè civwà mwà kwikalakù. Civwà—civwà lukonko elu . . . Ndi muswè kwamba nè, mwelè lukonko, mfwilaayikù luse. Nènkù tudi baswè kwanji kubala alu dyàmbedi. Nènkù mpindyewu, mbacifunde kaaba aka. Wèwè muswè kucilonda buludì, bìdi ànu bîmpè. Yèyè nè: “Nzambì wàkafùka muntu mulùme, Wàkabàfùka mulùme nè mukàji.” Nwamònu anyi? Nè pashiiishe mu lùdì lùlondà yèyè ùdì nè Genèsè, anyi, ní mulùme ní mukàji, ewu udiyè awu, ùdì nè Genèsè 2.7: “Yèyè wàkenza muntu ku lupwishi lwà buloba.” Ke mwaba mukwàbò ngwòwò awu. Nènyibalè yònsò, bwà twàmòna mwà kuyisangisha kaaba aka bwà nwáfika ku dimòna. Mpindyewu lwà kumpàlà, citùpà cyà kumpàlà cyà elu cidi, mpindyewu ncyambè nè:

**1. “Nzambì wàkafùka muntu, mulùme nè mukàji. Wàkafùka muntu, mulùme nè mukàji.”** Mpindyewu aci cidi, ngèèla meeji, kanungu kàà kumpàlà. **Mpindyewu mu Genèsè 2.7, ùdì wàmba nè: “Yèyè wàkafùmba,”** (cyela kashoonyi mwínshì) **“kàdi dyàmbedi Yèyè wàkafùka.”** Yèyè ùdì díbà adi nè . . . ùdì nè alu lwela kashoonyi mwinshì. **“Nè Wàkafùmba”** (cyela kashoonyi mwínshì) **“muntu mupàtula mu lupwishi, nè kwela mupùùya mu mimpèmpè yèndè,” nè bikwàbò. Mpindyewu, ndishiilangana kaayi, anyi dipetangana didi penyì mu Mifùndù yidi kuulu eku eyi?**

<sup>10</sup> Mpindyewu, eci cidi . . . Mpindyewu, panwìkalà naaci cifùnda, mu Genèsè 1.26 too nè ku 28, nè mu Genèsè 2.7. Mpindyewu, ncintu cyà mmwènenenu mishiilàngàne bikolè, nè ndi—ndi mwà kwikala ncìyì . . . Ndi ànu nè cingènyingenyi cyànyì sungasunga cyà bwalu abu, pa nànkù nènnpèèshèci mu mùshindù wùndì ngùmvwà nè ke mùdici amu. Kàdi nwènù bùmvwè bishiilàngàne, èè, bìdi ànu bîmpè.

<sup>11</sup> Ndi muswè kusàkidila Mwanèètù Neville bwà mandamuna mîmpè àdiye mufile ku nkonko ayi kuntwaku. Mpindyewu, mmîmpè.

<sup>12</sup> Mpindyewu, mu cyòci eci, Genèsè 1.26, Nzambì wàkenza muntu mu cimfwànyì Cyèndè Yèyè mwinè. Nènkù bu nwènù mwà kumòna bîmpè, netúcyangàtè bwà nwamòna mwà kucibala, nè 26 . . . Bu nwènù mwà kuswà bwà kubala pàmwè neetù, tudi bafwànyìne kwikala nè disànkà bwà nwènù—bwà nwènù kucyèza, nùndondèshè.

*Ke Nzambi kwamba nè: Twènzàayi muntu mu cimfwànyì cyètù, ikalè mufwànàngane neetù: nè àkòòkeshe pa mishipa yà mu mbù, . . . pa nyuunyì yà muulu, . . . pa bimunà, . . . byà pa buloba, nè pa cintu cyònsò cyà cidipuuta panshì cidi cidikòka pa buloba aci.*

*Pa nàнку Nzambi wàkafùka muntu mu cimfwànyì cyèndè sungasunga, kumufùkayè mu cimfwànyì cyà Nzambi; yéyè wàkabàfùka mulùme nè mukàji.*

<sup>13</sup> Mpindyewu, aci's . . . nkàadi múmvwè aci bàkòkanganapù misangu yàbúngì, nè pa buloba bujimà, makòkyanganyi àbùnduka pa bwalu abu. Mpindyewu mu Genèsè 2.7, tàngilàayi cyàkenzàYe apa. Eyo, ke Cyòci eci:

*Nènku . . . Nzambi wàkenzela muntu ku lupwishi lwà buloba, nè kupùùdijila mupùuyà wà mwoyi munda mwà mimpèmpè; ke muntu kulwayè musuwàka wùdi nè mwoyi.*

<sup>14</sup> Mpindyewu, ndifumbà dyà mùshindù kaayi adi . . . ? Mwedi wa—wa lukonko mmùuswè kukonka nè:

**Dilamakana kaayi edì didi pankaci pàà Genèsè 1.26 ewu nè Genèsè 2.7? Nzambi wàkafùka bantu bàbìdi. Nè nganyì úvwa mulùme awu, nè nganyì uvwa . . . Aci cidi nè dilamakana kaayi? Ncinyì . . . ? Mmunyì mùdìbi bilamakana mu Mifundu?**

<sup>15</sup> Èè, mpindyewu, bu nwènu mwà kumòna nè ntèmà mpindyewu, mu Genèsè 1.26, twánjàayi kwangata citùpà cyà kumpàlà aci dyàmbedi. Nzambi wàkamba nè: “Twènzàayi.” Mpindyewu, “Twènzàayi,” *twètù* mbwena kwamba nè . . . “Twènzàayi muntu mu cimfwànyì Cyètù Sungasunga.” *Cyètù*, mu bushùwà bwà bwalu, tudi bamanyè nè Yéyè ùdi wàkula nè Muntu kampàndà, Úvwa wàkula nè Kampàndà mukwàbò. “Twènzàayi muntu mu cimfwànyì Cyètù Sungasunga ikalè mu difwànangana Neetù, nè ikalè nè bukòòkeshi pa nyama yà mu mpàta.”

<sup>16</sup> Bu nwènu mwà kumòna, mu bufùki, cintu cyà kumpàlà cìvwa cìfùkiibwe, mu bushùwà bwà bwalu, cìvwa mbukènkè. Nwènu bapwèkè nè bufùki, cintu cyà ndekeelu cyàkafùkiibwà cìvwa cinyì? Mulùme. Nè mukàji wàkenjiibwa paanyimà pàà mulùme. Eyo, cyà kumpàlà . . . Cintu cyà ndekeelu cyàkafùkiibwà, cyà bufùki bwà Nzambi, mmuntu.

<sup>17</sup> Kàdi pààkenzà Nzambi muntu Wendè wa kumpàlà, bu nwènu mwà kumòna, Wàkamwenza mu difwànangana Nendè, wàkenjiibwa mu cimfwànyì cyà Nzambi. Kàdi Nzambi ncinyì? Mpindyewu, bu twètù mwà kujandula cidi Nzambi, tudi mwà kujandula mùshindù wà muntu wàkenzaYè.

<sup>18</sup> Mpindyewu mu Yone Munsantu, nshapità mwi4, nènku nèngiikalè . . . nudi nubala bwalu ebu, Yesù wàkula nè mukàji

udi mu...nwênù baswè kubuululamù. Mémè...bu múmwà nciyi nè díbà dikùmbàne to, ncivwa muyifunde to, mvwa ànu muyikwàte mu meeji. Nènku yìkèbaayi mpindyewu, bu mémè mwà kuyipeta lùkàsà. Mpindyewu túbangilàayi ku nshapità mwi4, nè mvnsà wa 14:

*Nènku ewu yònsò udi unwà màyi angààmupèeshà aa kààkwikala nè nyòòtà nànsa;... nè nekwikale mishimi yà màyi yifukuka too nè ku mwoyi wà cyendèlèlè.*

*Ke mukàji kumwambilayè nè: Mukalenge, mpèeshèku màyi aa, bwà ncùkadi...ncilu mvab'ewu bwà kusuna to.*

*Yèsù wàkamba nè...Ndà, nè ùbùikilè bàyeebè,...*

*Mukàji awu wàkandamuna... .*

19 Ndi ngèèla meeji nè tudi nè cyà kupita apu ndambù mpindyewu, bwà kujandula, kujandula cìndi—cìndi muswè bwà nwênù kumòna mwab'ewu. Pàmwàpa kabìyi nànkù to, pàmwàpa ndi mwà kucipeta lwà kwìnshi eku, nè cìndi muswè kumòna. Wamba nè? Mvnsà wa 23 nè wa 24. Èyo.

*Nudi nukuukwila... (ke cyòcì aci)... Nudi nukuukwila kàdi cinùdì kanùyì bamanyè to: twètù tudi bamanyè citùdì tukuukwila: bwalu lupàndù ndwà beena Yudà. (nè ncyà bushùwà, nwamònu's)*

*Kàdi díbà dílwalwa,... Kàdi díbà dílwalwa, nè ke dyòdì edi mpindyewu, bwà bakuukwidi balelèlè (beena Yudà anyì bàà Bisàmbà byà bendè) bààkuukwila Taatù mu nyumà nè mu bulelèlè: bwalu bàà nànkù awu ke bakuukwidi bàdi Taatù ùkèba.*

20 Mpindyewu, mvnsà udi ulonda awu ke ùndì muswè:

*Nzambi ùdi Nyumà, nè aba bàdi bàmuukwilà bàdi nè cyà kumuukwila mu nyumà nè mu bulelèlè.*

21 Mpindyewu, pìikalàbi nè Nzambi wàkafùka muntu mu cimfwànyì Cyèndè Sungasunga nè mu difwàngana Dyèndè Yèyè mwinè, mmuntu wa mùshindù kaayi wàkafùkàYe awu? Muntu wa nyumà. Mpindyewu, bu nwênù mwà kumòna, paanyimà pàà Yèyè mumane kwenza bufùki bwònsò, nè mumane kufùka muntu wa nyumà, dibala dyà nè ntèmà edi mpindyewu (kùdì ewu udi mwèlè lukonko elu ewu) yèyè neàsanganè eci, nè Nzambi wàkafila bukòokeshi bwà nyama nè mishipa nè bintu byònsò kùdì muntu. Kàdi, mu dyenza Dyèndè dyà kwaka, Yèyè wàkenza muntu mu cimfwànyì Cyèndè Yèyè mwinè bwà kulombolayè bimunà, kulombola nyama yà mu mpàta, ànu mùdì Nyumà Mwìmpè ùlombola mwena kwitabuuja leelù ewu amu. Nwamònu anyì?

22 Yèyè ùvwa, mu ngaakwilù mukwàbò, Adàmà, muntu wa kumpàlà mu bufùki bushààdile bwà Nzambi. Bufùki bwà kumpàlà bùvwa n'Nzambi Yèyè mwinè; pashiishe mu Nzambi

kupàtukamù Logos, uvwa Mwânà wa Nzambi awu; pashiishe mu Logos, uvwa Dîyi awu (“Ku cibangidilu kwàkadi Dîyi, nè Dîyi dyàkadi nè Nzambi, nè Dîyi dyàkadi Nzambi. Nè Dîyi dyàkavwijiibwa mubidi nè dyàkasombela munkaci mwètù.”), mu Logos kupàtukamù mu—muntu awu.

<sup>23</sup> Kaa, ndi nè cimfwànyì cilenga mu meeji àànyì mpindyewu, bu nwênù mwà kwenza naanyì kaalwendu kakesè. Ndi ngèèla meeji nè nkààdi mwakùlepù kumpàlà, kàdi bwà kucifikisha pa mwaba wunùdi mwà kucimòna bulelèlà. Mpindyewu, twenzààyibì kaalwendu kakesè nè twàlukile bwà katanci kakesè. Mpindyewu, kanùtùmi meeji ku luuya lùdiku to, tütumàayi meeji ètù ànu ku citwikalà nè cyà kuyiikila nè kutùmakù meeji mpindyewu.

<sup>24</sup> Twàlukilàayi paanyimà bidimu mìliyò lukàmà kumpàlà mene kwà kwikalakù mùtooto, ngondo, anyì ní ncinyì pa buloba. Mpindyewu, kùvwa cikondo civwà kakùyiku cintu nànsha cimwè mwaba ewu to, civwa ànu cyònsò kashidi nè Cyendèlèlèlè. Nè kacyakacya yònsò nè Cyendèlèlèlè bìvwa n’Nzambi, Yèyè ùvwaku ku cibangidilu.

<sup>25</sup> Mpindyewu, tùpàtukàayi pambèlu apa ku mwelelu wà lutanda elu nè tütàngilè kwàka bwà tùmone bintu ebi byènzeka;

<sup>26</sup> Mpindyewu: “Muntu nànsha umwe kàtukù mwànji kumòna Taatù dibà nànsha dìmwè to.” Muntu nànsha umwe kèna mwà kumòna Nzambi mu mmwènekèlu wa mubidi to, bwalu Nzambi kàtu mu mmwènekèlu wa mubidi to, Nzambi ùdi Nyumà. Nwamònu anyì? Èyo. “Muntu nànsha umwe kàtu mwànji kumòna Taatù to, kàdi mulela umwèpelè wa Taatù ngudi uMuleja patòòke,” Yone. . . wa 1, nwamònu’s.

<sup>27</sup> Mpindyewu, kàdi mònaayi mpindyewu nè, kakwèna cintu nànsha cimwè to, kùdi ànu cibwàshìbwàshì cyanààna. Kakwèna bukènkè to, kakwèna mifitù to, kakwèna cintu nànsha cimwè to, kakwèna kùmwèka bu kùdi cintu nànsha cimwè to. Kàdi mwómò amu mùdi Kampàndà mutàmbe-mfùkìlu, Yèhowàh Nzambi, Wàkabwikila cibwàshìbwàshì cyònsò cyà myaba yònsò mu bikondo byònsò awu. Yèyè ùvwa wa kashidi kuumukila ku kashidi, Yèyè ùdi cibangidilu cyà bufùki. Ke Nzambi nyàwù. Ncyèna mwà kumòna cintu nànsha cimwè to, ncyèna mwà kuumvwa cintu nànsha cimwè to, kakùyì dinyunga dyà kapwishipwishi mu lupeepèlè to, kakùyì ncintu nànsha cimwè to, kakùyì nànsha lupeepèlè to, cintu nànsha cimwè to, kàdi nànsha nàntu Nzambi ùvwamù. Úvwa n’Nzambi. (Mpindyewu twànji tütàngilàayi bwà katanci kakesè, nè paanyimà pàa katanci. . .) Muntu nànsha umwe kàtukù mwànji kumòna Aci to, mpindyewu, Ke Taatù nyàwù. Ke Nzambi nyàwù, Taatù awu.

<sup>28</sup> Mpindyewu mònaayi. Nàntu paanyimà pàa katanci mèmè kubanga kumòna Bukènkè bukesè bwà cijila bùbanga

kudifwimba, bu mùdi kafulu kakesè kàà bukênkè anyi cintu kampàndà, uvwa mwà kucimòna ànu ku mèsù à nyumà.

<sup>29</sup> Kàdi tàngilàayi mpindyewu, patùdi tutàngila apa, èkèleeziyà mujimà mpindyewu. Tudi biimányine mu lutanda lunène, tubandila cidì Nzambì munkaci mwà kwenza. Nènku netùkafikè buludì ku lukonko elu kaaba aka nènku nenùmonè mùdiYe ùcibweja.

<sup>30</sup> Mpindyewu, muntu nànsha umwe kàtukù mwanjì kumòna Nzambì to. Nènku mpindyewu, cintu cidì cilondà citùdi tubanga kumòna, ku mèsù à ditàngila ditàmbe-mfùkilu, tudi tumòna Bukênkè bukesè butòòke budifwimba mwaba awu. Ncinyi aci? Aci cyàkabiikidiibwa, kùdi babadi bàà Bible nè: “Logos,” anyi “mwela maanyi,” anyi “dilaabiibwa,” anyi. . . .mùmvwà nswa kwamba, ci—citùpà cyà Nzambì ciwva cibange kudyundila mu cintu kampàndà bwà bantu bààmòna mwà kupeta cingènyiingenyi cyà mùshindù kampàndà cyà ciwvwaCi. Ciwva ndambù, cyà cipwekèle. . . .ndambù wa Bukênkè, bütentemuka. Yèyè. . . .Aci ciwva n’Diyi dyà Nzambì.

<sup>31</sup> Mpindyewu, Nzambì wàkaDilela ku Mwànà ewu uvwakù kumpalà mene kwà kwikalakù nànsha kapwishipwishi mu. . . anyi lupeepèlè bwà kwenza kapwishipwishi. Ke ciwvwa. . . Nwamònu’s, Yesù wàkamba nè: “Ntùmbishè Mémè, Taatù, nè butùmbi bùTùvwà naabù kumpalà kwà difùkà dyà dyulu nè buloba.” Nwamònu’s, ku kale menemene kwàka.

<sup>32</sup> Mpindyewu, mu Yone Munsantu 1, Yèyè mmwàmbè nè: “Ku cibangidilu kwàkadi Dìyi.” Nè cyà kumpalà. . . “Nè Dìyi dyàkadi Nzambì. Nè Dìyi dyàkavwijiibwa mubidi nè dyàkasòmbela munkaci mwètù.” Nzambì ùdìvùngulula Yèyè mwinè, ùpweka ùshààla muntu. Mpindyewu tàngilàayi mwàkacyenzàYe.

<sup>33</sup> Mpindyewu, kale wàwa, pashiishe, cikondo cidì kafulu kakesè kàà bukênkè aka kàlwa. Mpindyewu, katwèna ànu mwà kwanji kumòna cintu nànsha cimwè to, kàdi ànu ku mèsù kwà citàmbe-mfùkilu cyanàànà tudi tumòna kafulu kàà bukênkè kiimàne mwaba awu. Mpindyewu, ke Mwànà wa Nzambì nyèyè awu, Logos awu. Mpindyewu, ndi mwà kuMumòna unàya bu mwànà mukèsè, kumpalà kwà ciibi cyà Taatù, nè Cyendèlèèle cyònsò. Nwamònu anyi? Nènku, mpindyewu, pashiishe mu dikwàtakaja didifwànyikijila Dyèndè amu ke kubangaYè kwela meeji ku ciwvwa bintu mwà kwikala, nè ndi mwà kuMuumvwa wàmba nè: “Bukênkè bwikalèku.”

<sup>34</sup> Nènku pààkenzàYe nànu, kapwishipwishi kutaayikakù nè dībà kwikaladiku. Dyàkanyùnguluka munda mwà miliyò nkàmà yà bidimu, dyènta bisòta, nè dyòsha, nè didifwimba mùshindù wùdidi leelù ewu; diikàle ànu munkaci mwà koosha, diikàle ànu munkaci mwà kutaayika mu tupwishipwishi. Bu bómbe bwà mùshindà mwà kulekelediibwa, mùnyòòlòlù wà bómbe bwà mùshindà awu ùvwà mwà kwangata. . . .buloba ebu

mbufwànyine kwikala bu mùdi dîbà amu, mwàmwa, bwènda bùtaayika nè bùbwayika. Bu wèwè mwà kwimana pa dibùlungà dikwàbò nè kutàngila ku eci nùku, ncifwàna kumwènèka bu dîbà dikwàbò, mwaba wùvwà tupwishipwishi mwà kwikala twòsha buloba ebu, bu mùyòòlòlù ewu mufwànyine kubwayika nè kutwàdija ànu kunyùnguluka, ùnyùnguluka ànu bu mvùnde mùshindù awu. Miliyò nè miliyò yà kilòmèètà bwà kufika ku ndimi minène yà kapyà yà miliyàlà yà degré Fahrenheit, yà—yà—yà luuyà yidi yipàtukà yà dîbà adi.

<sup>35</sup> Mpindyewu, tàngilàayi eci mpindyewu. Bilenga be! Mpindyewu, Yèyè mmwenze dîbà. Nènku dîbà adi, katanci aka anyi, cisòta cinène cyàkatùkukù, ciikàle nè bujitu butwè ku . . . ciikaàle ànu bu mùdi buloba ebu, è kwenzaci “Zup!” Pashiishe Logos ewu kaaba aka mpindyewu, Mwànà wa Nzambì, ùdi munkaci mwà kucitàngila, Ùdi ùbùlekela bùdishinda munda mwà bidimu miliyò lukàmà nè Yèyè kubwìmanyika. Pashiishe bukwàbò kubuukabò, nè Yèyè kubùlekela (bubùuka) bùdishinda munda mwà miliyò yà bidimu, pashiishe Yèyè ùdi ùbwìmanyika. Mpindyewu, tudì biimàne, tubùbandila mùdibo bùfùkiibwa.

<sup>36</sup> Mpindyewu, Yèyè ùdi nè cintu kampàndà mu meeji Èndè, nè cidiYe wènza ncinyi? Ùdi munkaci mwà kufùnda Bible Wendè wa kumpàlà awu. Bible wa kumpàlà ukààdikù muntu mumòne ùvwà mìtootò, cidiminanzaji. Nè cidi ànu menemene . . . anu . . . Cidi cinwàngàna nè Bible ewu kaaba aka. Cidi cibanga, cyà kumpàla cyà mu cidiminanzaji m’virgò. Ncyà bushùwà anyi? Cyà ndekeelu cyà mu cidiminanzaji ncinyi? Leo, nyama wa ntambwe. Ke Dilwa dyà kumpàlà dyà Yesù ndyòdi adi, Yèyè wàkalwila kùdi virgò; diibìdi, Yèyè ùdi ùlwa bu Ntambwe wa cisàmbà cyà Yudà. Nwamònu anyi? Kucizòla cyònsò, cikondo cyà kànsèrè, nè byònsò too nè ku ndekeelu. Mpindyewu, Yèyè wàkatèeka byònsò abi mu dyulu nè kubitèeka patòoke. Ntumbà yà muulu yònsò eyi, bipesa byà buloba, anyi dîbà, bilembèlèle muulu emu.

<sup>37</sup> Mpindyewu, pàdi maalu à mamanya àya ènda àkèba mìsilè yidi yipòna ayi, aci kaciyèna cyèla Nzambì mpatà to, aci cidi ànu cicinjaadikila. Nwamònu’s, aci cidi ànu cyènza nè cìikalè cilelèlà menemene. Mpindyewu, mpindyewu mònaayi, mìsilè eyi yònsò mìlembèlèle kuntu kwàka kule nè dîbà didi dyòsha adi, nè yipàtukila mu lupeepèlè, mu bushùwà bwà bwalu, mbayisangishe. Dyà kààleelù ewu anyi, cyàkabanga ànu dibwe dinène dyà mashika.

<sup>38</sup> Mpindyewu, aci cìvwa buloba ebu bwàkafùkiibwa, ànu cipesa cinène cyà kale cyà butù kwapukaci kuntwaku. Mwìnshì mwàci amu mpindyewu kamwèna cintu to ànu volcan udi usaba, munkaci mwà kuteema, butubutu, midilu yidi yitaayikila myaba yònsò, yidi volcan. Nè maalu à mamanya àdi àmba mùdi—mùdi buloba ebu, citaatutaatu cidi pamutù pààbù, mwaba wutùdi tusòmbela ewu, ùdi ànu bu mùdi cizubu cyà cimuma cyà pomme. Nè byònsò . . . Mpindyewu, kùdi kilòmèètà binunu

makùmi ànaayi mu nyùngulwilu, cidi pàmwápa kilòmèètà binunu dikùmi nè bibìdì nè nkàmà mwandamukùlù (aci cidi mwà kwikala pabwìpì nè kilòmèètà binunu dikùmi nè bibìdì nè nkàmà mwandamukùlù) yà mupimbu. Kàdi anjì elààyìbì meeji, bwà munda amu, mùdi volcan munkaci mwà kulàkuka mudilu.

<sup>39</sup> Nè byàbisàtù bibìdì byà buloba, kupita pa byàbisàtù bibìdì, bidì mu màyi; nè cyàbisàtù cimwè cyàbò m'buloba bùmè, bu cyàbisàtù cimwè nànkù awu. Nè citaatutaatu cikesè eci, citùdì basòmbelepu eci, ncyùle tètè nè ma-gàzè à njìwù yàbùngì, nè gaz, kàsòloonyì, maanyi, nè bikwàbò byònsò. Ncyà bushùwà anyì? Nè byàbisàtù byàbù bibìdì, kutàmba byàbisàtù byàbù bibìdì, mmàyi. Njila wa kulonda bwà kupeta màyi ùdi bishi? Bitùpà bibìdì byà hydrogène nè citùpà cimwè cyà oxygène, bitùdishì.

<sup>40</sup> Kùdi nzembu bùngì bukùmbàne mu cibambalu cyònsò bwà kutàpulula luuyà nè mashìka, nènku necyenzè nzembu mikùmbàne bwà kutùdishà cibambalu kampàndà. Udi mwà kwela tupwishipwishì bùngì bukùmbàne mu ndundu wa golf bwà kutùdishà New York kumukùpula pa buloba. Nè pashìishe muntu, musòmbe pa lwesu lwà ifernò, ùdiimba ngoma wa mu cyàdì nè wèla Dìyì dyà Nzambi kadyòmbò, wàmba nè: “Kakùtùkù mwaba pààwù nè ny'ifernò to.” (Ndi naaci kaaba aka mu katànci kakesè emu, nènku netùkafikèku, nwamònu's.) Nudi basòmbe pa lwesu lwèndè ditùkù dyònsò edi. Nènku paùdì ànu mwab'ewu apa udi musòmbe ànupù mene, nènku ifernò ùdi ànu mwìnshì mwèbè amu.

<sup>41</sup> Nènku mpindyewu, mònaayi, kàdi mpindyewu pààkajandudiibwà cyòcì eci bwà musangu wà kumpàlà, pàvwà Yesù... Mpindyewu tàngilàayi kafulu kakesè kàà bukènkè kuntu kwàka nàka. Mpindyewu ndi mwà kuBùmòna bwènda bupàtuka butàngile pa buloba ebu nè bùfika pampàla pààbù nè butwàdija kubùseemeja mwab'ewu pabwìpì nè dìbà. Kì ncìngà cintu to ànu dibùlùngù dinène dyà dibwe dyà mashìka. Kàdi dìbà dyàkatwàdijàdi kwenguluka, dìba adi ke mabwe manène à mashìka kubangawù kukòseka àtangalaka ku malaba àà ku Nord nè ènda àpweka kwìnshì. Nènku pààkenzekàbi nànkù, cyàkakòsa Kansas nè Texas nè myaba mikwàbò yònsò yidì kuntu kwàka ayi, nè kuya kabwela too nè mu Golf wa Mexique. Kàdi katànci aka anyì, cintu cyònsò nu kaabujimà cìvwa cibwikila kùdi màyi.

<sup>42</sup> Pashìishe, mpindyewu tudi tubwela mu Genèsè 1, tudi tukafika mu Bible mpindyewu, nè mu cimfwànyì cyètù mu Bible. Genèsè 1: “Buloba kabùvwà nè mbùngakeenu to, nè bùvwà munda mutupù; nè màyi àvwa pamutù pàà ndòndò.” Ncyà bushùwà anyì? “Nè Nyumà wa Nzambi ùvwa wèndakana pa màyi.” Mpindyewu, Yèyè wàkatàpulula màyi, è kajuulaYè tukùnà nè malaba nè bikwàbò byònsò; è kubyùmisha. Bisèkiseki nè bikwàbò byònsò, Yèyè ngwakabyènza. Ke kwenzaYè ngondo.

Nè kumwelela mikàlù, yà mbû, bwà kiikadi mwà kusambuka nànsha.

<sup>43</sup> Yèyè kukungwija bintu byònsò abi pàmwè, kwenza...?... KwenzaYè bintu bikwàbò byònsò, mwoyi wònsò wà bukwànyama, nyuunyi, mbùlùbùlù, nsokò, nè cyònsò cìvwàku aci, kucitèekaYè cyònsò pa buloba apa. Nè pashiishe Yèyè kwela lukonko elu mpindyewu. “Twènzààyi” (Nganyi? Taatù nè Mwànà) “twenza muntu mu cimfwànyi Cyètù Sungasunga.”

<sup>44</sup> Mpindyewu, piikalàbì nè muntu wàkenjiibwa bu Bukènkè bukesè bwà cijila abu, anyi cintu bu nàнку awu, kaBùvwa mwà kumwènèka to (bùdì bwikàle Muntu wa nyumà). Yèyè wàkaDìmwènèsha anyi wàkaDìvùngulula kàbìdì ndambù, bwà kwenza búsàtù Bwèndè ku Taatù, Mwànà, nè Nyumà Mwimpè. Kàdi’s ke Nzambi ewu, ùDìvùngulula mpindyewu, mu nè “Twènzààyi muntu,” uvwa mwan’Èndè awu, mùtòlokù wà kùdìYe, “muntu mu cimfwànyi Cyètù Sungasunga,” yèyè ùvwa kampàndà mutàmbe-mfùkilu. “Nènku ikalè nè bukòokeshi pa nyama yà mu mpàta, nè bikwàbò.”

<sup>45</sup> Mpindyewu, muntu awu wàkalombola muntu... wàkalombola bi—bimunà nè bikwàbò byònsò, ànu mùdì Nyumà Mwimpè ùlombola mwena kwitabuuja mulelèlà, mushùwashìwàlà leelù ewu emu. Dìyì dyà Nzambi kuntu kwàka... Dìyì dyà muntu’s wè, òvwa mwà kwakula dyàmba... kubìikila ngombe bwà kulwayi mùshindù ewu, kubìikila mikòòkò mu ewu mpàta, kubìikila mishipa mu àa màyi. Nwamònu’s, yèyè ùvwa nè bukòokeshi, bintu byònsò bìvwa bimutùmikila.

<sup>46</sup> Mpindyewu, kàdì dîbà adi kakùvwa muntu bwà kudima buloba to, mu Genèsè 2, muntu nànsha umwe bwà kudima buloba to. “Nè pashiishe Nzambi wàkenza muntu” (Genèsè 2.7) “ku lupwishi lwà buloba.” Mpindyewu Yèyè wàkalonda... Wàkenza muntu ku lupwishi lwà buloba, nè wàkatèeka Nyumà mutàmbe-mfùkilu ewu... .

<sup>47</sup> Mpindyewu, yèyè ùvwa mulàadika mwaba awu. Ndi mwà kwikala nè bimfwànyi byàbùngì byà cyòci aci. Ndi mwà kumòna Adàmà mwimàne... Twàngatàayi ewu njila, tùmumòne mwimàne bu mucì. Nzambi ùvwa mumwenzè. Yèyè ùvwa ànu mufwè wetù ewu; bânà bèndè bàà nkàsà, bu mùdì miji, babwélè mu buloba. Ke Nzambi kwamba nè: “Kwikalè,” anyi kupwidija mupùuyà wa mwoyi munda mwèndè, ke kutùpikayè, kulwayè mu yèyè. Yèyè ùvwa... È kupwidija mupùuyà wà mwoyi munda mwèndè, wàkalwa musùukà wùdì nè mwoyi. Mpindyewu, ke yèyè kutwàdija kutentemuka, ùya kumpàlà.

<sup>48</sup> Ke pashiishe Nzambi kupàtula mu lubadi lwèndè amu cipese cyà ku yèyè, lubadi, nè kwenza mukàjì. Mpindyewu, Yèyè wàkapetela nyumà awu penyì, mukàjì? Nwamònu anyi? PàvwàYe... Genèsè 1.26, Yèyè wàkamba nè: “Twènzààyi

muntu mu cimfwànyì Cyètù Sungasunga, mu cimfwànyì Cyètù Sungasunga—Sungasunga, mwàkabàfùkàYe (mulùme) mulùme nè mukàjì.” Wàkenza nyumà mukàyàbàle bwà mulùme; Wàkenza nyumà mubwengètèke, mukesè, wa kwengeleka, nyumà wa bukàjì bwà mukàjì.

<sup>49</sup> Nènku paùdì umòna muntu mukàjì wènza maalu bu muntu mulùme, mmuumùke mu mwaba wèndè, nudi numòna’s, ku cibangidilu. Nwamònu anyi? Èyowà. Mmwenzèjìbwe. . . Ndi ngèèla meeji nè bìdì bundù bwà mùdì bakàjì bajimìje kaaba kààbò kàà dibwengeteka, kàà bukàjì aku. S’mbundù’s. Ndi nnwàmibila nè, ke mùdìbi. Cìdì. . . Nudi bamanyè’s, nèngàmè nùnkù ewu. Mpindyewu, ncyèna ngàakula bwà nwènú bakàjì bàdì apa aba to. Kàdì, mu bushùwà bwà bwalu, cyòcì cìtapa ku mwoyi, cìdì ànu cìtapa’s. Kàdì, tàngilààyi, lekèlaayi nnùkonkèku cintu kampàndà. Paciibidilu bakàjì bàvwà nè bukàjì menemene mu mùshindù wà nè muntu mulùme ùvwa mufwànyine kuya kayiikila nendè nè ùvwa ùmvwa bundù. Huh! Dyumvwa bundù ncyinyi’s, twamb’èku twamb’èku? Ncyèna mucimòne kùkaadi ntàntà mule be mu mùshindù wà nè ncyèna mufwànyine nànsha kumanya civwàcì bu mukàjì kampàndà mwà kuumvwa bundù. Kabàcyèna kàbìdì nè bunème abu kàbìdì to, nyumà yònsò mutàmbe bwìmpè wa bukàjì awu. Bàdì ànu. . . Bàdì mwà. . . Nebàvwalè bilàmbà byenze bu muntu mulùme, bàkòsa nsukì yàbò bu muntu mulùme, bànwà mfwankà bu muntu mulùme, bànwà maalà bu muntu mulùme, bàdicìpa bu muntu mulùme, bènzà masungulangana bu muntu mulùme, bènzà mudimu bu muntu mulùme, pa nànkù, mbalwè bapapè, bapàyàme. Kaa, ekèlekèle! Aci’s cìdì cìleeja kunùkaadi bakafikè. Aci’s mmwòmò menemene.

<sup>50</sup> Mukàjì mukesè wa bu-inàbànzà awu, kanùcyèna nutàmbe kumumòna to, ùkaadi muntu wa pa kumumòna bikolè. Kì ncyà bushùwà anyi? Èyowà’s, aci’s mbulelèlè. Pa nànkù mukàjì kènà nè cyà kwimana kuulu nè kwenza maalu bu muntu mulùme to, munène nè mupàyàme, bwalu yèyè ngwa kwengeleka. Nzambì wàkamwenza mùshindù awu. Ndi mwà kujaadika aci ku Mifùndu. Èyowà’s, mukalenge. Ncyà bushùwà. Nènku. . .

<sup>51</sup> Kàdì, mu bushùwà bwà bwalu, tudi tuumuka ku lukonko elu, kàdì ncyèna muswè kutàmbe kuumuka ku lukonko elu to. Kàdì, nwamònu’s, mwaba awu ke wàkenzelàYe muntu Wèndè wa kumpàlà, ùvwa mu cimfwànyì Cyèndè Sungasunga awu.

<sup>52</sup> Nè pashìishe, Nzambì, kumpàlà mene kwà kwikalakù mùtootò, wàkamanya nè buloba ebu nebwikalèku. Nè Yèyè ùvwa mumanyè nè nèngiikalè William Branham nyiisha Èvànjeeliyò ku cyambilu nè wèwè uvwa mufwànyine kwikala *John Doe* musòmbe mwab’awu ùMutèeleja, kumpàlà mene kwà dyulu nè buloba kubangabi. Àlèluuyàh!

<sup>53</sup> Mpindyewu, ke mùtù bantu míngà misangu, mu beana—

beena nè ànu mikenji nè baa-Calvinistes, bàbwela bônso mu cibwejàkàji. Nwamònu anyi? Bàdi bamba nè: “Mbwa cinyi bùvwà bàmwè badyànjila kulongolola bwà kujìminabò?” Nzambi kí mmuswè bwà muntu kampàndà àbutukè to. Yèyè kí mmuswè bwà muntu nànsha umwe àbutukè to, kàdi nànsha nànkù, mwikàle Nzambi, Yèyè mmumanyè nè kùdi bàmwè bìikalà kabàyi mwà kuCìitaba to. Nwamònu anyi? Nwamònu’s, bikèngela Yèyè. . . Bìvwà bikèngela Ìkalè mumanyè ndekeelu kacya ànu ku cibangidilu bwà kwikalaYè Nzambi. Kí mmwòmò anyi?

54 Pà nànkù Yèyè ùvwà mumanyè nè Yèyè neikale nè bakàji kampàndà, pa nànkù Yèyè kwenza ànu nyumà wabò mwaba awu mene. Bible mmwámbe nè Yèyè wàkenza, mu 1, mu Genèsè 1.26 nè: “Yèyè wàkamufùka, mulùme,” mu didyànjila-kufwànyikija, “mulùme nè mukàji.” Amen. Nwamònu anyi? Mu didyànjila-kufwànyikija, Yèyè wàkenza mukàji nè mulùme kumpàlà mene kwà kufwìmbiibwabò mu lupwishi lwà buloba.

55 Nè pashìshe Nzambi wàkenza muntu awu, kàyì mu cimfwànyì Cyèndè Sungasunga to. Mubidi ewu kawèna mu cimfwànyì cyà Nzambi to, mubidi ewu wùdi mu cimfwànyì cyà nyama.

56 Ndikù mwà kuumusha nkooci wanyì ewu anyi? Luuyà lùdi lwènda lùbànda bikolè mwab’ewu. Ndi muvwàle mutèèlu mupandike, kàdi kanwakuwùmòna to. Mukàjàànyì mmungambile nè Jesse kí mmulwè kwangata bilàmbà bwà kusukula to, pa nànkù. . . Kàdi, tàngilàayi, tudi pa cyena bwalu mwab’ewu mpindyewu cìdi nè mushinga kupita byà mutèèlu mupandike mu cyambilu abi. Kí mmwòmò anyi? Cidi cyùmvwija Mwoyi wà Cyendèlèlè.

57 Mpindyewu, mònaayi mulùme. Nzambi ùvwà mumanyè ku cibangidilu nè Yèyè neikalè nè balùme nè bakàji, nè Yèyè ùvwà mumanyè nè Musùngidi ùvwà mwà kwikala kaaba aka nè bivwa bikèngela bwà kutwàlaYè Yesù, nè Yèyè ùvwà mwà kupoopediibwa pa nkùrusè. Nè Yesù wàkambila bayiidi, pàvwàYè pànu pa buloba, nè Yèyè “ùvwà mubàmanyè mene kumpàlà kwà difùkà dyà dyulu nè buloba,” kumpàlà mene kwà dyulu nè buloba kwikalakù.

58 Nè Nzambi wàkamba, kàbidì nè, anyì Pólò nguvwa wakula, mu Galàtiyà, wamba nè “Yèyè mmutùtèèke mu mudimu nè mutùbìikile mu Yèyè kumpàlà mene kwà dyulu nè buloba kwenjiibwabì.” Elàayi meeji ku bwalu abu! Bwà nè Nzambi. . . Muntu kanà yònsò ewu udi muswè kuumvwa cìdi Mifùndu yàmba pa bwalu abu, elàayi byanza muulu. Bidi byènda ànu pàmwè nè lukonko alu. Bwelàayi naanyì mu Galàtiyà, nshapità wa 1 awu. Tàngilàayi kùnweku. Ncyèna nswa kwamba mu Galàtiyà to, ndi nswa kwamba Efèsò. Tèèlejàayi nè ntèmà mpindyewu cìdi Nzambi mwámbe, mu Efèsò 1 nè:

*Pòlò, mùpostòlò wa Yesù Kìlistò ku diswa dyà Nzambì, kùdì bansantu bàdì mu Efèsò, nè kùdì beena lulamatu mu Yesù Kìlistò.*

*Ngàsà ikalè kunùdì, nè ditalala, byà kùdì Nzambì Taatù, nè kùdì Mukalenge Yesù Kìlistò.*

*Nzambì nè Taatù wa Mukalenge wetù Yesù Kìlistò àbeneshiibwè, udi mutùbènèshe nè mabènèsha ónsò à nyumà mu myaba yà mu dyulu mu Kìlistò Yesù:*

59 Mpindyewu, ncyòcì eci, mónaayi:

*Bilondèshìlè mùdiye mutùsungùlè twètù munda mwèndè kumpàlà kwà difùkà dyà dyulu nè buloba, . . . (yoyòyò!)*

60 Abi's mbìmpèku's. Kì mmwòmò anyì? Kì mbìmpèku to, mbìmpè menemene! Kumpàlà kwà kwikalakù difùkà dyà dyulu nè buloba, Nzambì ùvwa mumanyè Orman Neville nè mumanyè nè yèyè neàyiishe Èvànjeeliyò. Abi kì mbilenga bilayà anyì? "Mmusungùlè. . ." Mòna's, yèyè's ncidimba cyà Èkèleeziyà, nè Nzambì ùvwa mumanyè nè Yèyè neikalè nè Èkèleeziyà awu. Ke kwambayè, Pòlò wàkula nè èkèleeziyà wa Efèsò, wàmba nè: "Yèyè mmutùsungùlè munda Mwèndè." Mpindyewu, twètù tudi bònsò bidimba byà Mubidi wà Kìlistò. Ncyà bushùwà anyì? Nènku Nzambì, kumpàlà mene kwà dyulu nè buloba kwenjiibwabi, wàkakusungula wèwè nè mèmè munda Mwèndè kumpàlà mene kwà dyulu nè buloba kwenjiibwabi. Yoyòyò! Èkèlekèlè! Abi kì mbilenga bilayà anyì?

61 Mpindyewu, muntu wa kumpàlà awu, mpindyewu, Yèyè wàkenza muntu wa kumpàlà mu cimfwànyì *Cyèndè*, nènku tudi twalukila ku cimfwànyì aci, ncyà bushùwà, ku cimfwànyì cyètù cìdì cìfùkìibwe cyà kumpàlà aci.

62 Pààkamfùka Nzambì, mèmè William Branham, mvwa kumpàlà kwà difùkà dyà dyulu nè buloba, Yèyè wàkenza buumùntù bwànyì, nyumà wanyì. Ncìvwa mumanyè cintu nànsha cìmwè to bwà ku dyànyì dimanya, kàdì. . . mvwakù. Kaa, ncyèna—ncyèna ngèèla meeji nè nudi nucyùm vwa to. Kàdì mpindyewu, anjì indilà kakesè, Yesù wàkambila bayiidi nè Yèyè "wàkabàmanya kumpàlà kwà difùkà dyà dyulu nè buloba," nènku Pòlò mmwàmbè apa nè "Yèyè mmutùsungùlè munda Mwèndè kumpàlà kwà dyulu nè buloba kubangabi." Mpindyewu, kùvwa citùpà kampàndà cyànyì mèmè, Orman Neville, nè nwènù bakwàbò bònsò bàdì kaaba aka, cìdì mu Kìlistò Yesù kumpàlà mene kwà dyulu nè buloba kubangabi. Nènku eci nku dyànyì ditaata dyà cyòcì aci. Ndi ngèèla meeji nè bantu leelù ewu bàdì bakwàta kùdì Nyumà ewu, anyì nyumà, citùpà cyà banjèlò aba, nyumà yàkanyùnguluka kupàtukila kùdì Nzambì, yìvwà kacya kayiyì midìshìnde ku cibangidilu nè yàkakàndameenà mashimi à dyabùlù mu Dyulu.

63 Nènku byàbisàtù bibìdì byà buloba bìdì mu mpèèkaatù, nè kupita too nè pa abi, nè byàbisàtù bibìdì byà banjèlò byàkiipaciibwa. Nè yôyì nyumà yà baadémons ayi yàkabwela munda mwà bantu nè yàkasòmba mu mibidi yàbò. Nudi bamòne cìndì njinga kwamba aci anyì? Mbaadémons bàvwà kale wàwa... Bàvwaku kale nè bàakalwa kubwela mu bantu nè kubàpèèsha ngiikàdilù kampàndà. Yesù wàkayìipata mwandamutekète mujimà munda mwà Màriyà wa ku Magàdàlà. Maditàmishi, dyambu (bantu banène, nudi numòna's), bukooyà, manyaanù, maalu à ciipanshì, ditembangana, bilumbù nè bantu. Bintu byònsò ebi, nwamònu's.

64 Yôyì ayi yìvwa nnyumà yàkenjiibwà kale wàwa pàkatwàdijà Nzambì kwenza muntu kuntu kwàka mu cimfwànyì Cyèndè Sungungu. Kufùkakù bantu batàmbe-mfùkilu abu, nyumà ayi.

65 Nè pashìishe Yéyè wàkatèèka muntu mu lupwishi lwà buloba, uvwa muntu wa kumpàlà awu, Adàmà. Nènku yéyè muntu awu úvwa mwenza mu cimfwànyì, muntu ewu nùku, mmwenza mu cimfwànyì cyà nyama. Mibidi ya buntu eyi mmyenza mu cimfwànyì cyà nyama.

66 Tudi nè cyanza ànu bu nsokò, nè—nè tudi nè dikàsà ànu bu ours. Angàtà kànà kàà ours, kàshebèyà, ùkàlamunè cisèbà kàdì ùkàtèèkè ku luseke lwà kànà kàà bakàjì kàà mu dibòkò kàdì ùtàngile dishiilàngana. Huh! Mwanèètù, bìkèngela ùtàngidile pabwìpì menemene. Cyàdì cijimà eci, bukwà misunya, bìdì pàmwè nè byònsò ànu mwomùmwè, mùshindù wùdìbì byenjiibwe nè mmwènekèlu wabì, nè bintu byònsò ànu pyòpyopyò. Cidi mu cimfwànyì cyà mwoyi wà nyama bwalu yéyè wàkenjiibwa cintu kampàndà mu mulongo wà nyama, bwalu aci civwa mmudimu wèndè bwà kulombola nyama.

67 Kàdì wèwè muumùshe Nyumà Mwìmpè munda mwà muntu, mmushààdile menemene kutàmba nè nyama, mmubiipe kutàmba nè nyama. Aci's ncintu cikolè bwà kwamba. Kàdì angàtà muntu udi kàyì mufùkulula mu meeji èndè, kàyì nè Nyumà Mwìmpè bwà kuludika meeji èndè to, nè—nè bintu byà mùshindù awu, mmufwànyìne kuumusha mwànà wa mu dibòkò mu mabòkò à maamù nè kunyangila maamù ewu buumùntù bwèndè ku bukolè bwà lukùkà lwà bunyama alu. Aci's mmwòmò menemene.

68 Mukàjì kampàndà udi kàyì mwìmpè to. Angàtà dishinà dyà ngulube wa kale anyì mbwa mukàjì wa kale, tudi bayiinyike mènà à mishindu yònsò bwà...Kàdì bwà bìdì bitàngila disangila dyèndè nè mulùme didi ànu bwà kupeta twànà twèndè, nè dishinà dyà ngulube mbwa twànà twèndè atu, kàdì mukàjì mwenzàvì udi kàyì nè mushinga to ùdì ànu mùdì. . . mmukooyike ànu díbà dyònsò. Ncyà bushùwà. Pa nàнку vùlukààyi nè,

wèwè udi. . . kùyi nè Kilistò to, nsòmbelu webè ùdi. . . ùdi mwà kupwekelela panshi kupita nè wa kabwà. Ncyà bushùwà.

<sup>69</sup> Kabyèna bikèngela bwà mbwa kwikalayè ùvwàla bilàmbà bwà kudibwikilayè to, nyama mukwàbò nànsha umwe. Úvwà mmuntu wàkadishinda, kí mmwoyi wà nyama to. Kàdi, mwoyi wà nyama bu mùdìwu mwînshì mwà muntu (mwoyi wà muntu), ùvwà ùwùkòòkela bwalu muntu ùvwà mulombodi wendè nè mulombodi wendè wa kumutù. Nè nyama yònsò wa mu mpàta ùdi nè bwòwà bwà muntu.

<sup>70</sup> Muntu kampàndà ùvwà ùnkonka, musangu mukwàbò, pa bìdi bitàngila diya dyà mu bulembi nè: “Utu umvwa bwòwà mu bulembi anyi?” Mòna’s, nyama yònsò utu mufùkìibwe ùtu nè bwòwà bwà muntu, bwalu aci cidi nè cyà kwikala ànu kacya ku cibangidilu kwàka. Nwamònu anyi? Ncyà bushùwà nè ke mùdìbi. Wèwè munyeemè yèyè ùdi ùnyeema wènda ùkulonda, ncyà bushùwà, kàdi, mbwa anyi cyònsò cinùdi baswè aci. Èyo.

<sup>71</sup> Kàdi mpindyewu, mònaayi mpindyewu, muntu awu pàakafikàye mwaba ewu. . . Mpindyewu tàngilàayi, apa. . . Wèwè udi wamba nè: “Mpindyewu, kàdi bìshi bwà bwalu abu mpindyewu, Mwanèètù Branham?”

<sup>72</sup> Mpindyewu, apa nudi nudìmwèna Nzambì ànu menemene, nè pankaci pàà ba-Unitaires nè ba-Trinitaires nenumvwè cintu aci ànu mùdìci menemene mpindyewu. Mpindyewu tàngilàayi’s! Pàakaditùnkumunà Nzambì, ùDivùngulula, uDivungulula mu buloba too nè mwàkalwàYe kùdi muntu ewu. Mpindyewu, muntu kàvwa mwenzè mpèkaatù mu nyumà wendè to, kàdi mu mubidi wèndè, dyalakana, lukùkà. Pashiishe pààkenzàye mpèkaatù, wàkaditàpulula nè Mufùki wendè. Ke pashiishe Nzambì, Logos awu, Mufùki mwinè wa yèyè awu, kùtùùlukayè nè kwenjiibwayè mu cimfwànyì cyà muntu. Muntu wàkenjiibwa mu cimfwànyì cyà Nzambì, nè pashiishe wàkavwijibwa mu cimfwànyì cyà nyama wa lwonji, ke kudishindayè. Nènkù Nzambì wàkatùùluka mu cimfwànyì cyà muntu, mu Muntu Kilistò Yesù, bwà kutwàla dikènga. Nzambì kàvwa mwà kutwàla dikènga mu Nyumà to. Mmunyì mùvwàYe mufwànyine kutwàla dikènga dyà mubidi mu Nyumà? Kàvwa mufwànyine kucyènzà to. Pa nànkù Nzambì wàkaDivùngulula nè kwenjiibwa mu cimfwànyì cyà muntu, bwà kupikula muntu uvwa mujimìne awu. Nwamònu anyi?

<sup>73</sup> Nè pashiishe Nzambì wàkakènga mu mubidi. Timòtè wa Kumpàlà 3.16: “Kakùyi dikokangana to,” mbwena kwamba nè makokyanganyi, “bwalu busokoka bwà difwàna dyà Nzambì mbunène. Bwalu Nzambì wàkamwèneshiibwa mu mubidi, mumòna kùdi banjèlò, muyiishiibwe, kùdi bàà Bisamb-. . . nè wàkiitabuujibwa, nè wàkangaciibwa ku dyàbalùmè dyà Taatù.” Ncyà bushùwà anyi? Nzambì Yèyè mwinè wàkatùùluka nè wàkasòmbela mu mubidi wà buntu nè wàkatwàla diteeciibwa. “Nzambì ùvwà munda mwà Kilistò, ùpungisha bàà pa buloba

nè Yèyè mwinè.” Nudi numòna cidì dinanga anyi? Dinanga dyà Nzambi’s!

<sup>74</sup> Mpindyewu, mpindyewu, ndi ngèèla meeji nè aci ncifwànyine kwangata, *mulùme* nè *mukàjì*. Mpindyewu, mukàjì ùdi. . . Lekèlaayi ngàmbe eci bimpè menemene mpindyewu, bwà nwamòna mwà kucimòna, nwamònu’s. Mukàjì ùtu ùkòòkela bàyendè. Nè Bible mmwàmbè nè “Bivwa bikèngela bwà mulùme àkòòkeshè mukàjèndè.” Kàdi mùshindù mwinè wùkaadìbo bashintùlùle aci’s wè! Mukàjì ùdi ùkòòkeshà mulùme nè: “Mpindyewu, udi ushààla kumbèlu, John! Kwènà uya to!” Nènku aci ncikòse bwalu: “Èyowà, munanga wanyì.” Nwamònu anyi?

<sup>75</sup> Kàdi lekèla nkwambilèku cintu kampàndà, mukalenge. Nebikengelè bwà wèwè kulumbulula bwà mukàjèèbè, kàdi mukàjèèbè kààkwikala nè cyà kulumbulula bwèbè wèwè to. Wèwè udi mfùmù wa mukàjì, nè Nzambi ngudi mfùmù wa mulùme. Ki bwà cinyi Yèyè wàkamba nè: “Mulùme àkosè nsukì yèndè bwà Kilistò. Nènku mukàjì ìkalè yèyè nè nsukì yèndè, bwalu yèyè mukòse nsukì yèndè ùdi ùfwisha bàyendè bundù.” Nwamònu anyi? Nudi numòna cìndi njinga kwamba aci ku cidì Mifùndu yàmba anyi?

<sup>76</sup> Mwà nè lwà lukolè menemene pa cyòci aci, ditùkù adi mu Shreveport. Bàvwa bààkula bwà bakàjì, nè bivwa bikèngela bwà bakàjì kwikalabò nè nsukì mile. Ke mèmè kwamba nè: “Mukàjì udi mubebùle nsukì yèndè awu, bàyendè ùvwa nè bukenji nè bukenji bwà Bible bwà kushipa nèndè dibàkà.” Ncyà bushùwà. Ke cidì Bible wàmba ncyòci aci. Ncyà bushùwà menemene. Kaa, ekèlekèle! Bakàjì bàdi nè Nyumà Mwimpè basòmbe mwaba awu, ng’ànù mùshindù wùvwàbo balongeshiibwe’s, ke cyònsò cidìku. Nwamònu anyi? Ànu, aci’s ncilekelela cìya.

<sup>77</sup> Yèyè nè: “Mpindyewu, bu bôbò mwà kuyikòsa, kwòkò cintu kampàndà cipampàlamùke civwà cikèngelà bwà kukòsabò nsukì yàbò,” yèyè nè: “mulekèlaayi àngatè kapaaya àyikungùlè yònsò,” nè àkosè nsukì yèndè too nè panshì pàà mutù, too nè mwàlwàyi kusasa mu mutù mwèndè amu. Ncyà bushùwà. Ke cidì Mifùndu myàmbè ncyòci aci. Yidi yàmba nè: “Yèyè mukòse nsukì yèndè, ùdi ùfwisha bàyendè bundù. Nè mukàjì udi ufwishangana bundù ùdi nè bukenji bilondèshile mikenji bwà kwipaciibwa ku dibàkà nè kushipabò nèndè dibàkà.” Kàdi, mulùme kèna mwà kusèlangana cyàkàbìdi to, mpindyewu. Kàdi yèyè—kàdi yèyè udi mwà kumwipata ku dishipa dibàkà. Ncyà bushùwà. Aci’s m’Mufùndu. Kàà mwanèètù, cidì citùkèngelà mmalòòlò kampàndà à kwela nkonko! Ncyà bushùwà. Ke Kolintò wa Kampàlà nyèyè awu, nshapitá wa 14, panwikalà baswè kuMubala. Èyo. Mpindyewu, aci—aci. . . Mpindyewu, mukàjì ewu. . .

<sup>78</sup> Nzambi—Nzambi wàkafùka muntu mulùme, mulùmè nè

mukàjì. Nudi numòna cyàkenzàYe anyi? Yéyè wàkenza muntu awu. Yéyè wàkenza. . .Mpindyewu, ke lukonko lwà kumpàlà alu, nwamònu's: "Yéyè wàkabàfùka," nè bikwàbò, Genèsè 1.26. Genèsè 2.7: "Yéyè wàkabènza nè lupwishi lwà buloba nè wàkapwidija mu mimpèmpè yèndè."

**Ndishìilangana kaayi, anyi—anyi mpenyi pàdi dipetangana mu Mufùndù ùdi kuulu ewu? Ndipetangana kaayi didi naadi muntu wa kumpàlà nè muntu mwibidi?**

<sup>79</sup> Muntu wa kumpàlà ke muntu mwibidi mumwènèshìibwe mu byumvwilu bitaanu. Nwamònu anyi? Mpindyewu mene kwèna mwà—kwèna mwà kulenga Nzambi nè byanza byèbè mùshindù *awu* to, kwèna mwà kumòna Nzambi nè mèsù èbè to. Yéyè kààkakùpèèshaci bwà wèwè kwenza nàнку to. Wèwè udi. . .

<sup>80</sup> Nukààdikù kacya bùmvwè munsantu wa kale ùpunga nè lufù anyi, pàdiye wàmba nè: "Maamù nyéyè wàwa, ncitu mumumòne to kùkaadi bidimu anyi?" Nukààdikù bumvwè aci pàvwà bantu. . .? Nwamònu's, mmùmwè nè, aa mèsù àdi ènda àbwicidila nè mèsù matàmbe-mfùkilu àdi ènda àlwa. Nwamònu anyi? Nè pashìishe misangu mikwàbò twètù, pàdi Nzambi mwà kwenza nàнку, tudi tumòna bikèènà-kumòna mwaba wùdi dísù dyà mubidi adi dìbwicidila. Ànu kumpàlà kwètù mene, tudi batàngile ànu buludi, nè kùdi cikèènà-kumòna kumpàlà kwètù ciikàle cileeja bintu bitàmbe-mfùkilu byà Nzambi. Nudi bumvwè cìndi njinga kwamba aci anyi?

<sup>81</sup> Pa nàнку dìbà adi, tàngilàayi: "Pàdi tabernacle wa pa buloba ewu. . ." Mpindyewu, bàmwè bàà kunùdi nwènù bakàjì nè balùme bàdi mwab'ewu nukàadi nwenda nukùlakaja. Tàngilàayi: "Pàdi wà buloba ewu. . ." Ndi mvùluka papa mununu wàwa, wa bidimu makùmi citèèmà nè bibìdi. "Pìikalà ntentà wa pa buloba ewu munyanguke, kùdi muntu wa nyumà, mubidi wà nyumà mutwìndìle wùdi kawùyi mwà kubùtuka to." Nènùmònèmu. Nèndwè kunùdi. . .

<sup>82</sup> Ncyèna mwà kulengaku Mwanèètù Neville mu—muulu mwàmwa to, bwalu Yone wàkabàmòna nè bàvwa misùùkà mwìnshì mwà cyoshelu, bèèla mbilà nè: "Too nè dìbà kaayi, Mukalenge, too nè dìbà kaayi?" Nudi bamanyè nè mbwà cinyi, tudi bapicile mu Bwàkabuulwibwà. Nè mùmvwè nè mwómò amu bààkajinga bwà kwalukila nè kuvwàla mibidi yà cifwàkà. Bàvwa bèèla mbilà nè: "Too nè dìbà kaayi's, Mukalenge?"

<sup>83</sup> Mpindyewu, bàvwa bamanyàngàne muntu nè mukwèndè, kàdi kabàvwa mwà kuyiikila nè kulabulangana ku cyanza to, anyi, ndi ndifwànyikijila nè bàvwa bafwànyine kuyiikilangana, kàdi kabàyi mwà kulabulangana ku cyanza nè bikwàbò to. Cimfwànyì ncyôci eci bwà kucijaadika. Cikondo cìvwà mwamùlopò wa mu Endò awu muzàngùle nyumà wa Samwèlè aci, ke Shawùlà kumutàngilayè nè yéyè kujingulula nè ùvwa Samwèlè. Ke Samwèlè kujingululayè Shawùlà nè kwambayè

nè: “Wàmbiikidiji bwà mèmè kupàtuka mu diikisha dyànyi bwà cinyi, pa kumòna nè wêwè ukàadi mulwè mwena lukunà wa Nzambi nè Nzambi mwinè’s muumùke kùdi?” Mmwômò anyi? Ke mukùlumpe Samwèlè awu mwimàne muvwàle mùzàbi wendè wà mupròfetà awu, ke kumutàngilayè. Ùvwa muvwàle nkooci.

<sup>84</sup> Mwamùlopò awu wàkamumòna nè wàkapòna panshi, kwambayè nè: “Ndi mmòna nzambi yipàtuka mu buloba.”

Yèyè nè: “Udi muntàcisha bwà cinyi?”

Ke yèyè nè: “Èè, ndi muswè kumanya mwikalà mvità nè cyà kuya.”

<sup>85</sup> Yèyè nè: “Màalabà neufwe mu mvità,” nè bânà bèndè bàà balùme bàvwa nè cyà kufwà, “nè pa dîbà edi màalabà dilòòlò newikalè naanyi.” Nwamònu anyi? Mpindyewu, yèyè ùvwa mumanyè, nè ùvwa nè mmwènekèlu ànu uvwayè nendè pànu pa buloba awu, kùdi mwamùlopò uvwa mwimàne awu, mumutàngile, nè Shawùlà.

<sup>86</sup> Mpindyewu, mònaayi. Misangu yàbúngi. . . Kàdi bishi bwà Papa anyi Mwaamù pàvwàbo bàpunga nè lufù nè bamòne bananga bààbò biimàne mwaba awu? Bàakabàjingulula. Kàdi mmu mubidi mutàmbe-mfùkilu.

<sup>87</sup> Kàdi mpindyewu ke luseke lwà butùmbi ndwòlò elu. Pa dyalukila dyà Yesù ku dibiiikà dyà ku lufù, kacyakwikala mubidi awu to. Mubidi awu dîbà adi, kampàndà mutàmbe-mfùkilu uvwa Nzambi mufùke ku cibangidilu awu, wìkala mwà kwalukila pa buloba bwà kwangata mubidi mukwàbò, kî mmulela kùdi mukàjì to, kàdi mufùkiibwe kùdi Nzambi (Àlèluuyàh!), bwà kubènga kukulakaja anyi kwikala nè munyèngu, kùyikù nè nsuki yà mvyu ku mutù to, kàdi mwikalè mupwàngàne, bwà kashidi! Àlèluuyàh! Kaa mwanèètù, aci’s ncifwànyine kungeelesha mbilà mu dilòòlò dyà luuyà lukolè edi! Ncyà bushùwà! Kaa, “mùzàbi wà mubidi ewu nèngumacishè, nè kubiiika nè kwangata dikopo dyà bucimunyi dyà kashidi!” Ncinyi citùdì mwà kutàcishila mwoyi pa buloba apa?

<sup>88</sup> Ke ndongamu mujimà nyèyè awu mulàadika mwaba awu mene, mùshindù mwinè wàkamfùkà Nzambi ku cibangidilu’s. Ndi mulwè pa buloba apa, mwangàte kaaba kàanyi bu muiyiishi wa Èvànjeeliyò, anyi wêwè bu mulùme anyi mukàjì udi nè lupàndù, tudì nè mwoyi ku ngàsà wa Nzambi. Àlèluuyàh! Nè Nyumà umweumwe awu ùdi ùùmuka pànwapa nguvwakù kale ku cibangidilu awu. Nèngàalukilè ku dimanya dyà kumanya nè mvwa kaaba aka, (Àlèluuyàh!) nè pashiishe kwindila mwaba awu mwînshì mwà cyoshelu, mubènèshiiibwe bwà kashidi, mu diikisha. Nè pashiishe pàndì ngàalukila, ndi ngàngata mubidi wànyi mu cipidì cyàwù cyà citàmbe bwimpè, kumpalà kwà lufù kuwùtuatalù.

<sup>89</sup> Lufù lùdi lùkutuuta kwipacila ku bidimu makùmi àbìdì nè bìbìdì anyi makùmi àbìdì nè bisàtù, udi ubanga kudishinda.

Wèwè kucyèna muntu mulùme úvwà awu nè muntu mukàjì úvwà awu to, paanyimà pàà wèwè mumanè kufika pa bidimu bitwè ku makùmi àbìdì nè bitaanu, cintu kampàndà cìdì cibwela munda. Minyèngu yìbanga kweleka mwínshì mwà mèsù èbè. Kwènà mwà kwowa màyi mùvwà nè ciibidilu cyà kwowa amu to. Bidimu makùmi àsàtù, udi mwà kubimòna byàbùngi. Indilà too nè pawàfikà ku makùmi ànaayi nè binaayi, bu mèmè kùnu, nènku dibà adi ukàadi bulelèlèlè munkaci mwà kucimòna. Kàdi, Kaa mwanèètù! Anjì indilà too nè pangààpetà bidimu makùmi mwandamukùlù, makùmi citèèmà, nè mweyèmène ku dikombo aku, mwimàne mwaba awu. Ncinyi aci? Nzambì ùdi ànu muntèèke mu lùbilu kampàndà bwà kunyema. Kàdi dīngà ditùkù dyà butùmbi . . . Ke lufù lùdi lùbwela alu's.

<sup>90</sup> Kale wàwa mvwa nè makaaya malulàme, mvwa nè nsuki mifiike (nè mipàtàkàne mutù mujimà), nè kakùyìku minyèngù mwínshì mwà mèsù àanyi to; kàdi ntàngilaayi mpindyewu, ngènda nkòbama, makaaya makòbàma, ngènda ndyunda, nè minyèngu mwínshì mwà mèsù àanyi, nè mutù dibàla. Mòna's, tàngilàayi cìdì lufù lungenzèlè munda mwà bidimu makùmi àbìdì bishààle ebi. Lufù ndùdì lwènza nànu. Indilaayi too nè pangààpetà bidimu makùmi mwandamukùlù, bu Nzambì mwà kungaanyishila bwà mèmè kwikala nè mwoyi, nè tàngilàayi mmwènekelu wùngikalè nendè, mwimàne mùshindù ewu mweyèmène ku dikombo dyà kale, mwikàle nzakalala mùshindù *awu* mwaba kampàndà. Kàdi, alèluuyàh, ditùkù kampàndà dyà butùmbi, lufù nelùjuulè bukuku bwàlù bwònsò. Pashiishe pangààbiikà mu dibiiikà dyà ku lufù nèngiikalè cimvwà aci, cìvwà Nzambì mungenzè pa buloba apa mu cipidì cyànyì cyà citàmbe bwìmpè, mu mubidi kampàndà kawùyì mwenza kùdì Mándàmù Branham nè Mukalenge Branham to, kàdi mufùka kùdì Nzambì Yèyè mwinè; musùlùdìibwe ku diteeciibwa, musùlùdìibwe ku mpèkaatù, musùlùdìibwe ku cintu cikwàbò kanà cyònsò, kacya kabiyìku bikèngela bwà kupeta disaamà, disaamà dyà mwoyi to. Kaa, ekèlekèlè!

<sup>91</sup> Dìbà adi nènkwatè mukàjàanyi mukèsè awu ku byanza nè nèmpwekè ngènda mpìcila mu Mpalàdiizù wa Nzambì mùshindù awu, cyàkàbìdì. Newènzè cintu cimwècimwè aci. Kaciyi mukàjì mukùlákàje wa mvya ku mutù ùdi wenda wendesha dilòdòlò edi to, umubiikila nè mmukàjèèbè awu to, kàdi yèyè neikalè mulenga ànu mùvwàye ditùkù diwàkamusèlè ku cyoshelu adi. Àlèluuyàh! Yoyóyò! Aci's ncikùmbàne bwà kwelesha muntu mbilà's, kì mmwómò anyi? Nwamònu anyi?

<sup>92</sup> Èyo, ke dipetangana ndyòdì adi. Nzambì mmupàngàdike. Pàdì Nzambì Upàngadika bwà kwenza cintu kampàndà, cidi nè cyà kwikala nànu. Sàtaanà wàkanyangakaja cimfwànyì eci ku dijinga dyà disangila dyà mulùme nè mukàjì, kùdì mukàjì, bwà kulela bānà. Wàkacinyangakaja. Nànu tūngunukàayi nè cyeenzaayi, mbimpè. Cisòmbelu eci mbwà twètù kwangata eyi

nùnkù, bwalu cintu cimwèpelè cyùdi wenza mu nsòmbelu ewu cidi kwàmbula mmwènekèlu webè nè cimfwànyì, cyùdi aci. Wèwè nè nsukì mikùnze mpindyewu, newikalè nè nsukì mikùnze díbà adi. Wèwè nè nsukì mifiike mpindyewu, newikalè nè nsukì mifiike díbà adi. Nwamònu's, cyúvwà mu cipidi cyèbè cyà citàmbe bulenga aci. Nènku bu wèwè. . . Sàtaanà kwimanyikayè fòtò awu, kùvwà nànsha mupetè. . . Cìvwà Nzambì mujingè bwà wèwè kwikala aci, ke ciwikalà. Kaa, byà butùmbi's wè! Ke muntu wenù nyéyè awu.

<sup>93</sup> Mpindyewu Genèsè 2. Ambà tǔng, bikèngela ndwijakajè, nényàngatè. (Udi nè cintu kampàndà anyi? Udi naaci anyi? Udi naayi anyi? Udi nè yitùdi nè cyà kwandamuna anyi?) Èyo, Genèsè 2.18-21:

**2. Nzambì wàkenzela Evà ku lubadi lwà Adàmà, mu Genèsè 2.18-21. Nzambì ngwákafùka mulùme nè bakàji, pashiishe kwenza Adàmà nè Evà—Evà anyi?**

**3. Nè Kaayinà wákaya ku bufùkì bwena diinà bwà mulùme nè mukàji bwà kwangatakù mukàjèndè anyi?**

<sup>94</sup> Mpindyewu, mpindyewu twǎnjibi. . . Neyèna. . . Muntu udi mufunde eci pámwápa ùdi kaaba aka. Mpindyewu, pàdi Nzambì. . . Mu lukonko lwà kumpàlà elu:

**Nzambì wàkenza mulùme nè bakàji, bàà mu Genèsè 2.18-21 anyi?**

<sup>95</sup> To. Ndi—ndi. . . bu—bu munwàmònà kaaba aka, 2.18-21 mpindyewu amu, mònaayi:

*Ke MUKALENGE Nzambì kwambayè nè: Kì mbìmpè bwà. . . mulùme kwikalayè nkààyèndè to; nèmwwenzèlè mumukwàcishi.*

*Nènku nè buloba MUKALENGE. . . kufwìmbayè nyama yònsò. . . nè bikwàbò.*

<sup>96</sup> Mpindyewu, Nzambì wàkenza Evà ku mukila ku lubadi lwà Adàmà. Mukàji leelù ewu ùdi nè lubadi lùmwè kupita mulùme mu mubidi nè mu difwìmbiibwa kupita mùdi naayi mulùme, bwalu lubadi lùmwè lwàkuumushiibwa ku mubidi wà Adàmà. Adàmà ùkaavwa mumanè kwenjiibwa nè ùkaavwa nè mwoyi, nè wàkadimòna nkààyèndè, ke pashiishe Nzambì kwamba nè: “Kì mbìmpè bwà mulùme kwikalayè nkààyèndè to.”

<sup>97</sup> Pa nànkù, baansaserdòsè aba, nè bikwàbò, bàdibo bàbèngela bukenji bwà kwikala nè mukàji, mpindyewu aci, èkèleeziyà wa beena Loomò udi mwà kwenza cyònsò. . . abu mbòbò, bòbò ke bàdi nè cyà kulumbulula Kwàka bwà bwalu abu, kí mmémè to.

<sup>98</sup> Èè, bàvwa bankonke kùdi mu—muntu kampàndà, àbidi àdi panshì aa, wàmba nè: “Udi wela meeji kaayi?” Nsaserdòsè kampàndà, kwambayè nè: “Udi wela meeji kaayi bwà nsaserdòsè wa citèndè awu mu cimenga emu wákaya nè mukàji awu, nsongàakàji awu, nsongàakàji wa mu Jeffersonville emu, kuyayè

kamusèla?” Mu èkèleeziyà wa ba-Irlandais, nudi bavùlùke’s. Ngápù nè dîna dyèndè mwoyi.

<sup>99</sup> Mémè nè: “Úvwa nè bukenji bwà kubwela mu dibàkà ànu mûndî naabù emu. Ke cîndî mémè ngèèla meeji menemene pa bwalu abu ncyôci aci.” Mémè nè: “Cintu cimwèpelè cîndî mukwàte. . . Ngèèla meeji nè yéyè mmwenzè bibi, ùvwa nè cyà kwikala muyè kùdî èkèleeziyà nè mulekèle mudimu wèndè nè pashiishe kuya kasèla nsongàakàjî awu, pamutù pàà kwenda kunyeema mùshindù awu.”

<sup>100</sup> Mpindyewu, nudi bavùlùke pààkenzekàci kùkaadi ndambù wa mbingu kaaba aka mu Jeff. emu, nsaserdòsè wa Kàtòlikè wa ba-Irlandais lwà kwînshî eku. Yéyè’s n’nsongàalùmè wa citende, nè ùvwa nè cyà. . . ùvwa nè nsongàakàjî kampàndà munanga lwà kwînshî eku. Nènku pàvwàye. . . Bàakamupèèsha mulàmbù munène menemene wà dinanga, bàvwa nè cyà kushintakaja nèndè pàrwasè, kumutùma ku Indianapolis mwaba kampàndà. Nènku yéyè kwangata ànu mulàmbù wà dinanga awu, nsongàakàjî awu nè byonsò, è kuyayè kasèlangana, nè kacya ànu piinè apu kabàtukù bùmvwè bwalu bwèndè nànsha. Èè, yéyè’s ùvwa nè bukenji bwà kusèlanganayè, kàdi kàvwa nè bukenji bwà kwenza nànkù to. Kabivwa bikèngela bwà kwikalayè mwenzè aci to. Bivwa bikèngela kwikalayè muyè kùdî—kùdî èkèleeziyà mwàmbè nè: “Mònaayi, ndi ndekela mudimu ewu bu nsaserdòsè. Ndi nkabwela mu dibàkà, nè aci’s civwa cikòsa bwalu.”

<sup>101</sup> Kàdi, mpindyewu, Nzambî munkaci mwà kwenza Evà, nè—nè Adàmà nè Evà musangu wùmfwèwùmfwè awu, cintu cimwèpelè cyàkenzàYe civwa citàmbe-mfùkulu, Adàmà wa nyumà nè Evà wa nyumà, mulùme nè mukàjî. Pashiishe, pààkenzàYe. . . kutèeka Adàmà mwab’ewu, kabivwa bîmpè bwà. . . Nwamònu’s, ncimfwànyî cyà Nzambî civunguluka dîbà dyònsò. Byònsò byà mùshindù ewu, bìdî ànu—bìdî ànu bîpwèka, bìvunguluka ànu cyanàànà, bàpàtukila mu Bukalenge bwà bidimu cinunu mwàmwa nè bàbwela buludî mu Cyèndèlèlèlè. Ànu fòtò wa Nzambî ùdivungulula cyanàànà, Nzambî ùdivungulula Yéyè mwinè.

<sup>102</sup> Apa, Nzambî wàkaDimwènesha mu Kilstò Yesù, bwà kuleeja civwàYe. Yesù ùvwa cinyî? Muntu wa tunyinganyinga, mwibidilàngàne nè dibungama dikolè, wa dinanga. Kùdî ndumbà kampàndà awu nè: “Bàvwà bàkufùnda bèpi?”

“Ncyèna nè muntu nànsha umwe to, Mukalenge.”

“Nànsha Mémè ncyèna nkupìissha to. Ndàaku, kwènji kàbidî mpèkaatù to.”

<sup>103</sup> Mucyòke nè mupòyòyonge nè lwendu lwà kilòmèètà mitwè ku makùmi ànaayi nè mwandamukùlù ditùkù adi, mupicile mu nsenga yà mu cipèèla nè bikwàbò; kùvwa mukàjî wa mu Nayinà wènda upàtuka; nè mwanèndè umwèpelè wa balùme,

mufwè, mulàadika mwaba awu. KwimanyikaYè milongo yà bantu yìvwà nè citàlù ayi, kumutentekelaYè byanza, wàmba nè: “Biika.” Nènku nsongàalùme uvwa mufwè awu kubiiikayè ku lufù. Awu—awu’s m’Mukalenge wetù Yesù. (Twasàkidila, Teddy, mwanàanyi wa balùme.) Nènku mwaba awu, uvwa m’Mukalenge wetù Yesù. Kacya kàvwakù mutàmbe kucyòka, kàvwa mutàmbe kupòyoyonga bwà kwenza cintu kanà cyònsò cyà cimpè to. Èyo.

Mpindyewu cikwàbò cintu ncyòci eci:

**Kaayinà wàkaya ku—ku bufùkì bwà kumpàlà bwà mulùme nè mukàjì bwà mukàjèndè anyi?**

<sup>104</sup> Mpindyewu, ki lukonko lukolè lwèbè lwà ntwàng ndòlu elu, mpindyewu tèelejàayi nè ntèmà yònsò. Mpindyewu, kaa, ndi nè . . . nukàadi bamòne bantu bafùnda mu cibèjibeji nè: “Kaayinà wàkapetela mukàjèndè awu penyì?” Kaa, kale wàwa mwva ncyàmba.

<sup>105</sup> Nè kacya nciukù mulongèshe nè kùvwa ifernò wa ùlàkuka kapyà munda mwà bidimu bitwè ku binaayi paanyimà pàà dikùdimuna dyànyi dyà mucìma to. Bìvwa bìkèngela bwà mèmè kucimòna mu Mifùndu. Mèmè nciyi mumanyè to, ncyàkwambakù bwalu nànsha bùmwe to. Nwamònu anyi?

<sup>106</sup> Kàdi, mpindyewu: “Kaayinà wàkapetela mukàjèndè penyì?” Mpindyewu, aci’s ke di—ditaata dyà lukonko elu mpindyewu. “Nè Kaayinà wàkaya kùdì mukàjèndè ku difùka dyà mulùme nè mukàjì, bwà kupeta mukàjèndè anyi?” Nwamònu anyi? Mpindyewu, mpindyewu, lùmwe lwà ku ntwàdijilu . . .

<sup>107</sup> Màmàmù DeArk ewu, nwènù bònsò nuvwa bùmvwè bwà dyondopiibwa dyèndè dilòòlò adi, mwàkamubèneshà Nzambi nè dikwàbò byònsò. Uvwa mulàadika, upunga nè lufù, balwè lwà pa dìbà ibìdi jaajaaja wa dindà.

<sup>108</sup> Nè pa nànkù, mpindyewu, mùshindù awu ke wungàakalwà . . . Mwanèndè wa balùme, George, nsongàalùme awu uvwa cilumbù, Ed, yèyè pènde. Bàvwa mu makàjiinyi, ke mèmè kuumvwa dikòkangana lwà paanyimà apu, nè nkwepi kùvwà wa kumpàlà . . . nkwepi kùvwà Kaayinà mukapetèle mukàjèndè. Èè, ewu uvwa mwangàte díyi awu kumwèkayè bu uvwa nè bitàmbe bwimpè byà kwamba, yèyè nè: “Ndi nnwàmabila mwaba wùvwà Kaayinà muwetèle mukàjèndè,” yèyè nè: “Kaayinà wàkaya kasèla nsokò mukàjì munène wa katankù.” Ke yèyè nè: “Ku yèyè nsokò mukàjì aku ke kùdì kupàtùkile cisà cyà bafiike.” Yèyè nè: “Tàngilàayi nè mutù wà muntu mufiike mmwenzè bu mupingàne paanyimà mùshindù awu, bu mùdì nsokò amu, lwà ku mutù eku.”

<sup>109</sup> Èè, mèmè kwimana mwaba awu, mwva ànu nè ngondo mitwè ku yibìdi cyanààna mu Èvànjeeliyò. Mèmè nè: “Ncyèna muswè kupangakana neebè to mukwètù, bwalu nciut mulongi to, ndi ànu mfùminakù ku disùngidiibwa. Kàdi,” mèmè nè: “bu byòbì mwà kwikala mùshindù awu, nùnkù’s cisà cyà bantu bafiike

cìvwa mwà kwikala kacìciyìku to pàvwà kabùtù kàà mvùlà yà Noà, pààkabùtudiibwà buloba ku màyi apu, bwalu Noà nè dìkù dyèndè bàvwà ànu bôbò nkààayabò bàvwà mu bwàtù amu. Bôbò nkààayaabò ki bàvwà mu bwàtù amu. Nùнку cisà cyà bafiike aci's ncifwànyine kwikala kacìciyìku to," mèmè nè, "bu byôbi mwà kwikala nàнку." Mèmè nè: "To, mukalenge! Cisà cyà bafiike aci kacýàkafùminakù kuntwàka to. To, mukalenge. Cisà cyà bafiike aci ncifùmìne ku mucì wùm>wè>wùm>wè wutùvwà bapàtùkile awu, nè muntu yònsò ewu, mucì umweumwe awu." Kakwèna dishiilangana to. Menemene. Tudi ànu bònsò...Umwe ùdi mwà kwikala wa kàlaabi, nè mukwàbò mufiikùlùke, mukwàbò mufiike, nè mukwàbò mutòòke, nè mukwàbò wa cisengàsengà, nè mukwàbò ewu mukùnzè, nè ànu mùshindù awu, kàdi nudi bafùmìne bònsò ku mucì wùm>wè>wùm>wè awu. Aci's cìdi ànu citùpà cyà mubidi kaaba aka. Ncyà bushùwà. Wèwè udi muntu ànu umweumwe awu, mufùkiibwe apa kùdi Nzambi.

<sup>110</sup> Nèнку mpindyewu, mònaayi, mwab'ewu ànu àbìdi àdi panshì aa, mvwa mwimane mwab'ewu nè bangàngàbukà kampàndà mu Louisville, Mwva ngàakula bwà mu Àfrikè mwàmwa mùshindù wùdì bantu bapèlè abu, bàdi bàà minyìnyi yà bantu abu, nangàngà, mùshindù mwinè wùvwàbò nè muntu mukàji kampàndà mwaba awu, wàkangata mwànà mukèsè wa mu dibòkò, wàkapeta mwànà mukèsè wa mu dibòkò, nè—nè ùvwa mumutuutè mùshindù awu kàdi kumuswìka kumulembeleja mu kiitwitu nè kumulekela ùbola munda mwà ndambu wa matùkù, nudi bamanyè's, too nè mwáfukàye kumpàlà kwà kumudyabò, nudi bamanyè's. Cintu kanà cyònsò mùshindù awu, bàdi bàcìlekela cìbola ndambu, cìmungutuka.

<sup>111</sup> Kanwèdi meeji nè mbitàmbe kukola bwà bìdi bitàngila bàdi bàà minyìnyi yà bantu abu. Mu Angleterre bàdi bènza cintu cìmwècìmwè aci, bàdi bàshipa nyuunyi yà tukàngàlàkàngàlà twà diitu nè bayikùdika ku micì, bwà nè pàdì ànu masalà àayi àtùuka díbà adi ke kushìsha kuyìdya. Ke cisà cìdi cìlelè ba-Anglo-Saxons ncyôci aci, mu Angleterre. Ncyà bushùwà. Nèнку kanwèdi meeji. . . Kabyèna bikèngela bwà nwènù kuya mu Angleterre to, pweka wèwè ànu mu matùngà à ku sud eku, nèupètè cintu cìmwècìmwè aci. Cyà bushùwà's. Muntu kanà yònsò udi mufwànyine kudyà dilàndi anyì—anyì nyòkà wa nkànga, ùdi mwà kudyà cintu cikwàbò kanà cyònsò. Pa nàнку. . . Eyowà's.

<sup>112</sup> Mpindyewu mònaayi, lekèlaayi—lekèlaayi nnwàmbilè. Kàdi, cyàkenzekà ncyôci eci. Cisà cyà bafiike. . . cisà cyà—cyà bafiike aci kacýèna nè bwalu mu bùdi panshì ebu to. Kaayinà. . .

<sup>113</sup> Mpindyewu, ndi muswè nùtàngilè. Bàvwà bàmbè nè "Yèye wàkaya ku buloba bwà Nod." Mpindyewu, Kaayinà ùvwa mu Edènà. Nè Edènà, budimi bwà Edènà, bùvwa ku esètè kwà Edènà. Ncyà bushùwà anyì? Budimi bwà Edènà bùvwa nku esètè mu Edènà, luseke lwà ku esètè kwà Edènà. Nè Bakèlùbà

bàakatèekiibwa, nè Muci wà Mwoyi wùvwà ku ciibi cyà ku esètè cyà budimi, nè mwómò amu ke mündi mémè ngèèla meeji nè ke mwaba wàkafidilà Kaayinà nè Abèlè mulàmbù wàbò. Nènku mwaba awu ke wùvwà Mukèlùbà mwikàle nè mwelè wà mvità wà wùlákuka kapyà kawùyì mufwànyine kubàlekela bàbwela kàbìdi to, ku esètè kwà ciibi aci!

114 Nukààvwakù bamòne nè, Yesù neáfuminè ku esètè. Bukènkè bùdi bùjuukila ku esètè. Bintu byònsò bilwalwa . . . Dishidimuka dyàkabangila ku esètè nè dyènda diya ditàngile ku wesètè, too nè mùdidi dìnyùnguluka nè mùdidi dikafika pa mwaba wàdi wà mbangilu kàbìdi. Twètù tudi bàà ku cibadi cyà buloba cyà ku Wesètè. Abu mbàà ku Esètè, beena ku Esètè ke dishidimuka didi ditàmbe kwikala dyà kale. Chine s'ke dishidimuka dyà kale menemene didi dimanyìke, kùdi balongi bàà maalu-malonda, pa buloba bujimà leelù ewu. Esètè!

115 Kaa, mùshindù mwinè wutùvwà mwà kunènga pa nkonko eyi munda mwà mèbà, pa lùmwè's, kàdi kabivwa mwà kwikala bikumbàne to bwalu kùdi mikwàbò. Kàdi mònaayi, kùdi. . . Mbanganyi bàdiku baswè kumanya citùdi twitabuuja bwà Kaayinà, mpenyi nè nganyi uvwa mukàji wa Kaayinà? Tùmonèbi. Èyo. Nènnwàmbilè cidì Kaayinà mwenzè, nè ke dyandamuna dimwèpelè dyà meeji dyùdi mwà kudifwànyikijila adi: Kaayinà wàkasèla mwanàabò wa bakàji sungasunga. Yèyè ùvwà nè cyà kumusèla, bwalu kùvwà ànu mukàji umwèpelè pa buloba mu cikondo aci; Bible ùdi ùfila ànu bujaadiki bwà bantu bàsàtù bààkalediibwà, Ham, Sem. . . anyi kí. . . Mfwilaayikù luse, ùvwà n'Kaayinà, Abèlè, nè Setè. Kàdi bu nè kakùvwakù. . . Bible ùtu ùtèèla ku mpùükàmpùükà menemene dileidiibwa dyà mwànà wa bakàji. Nudi bamanyè nànkù.

116 Mpindyewu, ncyà bushùwà nè ndi mbùndulangana nè bakàji dilòòlò edi. Kàdi, tàngilàayi, bàà pa buloba bàdi bàkuukwila bakàji, kàdi bakàji bàvwa cyamù cyà mudimu cyà dyabùlù ku cibangidilu. Nènku wa mubi leelù ewu ke cyamù cyà mudimu citàmbe bwìmpè cidìye naaci. Yèyè neàtumè bayiishi bààbùngì mu ifernò kutàmbe binwìnù byà maalà à kapyà byònsò bìdiku pa buloba ebi. Kakàji kakesè kàà mwísù muumisha kiikàle nè mucì wà mfwankà ku mishìku, nè nsukì yààkò mikòsa myenza mvwàngalà mùshindù awu, nè nkòfyà minène mìle yìdi yìpòdyà yìbànda yìpweka, mwanèètù, kakesè. . . kàmwèka kàà mbùngakeenu mulenga, tàngilàayi cyènzàku.

117 Muiishi, mbìmpè ùdìbwikilè wèwè mwinè nè Mashi à Yesù Kilistò. Ncyà bushùwà. Mpindyewu, kùngambìdiku to, nwènù nudi bantu balùme! Nkààdi mumònèmòne byàbùngì byà ku byòbi. Mpindyewu, tàngilàayi kùneeku. Cintu cidì citàmbe bwìmpè cyà dyenza nkulama meeji èbè matèèkela pa Yesù Kilistò nè meeji èbè ikalè makezùke.

118 Bu mwàkamba Pòlò mwómò amu, wàmba nè: “Cidì. . . Tudi

bamanyè nè tudi nè bukolè bwà kulombola mwanèètù wa bakàji. Ndi nè bukolè bwà kucyènza, kàdi” yèyè nè “ncyàkucyènza to.” Nwamònu’s, yèyè kàvwa muswè kucyènza to. Yèyè nè: “Ndi mumanyè nè mudimu wà bwambi ùvwa nè cyà kwikalakù ku wabò—wabò . . . Kanùswiki mishikù yà ngombe udi ushipula ntete to.”

<sup>119</sup> Nudi bamanyè’s, tutu misangu mikwàbò twela meeji nè, bwalu tudi bayiishi . . . (Kí ngwèwè nè mèmè to, ncyèna ngamba nànkù to, mwanèètù.) Kàdi bayiishi bàdi bèèla meeji nè bwalu bóbò mбайиishi nè—nè bàdi muntu kampàndà munèna kutàmba bidimba byà beena kwitabuujà bàà èkèleeziyà. Kwèna mutàmbe bunèna nè ku mèsù kwà Nzambi kwèna mutàmbe kanwàyì udi mukùdimùne mucìma kùkaadi díbà dímwè to.

<sup>120</sup> Ke cintu cìmwèpelè cìdi dilongolola kadiyikù dikezùle to, bìvwa mbintu ebi. Ndi mumanyè nè ndi mfùnda dína dyànyì nè “Révérend.” Aci’s mmwómò menemene, aci’s cidi ànu cì—cìlèlè cyà leelù ewu, kàdi kabívwa bìkèngela bwà kwenjiibwaci to. “Révérend” nè “Mwèpiskòpò” nè “Docteur” nè bintu byònsò abi mmyànzu myenza ku byanza byà bantu, nè yòyi ayi’s ndukutukutu! Mu Bible bàvwa “Peetèlò,” “Yakòbò,” “Pòlò,” “Yone,” nè bakwàbò bònsò abu.

<sup>121</sup> Pòlò mmwàmbe nè: “Mpindyewu, mwaba ewu, ndi mumanyè nè ndi nyiisha Èvànjeeliyò, aci—aci—aci’s mmudimu wànyì.” Mèmè ndi muiyiishi, yèyè mmuiyiishi, Mwanèètù Neville mmuiyiishi, kàdi cidi . . . Ke wètù mudimu ngwówò awu, ngwà kwikala muiyiishi. Èè, aci’s cidi ànu citùdi nè cyà kwenza. “Kàdi nganji ngènzèku cintu kampàndà,” mwàkambà Pòlò, “cìdi cipite apu.” “Mpindyewu, ndi nè bukenji bwà kwangata mfrangà,” mwàkambà Pòlò, “kàdi Nèngènze ntentà ànu bwà kunùleeja nè ndi mwà—ndi mwà kulàmbula.” Yèyè nè: “Mbyà kuneemekiiibwa, dibàkà ndyà kuneemekiiibwa munkaci mwà bònsò, bulààlu kabùyì bukooyisha to. Mbìmpè bwà muntu mulùme kusèlanganayè.” Yèyè nè: “Ndi nè bukenji bwà kusèlangana. Mpindyewu, ndi—ndi mwà kusèlangana, ndi nè bukenji bwà kwikala musèlangàne. Kàdi ncyàkusèlangana ànu to, ndi muswè kufila mulàmbù mukwàbò kùdi Mukalenge.” Nwamònu anyi? Pashiishe kwambayè nè: “Muntu yònsò mmumanyè dibìikila dyèndè. Mulekèlaayi yèyè ènzè mùdi . . . Bàmwè mbatungula bwà bwalu bwà Dìyì dyà Nzambi, nè bikwàbò.”

<sup>122</sup> Tudi baswè kwenza cintu kampàndà dyàmwàmwà dyà mudimu wètù. Nènku pawikalà bulelèlè mulediibwe cyàkàbìdì ku Nyumà wa Nzambi kàdi wamba nè: “Èè, mmudimu wànyì bwà kuya mu èkèleeziyà, ngèèla meeji nè nebikèngele bwà nye.” Kaa, èkèlekèlè! Èè, ndi muswè kwenza byàbùngì kutàmba abi, ndi muswè kupeta misùùkà ndambù bwà Kilistò. Ndi muswè kwenza cintu kampàndà! Ndi muswè kukùmbula babèèdi anyi kuMwenzela cintu kampàndà. Mmudimu wànyì bwà

kuyiisha ku bitàlu, mmudimu wànyì bwà kuyiisha Èvànjeeliyò, mmudimu wànyì bwà kusambidila babèèdi. Lekèlaayi ngenzè cintu cikwàbò, lekèlaayi mpàtukè nè nkenzè cintu kampàndà mwaba wikalà Nzambi mwà kumpà bunème ku cyôci aci.

<sup>123</sup> Mpindyewu, twàlukilaayi kùdi Kaayinà. [Katùpà kàà mukàbà wà méyi munda mutupù—Muf.] Bwalu Evà nguvwa mukàji umwèpelè wàkafùkiibwa kùdi Nzambi, nè yèyè kàyi nè bânà bàà bakàji to, pàakafwà mukàji wa ndekeelu awu (mukàji umwèpelè awu), nunku bukwbàntu's mbulekèle kwikalakù. Ncyà bushùwà anyi? Kakùvwa kufwànyine kwikala bakwbàbò bakàji to. Pa nàнку bivwa bikèngela kwikalayè nè bânà bàà bakàji. Ke Kaayinà kusèlayè mwanààbò wa bakàji sungasunga, bwalu bivwa bikèngela bwà yèyè kumusèla, kakwèna mungà mwaba wà bakàji kufùminabòku to.

<sup>124</sup> Nè bivwa bikùmbànàngàne nè mikenji nè bilonda mikenji mu miinè matùkù awu, nànsha bwà Abraham, nè too nè ku Izàkà. Izàkà wàkasèla mwanààbò wa bakàji wa tatwèndè mukwbàbò sungasunga wa mashi àmwè. Nè Abraham kusèlayè mwanààbò wa bakàji sungasunga, mwanààbò wa bakàji wa mu mashi. Tatwèndè wa . . . Mbaamaamù bashiilàngàne kàdi taatù umweumwe awu. Nè civuba cidi cìpàtukila mu mubidi wà bulùme. Sarah, yèyè wàkalela Izàkà mulenga wa dikèma awu. Ncyà bushùwà anyi? Kakùvwa muntu nànsha umwe pa buloba dîbà adi to.

<sup>125</sup> Byònsò abi bivwa mu cifwànyikijilu, bileeja nè . . . S'ki cyôci eci, mwanèètù! Izàkà . . . Leebèkà ncifwànyikijilu cyà Èkèleeziyà, nè Izàkà ncifwànyikijilu cyà Mukàji—musèla, Kilistò. Ncyà bushùwà anyi? Nènku bàdi nè cyà kwikala nè bulongo bwà mu mashi! Àlèluuyàh! Amen! Bulongo bwà mu mashi!

<sup>126</sup> Pa nàнку Kaayinà wàkasèla mwanààbò wa bakàji, nè mbwena kwamba nè . . . Pashiishe kuyabò kabwela mu buloba bwà Nodà. Mpindyewu, tudi tubwela mu cyena bwalu cyà ndòndò bu twètù mwà kwikala bayè ntàntà, nè ndi nè disànka bu munùdi kanùyikù bankònkè kupita pa cyôci aci to, (bu mùdi: “Bantu bàà mfyondo bàvwà mu buloba abu ditùkù adi abu bàvwà penyì?” Josèphe nè bakwbàbò bashiilèshiiilàngàne bàdi nè makòkyanganyi àbùngì pa bwalu abu). Amen! Bu nè ncivwa mucyàndàmùne bìmpè to, mwanèètù, ùlwe naaci kàbìdi mu dyàlumingu mu dîndà. Èyo.

**4. Udiku mufwànyine kuumvwija mùdi dyàlumingu ditùkù dyà kumpàlà dyà lumingu nè diisambòmbò ditùkù dyà mwandamutekète anyi? Beena Kilistò batu bàya mu èkèleeziyà mu dyàlumingu, ditùkù dyà kumpàlà dyà lumingu. Kabìvwa bikèngela bwà kuyabò mu diisambòmbò, mu ditùkù dyà mwandamutekète dyà lumingu anyi?**

<sup>127</sup> Èè, mpindyewu, mulundà wanyì munanga, ní nganyì yònsò udi mwelè lukonko alu awu, alu ndukonko lwimpè lwà dikèma.

Ndukonko lwà kale lùdibo bàkòkanganapù munkaci mwà binunu byà balongi bàà leelù ewu, kàdi mvwakù mwà, nwènù ndekèlaayi mfilè wanyì mmwènenu, nudi numòna's, ke cyònsò ncìndì mwà kwenza. Nè mèmè nciyì mubingè to, èè, nwènù—nwènù nùntwàlèku, nè Nzambì àmfwilèku luse, nudi numòna's, mèmè—mèmè mucyenze bibi.

<sup>128</sup> Mpindyewu, bwà bìdì bitàngilà mikenji...Mpindyewu, pàmwàpa mmuntu wa ba-Adventistes du Septième jour udi musòmbe apa ewu. Aci cìvwa dilonga dyànyì dyà kumpàlà, òvwa dyà ba-Adventistes du Septième jour. Ncyà bushùwà. Cìvwa mba-Adventiste du Septième Jour, bangàakalongà dyàmbedi. Nènku pàakalwàbo kungambila nè “diisambòmbò òvwa nditùkù dyà mwandamutekète,” mwanèètù, aci's cìvwa bilondèshile kabala-matùkù kàà beena Yudà. Kàdi kabala-matùkù kàà beena Loomò kakàvwa kaciimànyike nànkù to, nè diisambòmbò mu bushùwà bwà bwalu òvwa nè cyà kwikala dyàlumingu. Èè, bàvwa bangiitàbuujje cintu kampàndà cìmvwa mwelè meeji nè cìvwa cijaalàme. Nènku pàmvwa ànu mbala mikàndà yàbò mvwa ànu mutwè ku cyàbò, lukàmà pa lukàmà, kàdi dīngà ditùkù mèmè kutwà cyanza pa Bible nè kumòna nè aci cìvwa cishilàngàne dībà adi. Nwamònu anyì?

<sup>129</sup> Mpindyewu, diisambòmbò nditùkù dyà nsabatu bilondèshile dilondangana dyà lumingu. Mpindyewu, katwèna bamanyè to. Cìvwa cishintùlùdībwe, nènku tudi nè bintu byàbūngi be bidìbo bashintùlùle mu ùshindù wà kanùyì mwà kumanya biinè bìvwà bishintùlùdībwe to. Nwamònu anyì? Bwalu tudi. . . Mpindyewu, beena Yudà bàdi bàmba nè tudi ànu bu. . . tukàadi mpindyewu bu mu cidimu cyà 1970 nè byà mu njila, bilondèshile dilondangana dyàbò, kabala-matùkù kààbò. Kabala-matùkù kàà beena Loomò kàdi kàngata 1953. Nè bàvwa nè kabala-matùkù kakwàbò kàdi kàngata mwaba mukwàbò kampàndà. Kàdi ke cidì cìcìvwijà cijaadiki cyà bwena Kilistò ncyòci aci, ncishìndamijila cyònsò ku dileidiibwa dyà Kilistò. Nudi numòna's, ke kutùdi tucyàngacila nkòwòku aku.

<sup>130</sup> Mpindyewu, kàdi mpindyewu bu ditùkù dyà mwandamutekète, mpindyewu, kùdi bantu beena Mpenta bààbūngi bàdi beena nsabatu—beena nsabatu, bàdi baneemeka ditùkù dyà diisambòmbò. Mpindyewu, bàdi bàmba nè: “Kakwèna Dìyì mu Bible bwà nwènù kuneemekela diisambò-. . .Dyàlumingu bu ditùkù kampàndà to.” Mpindyewu, nēngāmbè cintu cìmwècìmwè aci bwà nsabatu mu Dipungila Dipyadiyà. Nwamònu anyì? Mpindyewu, diisambòmbò òvwa ditùkù dyà nsabatu dyàkafidiibwà kùdi beena Yudà. Mpindyewu, dyàkafidiibwa ànu mu cipòlò kampàndà cyà cikondo.

<sup>131</sup> Mpindyewu, eci cidì mwà kajuula lukonko lukwàbò lwà lubènga cyòci eci. Kàdi, mpindyewu mònaayi's. Pààkiikisha Nzambì mu ditùkù dyà mwandamutekète, cikondo aci ditùkù

dyà mwandamutekète kadivwa dineemèkiibwe to, bwà—bwà ku dyànyì dimanya mu Mifundu, byàkatungunuka too nè ku bidimu bitwè ku cinunu nè nkàmà yìtaanu. Kàdi mu cipèèlà, Nzambì wàkapèèsha Izalèèlà ditùkù dyà mwandamutekète bu cimanyinu pankaci pàà. . . Nzambì.

<sup>132</sup> Nènku Nzambì wàkiikisha mu ditùkù dyà mwandamutekète, ditùkù Dyèndè dyà civùlukilu dyà diikisha. Ndi ngàmba nàнку awu bwà dyàkalenga dyà nè eci ncifwànyine kwikala bwà—bwà mwanèètù wa balùme anyì wa bakàjì wa ba-Adventistes du Septième jour, nwamònu's, nènku bàdi nè èkèleeziyà mulenga be. Nènku mpindyewu mònaayi nè, ndi ànu mufwànyine kubènganganakù naabò ndambu pa—pa lukonko elu.

<sup>133</sup> Mpindyewu, Nzambì wakajidila ditùkù dyà mwandamutekète. Matùkù àsambòmbò àvwa à muntu. Ditùkù dyà Mwandamutekète òvwa nditùkù dyà diikisha dyà Nzambì, òvwa cifwànyikijilu, cifwànyikijilu cyà Bukalenge bwà bidimu cinunu. Mpindyewu, mpindyewu mònaayi eci, mùdici—mùdici cibwelakanamù. Mpindyewu pàakalwà Yesù pa buloba, cyàkapoopeelàbo Yesù pa nkùrusè cívwa cyà nè Yèyè kàakaneemeka ditùkù dyà nsabatu to; bintu bibìdi cyanàànà bivwàbo bàbanda naabì Yesù bivwa byà nè “Yèyè wàkanyangakaja ditùkù dyà nsabatu, nè kuDivwija Nzambì.” Pèndè Yèyè òvwa mwàmbè nè Yèyè òvwa Mukalenge wa nsabatu. Yèyè òvwa nè . . . Yèyè òvwa kàbìdi Nsabatu wa Nzambì, nè Yèyè òvwa Nzambì. Pa nàнку bòbò kabàvwa nè mùshindù wà kuMubandabo to.

<sup>134</sup> Mpindyewu, swàyi nnutòkèshilèci nè nnùleejè ditùkù kaayi ditùdi nè cyà kuneemeka. Mpindyewu, kùdikù Mufundu anyi? Nènkonkè cyòci eci bwà dyàkalenga dyènu:

**Kùdikù Mufundu kampàndà anyi, Mwanèètù Branham, mwikàle ùtwàmbila nè ùtùpèèsha bukòokeshi bwà kuneemeka dyàlumingu ànu mùvwà beena Yudà bàneemeka diisambòmbò amu anyi?**

<sup>135</sup> To, mukalenge, kawènakù to. Kakwèna Mufundù mu Bible, bwa mu Dipungila Dipyadìpyà, bwà twètù kuneemeka anyi diisambòmbò anyi dyàlumingu to. Kàdi citùdi tuneemekela dyàlumingu, ncivùlukilu cyà dibìikà dyà ku lufù. Cintu nànsha cimwè. . .

<sup>136</sup> Mpindyewu, nenwambè nè: “Èkèleeziyà wa Kàtòlikè ngwàkacyènza.” Bàdi bàmba mùdìbo bacyènzè, kàdi bòbò bacyènzè, Pòlò Munsantu òvwa mwena Kàtòlikè kàà cyena Loomò, nènku ki mùvwà kàbìdi Peetèlò, Yone, nè Yakòbò, nè bakwàbò abu, bwalu bàakadisangisha mu ditùkù dyà kumpalà dyà lumingu bwà dikuukwila dyàbò. Nènku, bilondèshile bafundi bàà maalu-malonda, mùshindù wùmwèpelè wùvwàbo bafwànyine kwamba dishiilangana òvwa pankaci pàà mwena Kilistò mwena Yudà nè mwena Yudà wa ba-Orthodoxes (bònsò

bàbidi bàvwa bàya ku mansunàngòngà), kàdi umwe ùvwa ùya mu diisambòmbò (uvwa uvila dibiiikà dyà ku lufù dyà Yesù awu), nè mukwàbò ùvwa ùya mu dyàlumingu (uvwa witàbùùja nè Yesù wàkabiika ku bafwè awu). Nènku aci cìvwa ncimanyinu. Nè neciikale, cìcidi ànu cimanyinu, nè ncifwànyine kupàtukila patòòke bwà kwikala cimanyinu cyà nyama wa lwonji.

<sup>137</sup> Mpindyewu, ndi mumanyè nè, bânà bèètù bananga ba-Adventistes du Septième Jour bàdi bèèla meeji nè ke Cìtampì cyà Nzambì ncyòci aci. Bààkamba nè: “Udi mutwibwe cìtampì bwà dineemeka dyà nsabatu.” Kakwèna Mufùndu mu Bible wùdi wùcyàmba to.

<sup>138</sup> Kàdi’s ke Mufùndu ngwòwò ewu mu Bible wùdi wàmba nè— nè nudi batwibwe cìtampì, Efèsò 4.30, yèyè nè: “Kanùbungamiji Nyumà Mwìmpè wa Nzambì unùdi batwibwe nendè cìtampì too nè ku ditùkù dyà bupikudi bwènù,” dibàtiiza dyà Nyumà Mwìmpè.

<sup>139</sup> Mpindyewu nènùjaadikilè nè Cìtampì cyà Nzambì ndibàtiiza dyà Nyumà Mwìmpè. Nwamònu anyi? Ke dibàtiiza dyà Nyumà ndyòdi adi, n’Cìtampì cyà Nzambì. Mpindyewu, Yeshàayi 28, wàkamba nè: “Bidi nè cyà kwikala kanungu pa kanungu, mulongo pa mulongo, ndambù apa nè ndambù pààpa.”

<sup>140</sup> Mpindyewu tàngilàku, mpindyewu, wèwè mulundà munanga. Mpindyewu, bantu bàdi bàlekelà kwenza mudimu. . . Nwamònu’s, bantu bàdi bàteeta kupeta cintu kampàndà bwà kudisungila yèyè mwinè. Kakwèna cintu nànsha cimwè cyùdi mwà kwenza pa bwalu abu to. Udi musùngìdìibwe nku ngàsà. Nzambì ngudi ubiikila, Nzambì ngudi usùngila. Wènù londàayi ànu bidyàcidi byà—byà makàsà byà Nzambì, kwàjiki. Kwèna mwà kwamba to. Ke cidi ngiikàdilù wa muntu nyèyè awu. Bàdi bàteeta kulekela kudyà munyìinyi, bàdi bàteeta kuneemeka matùkù à nsabatu, bàdi bàteeta bwà. . . “Bu wèwè mwà kulekela kwenza *cikampàndà*.” Cidi. . . Kwèna musùngìdìibwe ku dibènga kudyà munyìinyi to, kwèna musùngìdìibwe ku *cikampàndà*, *cikansanga*, anyi *cikankènga* to, udi musùngìdìibwe nku ngàsà! Nènku Nzambì, ku ngàsà, ùdi ùkupèsha Mwoyi mupyamùpyà, wà Cyendèlèlè. Nudi bamòne cìndi njinga kwamba aci anyi? Nènku Mwoyi wà Cyendèlèlè ndibàtiiza dyà Nyumà Mwìmpè.

<sup>141</sup> Mpindyewu lekèlaayi nnùlèjè. Mwàkù *nsabatu* wùdi wùmvwija cinyi? Kùdikù muntu kampàndà udi mumanyè anyi, udikù mwà kwela cyanza cyèbè muulu anyi? Nsabatu? [Mwanèètù wa bakàji ùdi wàmba nè: “Diikisha.”—Muf.] Diikisha. Menemene. *N-s-a-b-a-t-u*, ditùkù dyà nsabatu, didi dyùmvwija nè: “d-i-i-k-i-s-h-a,” ditùkù dyà diikisha. Angàtaayi mèyi à kumpengà kwà dibèji mu Bible nùtangilàayi nè: ditùkù dyà “Diikisha” adi. Mpindyewu tuyaayi mu Ebèlù, nshapità mwi4, lùkàsàlùkàsà mpindyewu. Nènku netwikalè. . .

142 Eci—eci ndukonko lwànyì lwà ndekeelu kaaba aka mene. Nènkù, mwanèètù, tùmonebi Mwanèètù Neville ní ùdi naayi kuntwaku. Ndi mumanyè nè yìmwè yà ku yôyi mmîpi, pa nànkù katwàkunùlama ntàntà mupitèpìte bule to. Mpindyewu, nwàmfwayikù luse pàndi nyàngata apa.

143 Mpindyewu, panùdi numòna mwákù ewu, *diikisha*, díbà adi nudi bamanyè nè cidi cyùmvwija nè “nsabatu.”

144 Mpindyewu, Dipungila Dipyadìpyà ndyòdi edi. Yesù, mu Maatàayi Munsantu, Wàkabangila ku nshapità mwiò wa Maatàayi Munsantu, nè Wàkabanga nùnkù ewu: “Nukàadi bumvwè bàmba, kùdi bàà kale abu nè: ‘Kwèndi masandi.’” Aci, cìvwa ncinyi? Mikenji, mèyi matùma. “Kàdi Mémè ndi nnwàmbila, nè, ewu yònsò ukàtàngidi muntu mukàji bwà kumwalakana.” Yèyè wakacishintulula, kí mmwòmò anyi? “Nukàadi bumvwè bàmba, kùdi bàà kale abu nè: ‘Kùshebeyanganyi,’ kàdi Mémè ndi nnwàmbila!” Wàkacishintulula, kí mmwòmò anyi? (Nwela meeji nè Yèyè kàtu mushintùlùle mikenji anyi?) Èyo. Yèyè nè: “Kàdi Mémè ndi nnwàmbila nè ewu yònsò ukàfikidi mwanààbò munda kakùyi bwalu wàmányi kushebeya.” Aci kacya kacìvwa mu Dipungila Dikùlukulu to, aci’s n’Dipungila Dipyadìpyà. Yèyè wàkacisambuka è kuya dyàmwàmwa dyàci. Nwamònu anyi? Yèyè wàkatungunuka è kufila mèyi matùma awu, kàdi Yèyè wàkapangila, wàkatùpika diinàyi adi, didi ditùkù dyà mwandamutekète. Mpindyewu mu nshapità wa 7, mùdiYe . . .

145 Mu Masànka, cyàkambàYe ncyòci eci, Yèyè wàkamba nè: “Nukàadi bumvwè bàmba, kùdi bàà kale abu nè: ‘Newikale, nè kwàkwikala,’ kàdi Mémè ndi nnwàmbila bishiilàngàne. Nukàadi bumvwè bàmba nè: ‘Dìnú ku dìnù, nè dísù ku dísù,’ kàdi Mémè ndi nnwàmbila! Nutu bumvwè bàmba bishiilàngàne, kàdi Mémè ndi nnwàmbila!”

146 Mpindyewu, ku ndekeelu kwàbi byònsò, Yèyè wàkashiya díyi ditùma diinàyi. Mpindyewu, aci cìvwa nè: “Vùlukàayi ditùkù dyà nsabatu nè nùdìlamàayi dyà cijila.” Mpindyewu Yèyè mmwàmbè nè:

*Lwàyi kùndi, nwènù bònsò bàdi bàkwàta mudimu mukolè nè bambùle majitu makolè, nè mémè nènnpèèshè diikisha dyà musùukà wènù.*

147 Mpindyewu tàngilàayi: “Ewu yònsò udi wenda masandi ùdi nè cyà kwashiibwa mabwe,” bìvwa bikèngela kwikalabò ànu mu cyenzi dyà dyenda dyà masandi. Ncyà bushùwà anyi? Nè bìvwa bikèngela kwenjiibwaci mu mubidi. “Ewu yònsò udi ushebeya,” byàkakèngela bwà kwikalayè mushebeyanganyi.

148 Kàdi Yesù wàkamba nè: “Ewu yònsò ukàtàngidi muntu mukàji,” musùukà wèndè, nyumà, kí ncintu nànsha cìmwè mu mubidi wèndè mpindyewu to. Musùukà wèndè mmupikùdiibwe, kabìvwa nànkù cikondo aci to; ùvwa mulongeshi wa kàlaasà,

nwamònu's, ke cìvwà mukenji. Mpindyewu Yèyè wàkamba nè: “Ewu yònsò ukátàngidi muntu mukàji bwà kumwalakana wàmanyi kwenda nendè masandi munda mwà mwoyi wèndè.” Mpindyewu Yèyè wàkamba nè: “Nukàadi bumvwè bàmba nè: ‘Kùshebeyondanyi to,’ kàdi ndi ngàmba nè ewu yònsò ukáfikidi mwanààbò munda kakùyì bwalu wàmanyi kumushebeya.”

149 Mpindyewu Yèyè mmwambè, mu ngaakwilù mukwàbò, bwà nsabatu, Yèyè wàkamba nè:

*Lwàyi kùndi, nwènu bònsò bàdi bàkwàta mudimu mukolè nè... bambùle majitu makolè, nè mèmè nènùnupèeshè diikisha dyà misùukà yènu, nsabatu wa misùukà yènu. (Kí mbwà mubidi wèbè wà misunya, mbwà wèbè musùukà.)*

150 Mpindyewu, tèèlejàayi—tèèlejàayi Pólò mpindyewu. Bu nwènu ànu mwà... Ndi mumanyè nè kùdi luuyà lukolè nè bikwàbò byònsò, kùdi luuyà lukolè lwà mwab'ewu, kàbidi. Kàdi, mpindyewu, tùmvwàyi eci bimpè menemene mpindyewu bwà twamòna mwà kukòsa bwalu ebu. Mpindyewu, Pólò, mwikàle ùfùndila beena Ebèlù. Beena Ebèlù abu bàvwa mbanganyi? Akulà. Beena Yudà. Ncyà bushùwà anyi? Mpindyewu, abu bàvwa balami bàà mikenji, baneemekedi bàà nsabatu. Ncyà bushùwà anyi? Ncyà bushùwà anyi, mwanèètù, muyiishi? Bàvwa balami bàà nsabatu, bàvwa balami bàà mikenji. Èyo.

151 Mpindyewu, Pólò ùdi ùfikisha beena Yudà, ku mindidimbi nè cìfwànyikijilu, ùleeja cìvwà mikenji miikàle yìfwànyikija: “Mikenji yìvwa nè mundidimbi wà bintu bimpè bicìvwà bilwa,” nè ùdi ùtùngunuka nè ùfila cyòci eci kuntu kwàka mu mwaba mukwàbò bu mùdi ngondo nè dîbà. Bu mùdi—ngo—ngondo mwikàle ànu mundidimbi wà dîbà diikàle difila nsèsè mu ditùnga kampàndà dikwàbò anyi mu buloba kampàndà bukwàbò, nènku yidi yidileejila apa. Mpindyewu, kàdi mpindyewu, nè kabìvwa mwà, kùdi... Ebèlù 9 to.

152 Mpindyewu, mònaayi mpindyewu mu Ebèlù 4, yèyè ùdi ùlwa ku mulàmbù wà nsabatu. Mpindyewu tàngilàayi:

*Ki bwà cinyi twìkalàayi nè dicìina, bwà nè nkwèpi, mulayi mutùshùila wà kubwela mu diikisha dyèndè, ...*

153 Mpindyewu, Pólò ngwàkula nè balami bàà nsabatu mpindyewu, bantu bàvwa balamè ditùkù dyà nsabatu abu. “Twìkalàayi nè dicìina bwà nè nkwèpi kwìkalà mulayi mutùshùila bwà ditùkù dyà nsabatu,” mu ngaakwilù mukwàbò. Anyi bu nwènu mwà kumòna mèyi à kumpengà kwà dibèji awu, anyi “kulama kwà nsabatu.” Cìdi “j” mu wànyì mèmè, mu Bible wa Scofield, anyi “dilama dyà nsabatu.” Nwamònu anyi? Èyo.

*Twìkalàayi... nè dicìina, bwà nè nkwèpi, mulayi mutùshùila... bwà kulwa kupangila cyòci aci.*

*Bwalu èvànjeeliyò wàkayiishiibwa kutùdi, ànu mwàkayiishiibwàye kùdìbò (kale mu cikondo cyà mikenji): kàdi dîyi diyishiibwe kadyàkabàkwàcisha to, kadivwa disambakaja nè diitabuuja kùdi aba bàkaditèèleja to.*

154 Mpindyewu, aci cìvwa kale wàwa mu cikondo cyà mikenji. Kabàvwa nè diitabuuja to, bwalu kakwèna cintu nànsha cimwè cyà kucishindikilapu to. Nwamònu anyi? Èyo:

*Bwalu twètù bàdi biitàbùuje bwà kubwela mu diikisha Dyèndè, bu mwàkambàye, . . .*

155 Mpindyewu: “Dyèndè” diikisha. Mpindyewu, “Dyèndè,” n’Diikisha dyà Kilistò. Èyo, Diikisha Dyèndè, “nsabatu” Wendè. Nè musangu wònsò wungàngata mwàkù diikisha, pàdiwu mufundamù, nêngiikalè mwà kukwata mudimu nè “nsabatu” bwà nwènù kuumvwa bwà dilama dyà ditùkù. Nwamònu anyi?

*Bwalu twètù bàdi biitàbùuje bwà kubwela mu nsabatu Wendè, diikisha, bu mwàkambàye, . . . Ndi mudicipile ku cùji cyànyi cikalè, (kùdi beena Ebèlù) bóbò kabàakubwela mu diikisha dyànyi to: nànsha mùdìbi nè . . . (Mpindyewu, tàngilàayi Pòlò ùkacìvwija ditùkù dijidiibwe dyà Nzambi) . . . nànsha mùkaavwà midimu mijikè kacya ku difukà dyà dyulu nè buloba aku.*

*Bwalu yèyè mmwakùle mu mwaba kampàndà wà ditùkù dyà mwandamutekète bwà diikisha, anyi nsabatu . . . (Ncyà bushùwà anyi? Nèntekè aci mwaba awu, nwamònu’s.)*

*Bwalu yèyè mmwakùle mu mwaba kampàndà (mu mikenji) bwà ditùkù dyà mwandamutekète mu mùshindù ewu, Nè Nzambi wàkiikisha mu ditùkù dyà mwandamutekète ku byenzi byèndè byònsò.*

156 Ke ditùkù dyènù dyà mwandamutekète ndyòdi adi. Mpindyewu, Pòlò ùvwa mufwànyine kwitaba nè Nzambi ùvwa mubàpèèshedi, aci cìvwa nditùkù dyà mwandamutekète. Nè Nzambi wàkiikisha ditùkù dyà mwandamutekète, Yèyè wàkabènesha ditùkù dyà nsabatu, Yèyè wàkadijidila, nè Wàkadijidila, nè wàkadivwija ditùkù dyà diikisha. Nzambi wàkacyènza, ku byenzi Byèndè byònsò.

*Nè mu mwaba ewu kàbìdi: Bóbò babwelè mu diikisha dyànyi. (Yesù ngudi wakula awu.)*

157 Mpindyewu, kùdi nsabatu mukwàbò mwaba kampàndà. Ùdi penyi? Mpindyewu, vùlukàayi eci kaaba aka nè, “diikisha dyà Nzambi,” ditùkù dyà mwandamutekète adi. Pòlò mmwambè nè: “Bàvwa nè aci mu mwaba kampàndà.” Kàdi mpindyewu yèyè wàkamba kàbìdi nè: “Bóbò babwelè mu Diikisha Dyànyi,” wàkula bwà Yesù mu Maatàayi èyo.

*Pa kumòna nè nkushààle nè bàmwè bàdi nè cyà kubwelamù, nè kùdi aba bàakadyànjilàbo kuciyiisha kabààkabwelamù to . . . bwà bupidyà:*

*Kàbidì, . . .*

158 Mpindyewu tèèlejàayi nè ntèmà! Bantu bònsò bàdi bàtèèleja, bambè nè “Amen.” [Disangisha dìdi dyàmba nè: “Amen.”—Muf.] Tèèlejàayi:

*Kàbidì, yéyè ùdi wimakaja ditùkù kampàndà, . . .*

159 Yéyè mmukòse ditùkù kaaba aka. Cìwra ncinyi aci? Bantu bònsò bàcyàmba musangu wùmwè. Nsabatu! Ncyà bushùwà anyi? Yéyè mmukòse ditùkù dyà mwandamutekète dyà lumingu bu nsabatu pa kaaba aka.

*Nènku kàbidì, yéyè mmukòse ditùkù kampàndà, wàmbara mu Davìdì (mu Misambu), Leelù ewu, paanyimà pàà ntàntà buleyi nùnkù; (too nè pààlwà Yesù, nudi numòna’s, musangu wà kumpàlà) . . . mbyambùbwe nè: Leelù ewu bu nwènu . . . bumvwè dīyī dyèndè, kanùpapishi mwoyi wènu to. (kùdi diikisha dikwàbò dilwalwà; kàdiyī dyà mubidi to, dyà nyumà)*

160 Mpindyewu, tàngilàayi. Kaa, wèwè udi wamba nè: “Mpatùdì nè ditùkù dyà mwandamutekète, twètù pèètù.” Mpindyewu, anjì shààlaayi bakwàteku katanci kakesè cyanààna. Tùbalàayi mvensà udi ulonda awu, nwamònu’s, kanùyì naaci lùkàsàlùkàsà menemene to. Èyo:

*Bwalu bu byòbì nè Yesù ùwra mubàpèèshe . . . Bwalu bu—bu nè Yesù ùwra mubàpèèshe diikisha, ditùkù dyà diikisha, dībà adi yéyè kàwra mmufwànyīnekù kwikala mwakùle pashīishe bwà ditùkù dikwàbò to.*

161 PàākashintululàYe mikenji, kuumuka ku mikenji kuya ku ngàsà, Yéyè kàwra mufwànyīnekù kwikala mubàpèèshe ditùkù dyà diikisha, ditùkù dyà diikisha, ditùkù kampàndà anyi? Kàdi Yéyè kàākambakù bwalu nànsha bùmwe bwà nsabatu to. Kàākambakù kantu nànsha kàmwe pa bìdì bitàngila dyàlumingu to, Yéyè kàākambakù kantu nànsha kàmwe pa bìdì bitàngila diisambòmbò to. Kàdi’s cyākambàYe ncyòci eci, cyākambà Pòlò. Mpindyewu tàngilàayi: “Kùdi . . .” Mvensà wa 19 . . . anyi mvensà wa 9:

*Ki bwà cinyi kùcidi kushààle nsabatu bwà cisàmbà cyà Nzambì. (Mbwena kwamba nè leelù ewu!) . . . Nkushààle . . . nsabatu bwà cisàmbà cyà Nzambì.*

*Bwalu yéyè (wèwè anyi mèmè) udi mubwelè mu diikisha dyèndè (Diikisha dyà Yesù: “Lwàyi kùNdì, nwènu bònsò bàdi bàkwàta mudimu mukolè nè bambùle majitu makolè, Mèmè nènnpèèshè Diikisha”), yéyè (wèwè anyi mèmè) wàmanyi kulekela mudimu wèndè*

*sungasunga, bu mwàkiikishà Nzambi ku yèndè ku cibangidilu amu.*

162 Amen! Ke nsabatu wenù nyèyè awu. Ncyà bushùwà anyi?

*Tùkwatàayi mudimu mukolè. . . (mwàkambà Pòlò) . . . bwà kubwela mu diikisha adi, bwà muntu nànsha umwe kàlu kudishindila ku cileejilu cimwècimwè cyà bupidyà aci to (cyà matùkù nè bikwàbò, nwamònu's).*

*Bwalu dîyi dyà Nzambi dîdi nè mwoyi, nè nè bukolè, nè ditwè kutàmba mwelè wà mvità wà nseke yibidi, ùpanda mene. . . ùpandulula nè musùùkà. . . nè dijinguludi dyà. . . nè dyà. . . (tùmonèbi) . . . dyà nyumà, nè dyà. . . (indilaayi katanci) . . . dipandulula musùùkà bipese bìbidi nè nyumà, nè. . . manungu nè bongò bwà mu mifùbà, nè. . . dijinguludi dyà meeji nè mapàngadika à mu mwoyi.*

*Nànsha kakwènakù cifùkùbwà nànsha cimwè. . . cidi kaciyi cimwèshìibwe ku mèsù kwèndè nànsha: bwalu bintu byònsò bidi butakà nè patòoke kumpàla kwà disù Dyèndè dyà yèyè mwena kumpàla kutùdi nè cyà twètù kwimana awu.*

163 Mpindyewu, tàngilàayi, Nzambi wàkiikisha mu ditùkù dyà mwandamutekète, wàkafùka ditùkù dyà mwandamutekète, wàkadipèèsha beena Yudà bu civùlukilu. Ndi ngàakula bwà Pòlò Munsantu mpindyewu, nwamònu's, mwab'ewu. Mpindyewu, nudi nwela meeji nè yèyè nguvwa uDitwàla anyi? Nudi nwela meeji nè ùvwa nè bukenji anyi? Mpindyewu, cidiye mwambè mu Galàtiyà 1.8 ncinyi? “Bu Mwanjèlò wa mu Dyulu mwà kulwa nè kunùlongesha èvànjeeliyò mukwàbò nànsha wa bishi mushiilàngàne nè ùndi mwambè, èdiibwè mulawu.” Nwamònu's, èvànjeeliyò mmitòokeshe myandà. Mpindyewu, tàngilàayi.

164 “Èè, Mwanèètù Branham, mpindyewu cîndi mufwànyine kwenza ncinyi, nkwitabuuja ànu Yesù Kilistò?” To. Aci kí n'Diikisha to.

165 Mpindyewu, nwènù baswè kumanya cidi. . . Mbanganyi bàdi baswè kumanya cidi Diikisha dyà beena Kilistò, bàmbe nè “Amen.” [Disangisha dîdi dyàmbe nè: “Amen.”—Muf.] Mpindyewu, nudi mwà kucifùnda panwikalà baswè, Yeshàayi 28. Yèyè nè: “Bidi nè cyà kwikala pa kanungu—kanungu,” wàkula. “Kanungu pa kanungu, mulongo pa mulongo, ndambù apa nè ndambù pàapa, nè nùkwatè bikolè ku cidi cimpè.” Mupròfètà wàkula bwà cikondo cìcilwalwà, bwà Diikisha, nsabatu. Balàayi nshapità mujimà awu, nwamònu's, yèyè ùdi wàmbe nè: “Bikondo bìikala ditùkù dyà nsabatu nè cyà kwikala dijikè,” nènku nebàsumbishè bìsàbaatà mu diisambombo byà mwomùmwe nè mùvwàbo benzè mu òmwè amu, anyi ní ncinyi cikwàbò. Nwamònu anyi? Yèyè nè: “Ndìbà kaayi diikala cikondo eci?” Yèyè nè:

*...kanungu pa kanungu;...mulongo pa mulongo; ndambu apa, nè ndambu pàapa: nukwatè bikolè ku cidi cîmpè.*

*Bwalu nku mishikù yidi yikukuminà nè mu myakulu mikwàbò mmungàakulà nè cisàmbà eci.*

*...Nènkù ke nsabatu nyèyè ewu, nè diikisha dîmvwà mwambè nè bivwa bikèngela bwà kubwelabò. Nènkù bwà cyònsò cyà Cyôci eci bàakapapisha myoyi yàbò nè kukùpabò mitù yàbò nè kuCidyombolabò. (Ànu cintu cimwècimwè cyàkenzàbo ku Mpenta aci pàakamatà Nyumà Mwîmpè pa bantu, nè Nyumà Mwîmpè wàkafidiibwa dyàmbedi kùdì bantu mu Ditùkù dyà Mpenta. Ke Diikisha ndyôdi adi, nsabatu bwà cisàmbà cyà Nzambi.)...*

<sup>166</sup> Pa nànkù kabingilà kàmwèpelè katùdì tuneemekela dyàlumingu, kàakabangila nè baataatù bèètù bàà kale bàà mu Bible, Pòlò Munsantu, Yone, Maataàyi, Maakò, Luukà, nè bònsò abu, bàakaya ku nzùbu nè ku nzùbu, bàakangata mèèsà à Mukalenge mu ditùkù dyà kumpàlà dyà lumingu pàvwà bayiidi bàdisangisha pàmwè, nè cyàkabiiikiibwa, kaciyi nsabatu to, kàdì ditùkù dyà Mukalenge.

<sup>167</sup> Yone wàkamba, mu cisanga cyà Paatèmò, cikaavwa cimana kujaadika mu mùshindù mumanyike mu èkèleeziyà nè: “Mvwa mu Nyumà mu ditùkù dyà Mukalenge.” Ncyà bushùwà. Nwamònu anyi? Ke pashiishe kumònayè...

<sup>168</sup> Nènkù—nènkù, mpindyewu, ditùkù dyà Mukalenge didi—didi nditùkù didi Mukalenge mujuukè. Mpindyewu, udi uya kangata mulongi wa maalu-malonda, Josephè, Agàbò, bààbúngi bàà ku bakwàbò abu, anyi, kí ng’Agàbò to, kaa, mémè ncyèna mwà... Yònsò wa ku bafundi bààbò bàà kale, nènkù nenùjandulè kuntwaku. Balongi bàà maalu-malonda bàà èkèleeziyà, *Mukàndà wà Fox wà Bafwile Diitabuuja*, bààbúngi bàà kùdìbo, nènkù nenùsanganè mwaba awu nè dishiilangana dimwèpelè... Bàdì kasùmbù kàà beena Yudà. Umwe wa kùdìbo bàakabiikila nè “mbadi bàà minyìnyì yà bantu,” bàvwa mbeena Kilistò. Kwambabò nè: “Kùvwa muntu wàkashipàbo kùdì Ponsiyo Pilaatù nè bayiidi bàakalwa nè bàakiiba mubidi wèndè. Nènkù bàakawùsokoka, nè dyàlumingu dyònsò—dyònsò bàdì bàya kadyà citùpà cyàwù.” Bàvwa bàngata mèèsà à Mukalenge, nudi numòna’s. Bàvwa ànu... Bàvwa bàngata mubidi Wèndè, nudi numòna’s. Bàvwa bàmba nè bàvwa bàngata mubidi wà Mukalenge, mèèsà à Mukalenge. Nè kabàvwa bamanyè civwàwu to, ke yèyè nè: “Bàvwa badi bàà minyìnyì yà bantu.” Yèyè nè: “Bàdì bàya kadyà ditùkù dyà kumpàlà dyà lumingu, bàdì bàdisangisha nè bàdya mubidi wà muntu ewu.”

<sup>169</sup> Nè mùshindù wùmwèpelè wùvwàku mwà kumanya nè bàvwa balami bàà mikenji nè bàvila nè mwoyi mujimà dibiiikà

dyà ku lufù, anyì ní bàvwa beena Kilistò nè biitàbùùje dibìikà dyà ku lufù, umwe ùvwa ùya mu èkèleeziyà mu diisambòmbò nè mukwàbò ùvwa ùya mu èkèleeziyà mu dyàlumingu, cìvwà ciikàle cimanyinu pankaci pààbò.

<sup>170</sup> Aci's ncikolè be, kí mmwômò anyi? Èyo. Ndi ntèkemena aci cidi cilwàdamuna. Nyumà Mwímpè ùdi . . .

<sup>171</sup> Mpindyewu, udi nè cintu kampàndà mwaba awu anyi, mwanèètù? Udi muswè. . . Udi muswè—udi muswè kubànda bwà kulwandamuna anyi? Twánjì tùmonebi, apa mene. Kaa, èyowà's.

**5. Beena Yudà nebiikalè ànu nè mpùngà wa kusùngidiibwa paanyimà pàà cipungu cyà bàà Bisàmbà byà bendè cimanè kutwà ku ndekeelu anyi?**

<sup>172</sup> Kaa, èkèlekèle, alu ní kí ndulenga lwà menemene's! Katwèna nè dībà dyà kubwelamù bimpè menemene to, kàdi lekèlaayi nnwambilè eci. Nènku angàtaayi díyi dyànyì, nènnulléjè. Ku . . . Bu nwènù mwà kwangata díyi dyànyì (mùndi ndùmvwija amu) kùdi Nzambì, dībà adi nudi nuya nukabala, wamònu's, nènku dībà àdi nenùjandulé. Bwalu ndi ndifwànyikijila. . . Ncyèna mwà kumòna ntankù to, kàdi ndi ndifwànyikijila nè dībà dikaadi dimanè kupita. . . Tudi dībà kaayi? Cinyi? Dībà citèemà nè tusunsa makùmi àsàtu. Ncìcidi nè cyà kuya ku lùpitaadi, nè ncìcidi nè cyà kuya ku New Albany, nè bìdi bikèngela tujúukè pa tusunsa makùmi àbìdì nè tùtaanu paanyimà pàà dībà yisàtù wa dindà. Pa nànkù. . . Ncyèna mukalààle kumpàlà kwà dībà ibìdì anyi isàtù jaajaaja wa pàcyacyà mu lumingu elu to.

<sup>173</sup> Mpindyewu mònaayi mwab'ewu, lùkàsàlùkàsà mpindyewu, bwà kupeta cyòci eci. Èyowà's, mulundà wanyì munanga mwena Kilistò, ditùkù dyà bàà Bisàmbà byà bendè dyàjikì, didi munkaci mwà kujika mpindyewu mene. Nènku Nzambì neàpinganè kùdi mwena Yudà. Nènku ndekèlaayi ngàmbilè èkèleeziyà mukèsè ewu nè ndi munkaci mwà kusambila dībà dyònsò. Nè bipròfetà byà bifùmina mu bitùpà bishìilèshìilàngane byà ditùnga, bìdi munkaci mwà kutùnkumuka mwab'ewu pa bwalu ebu. Ndi ngiitabuuja nè mwena Yudà. . . Mpindyewu, dikàngaayi nkooi yènu pambidi ànu bwà katanci kakesè cyanàànà, mpindyewu.

<sup>174</sup> Mwena Yudà katukù kacya mukùmbàne bwà kwela meejì pa cintu cimwèpelè eci cyà èkèleeziyà wa beena Kilistò nànsha. Mwena Yudà mmungambile, misangu yàbùngì nè: "Mwanèètù, kwèna mwà kukòsolola Nzambì mu bitùpà bisàtù kàdi kuMumpèèsha to." Mwena Yudà ùdi nè Nzambì umwèpelè, nè mwinè awu's n'Yèhowàh.

<sup>175</sup> Nè bàà Bisàmbà byà bendè mbacyumvwije bibi menemene, mu mùshindù wà nè mbacìlongèshe mu mùshindù kampàndà, cibi, nè dimanya. Ndi ngiitabuuja nè yèyè—yèyè ùdi nè— nè mmwènenu wa cyòci aci, wa nè kakwèna nzambì yisàtù to. Kùdi Nzambì umwèpelè, mamweneshiibwa àsàtù. Bantu bàsàtù mu Mupèrsonà ùmwèpelè. Nènku paùdi mwà kupeta

mukenji awu, mêmè kwambila Hyman Appleman. . . Bâàbûngi bâà kunûdi mbamumanyè. Yèyè nè: “Mwanèètù Branham, wèwè muyè nè mukenji awu ku Pàlèstinà kwàka nè bimanyinu nè maalu à kukèma,” mwàkambàye, “nekwikalè beena Yudà mùliyô mujimà bààkidilà Yesù Kilstò bu Musùngidi wabò sungasunga.” Nwamònu’s, ncyà bushùwà. Mpindyewu, mêmè kwamba. . .

<sup>176</sup> Ke Mukenji wutùdi naawù ewu. Yesù ùvwa Yèhowàh mudìbwikile musunya, mupwèkè mudìbwikile. Mpindyewu, Nzambì (Taatu, Mwànà, nè Nyumà Mwîmpè) kabyèna bu munu wèbè awu to, umwe, mùdi bàmwè bantu bàcyèla meeji amu. Cintu cyònsò mu kaabujimà cidi ànu bu. . . To, Nzambì ùdi. . . Ndi mfuma ku dinùvungulwilaci kùkaadi katanci, nwamònu’s, nè kùdi búsàtù kampàndà mu Umwe.

<sup>177</sup> Mêmè ndi búsàtù mu umwe. Ndi musùùkà, mubidi, nè nyumà, mu muntu umwèpelè. Ncyà bushùwà anyi? Bushùwà. Ndi—ndi mwenjùbwe nè tubùlù twà—twà mashi, mashi, nè tujilujilu twà mutù, kàdi nànsha nànkù mwikalè muntu umwèpele. Nwamònu anyi? Cyònsò cyùdi utàngila cidi mu búsàtù, nè búsàtù mu umwe.

<sup>178</sup> Kùvwa búsàtù mu bwàtù. Cisàsà cyà mwînshì, bintu bìdi bìdikòka panshi; cisàsà ciibìdi bwà bukwà nyuunyi, bintu bìdi bìbùuka; nè cisàsà ciisàtù bwà Noà nè dîkù dyèndè. Bintu byònsò!

<sup>179</sup> Mu tabernacle. Kùvwa disangisha, mwaba wà cijila, Mutàmbe cijila wa bàacijila. Nwamònu anyi?

<sup>180</sup> Nènku kùvwa bipungu bisàtù. Buutaatu, Buumwànà, nè cipungu cyà Nyumà Mwîmpè. Nudi bùmvwè cîndi muswè kwamba aci anyi? Kàdi byònsò bisàtù abi. . . Katwèna twamba nè: “Nzambì yètù to.” Aci’s ncimpàngaanù, nè beena Yudà mbamanyè cyòci aci. Kàdi paùdi mwà kumumvwijaci nè Yesù ewu ÙDI Nzambì, Yèhowàh Nzambì, kàyì mupèrsonà mwibìdi anyi mupèrsonà mwisàtù to, m’Mupèrsonà umweumwe awu dîbà dyònsò mwikalè ùDimwènesha. Nwamònu anyi? Nè pashìishe nè bimanyinu nè maalu à kukèma bwà kujaadika nè Yesù mmubiike ku bafwè.

<sup>181</sup> Nènku Docteur Reidhead ewu. . .

<sup>182</sup> Mwanèètù udi paanyimà wàwa, mulongeshi wa èkèleeziyà, mulongeshi wa ku, mulongeshi wa kàlaasà, ùdi mu èkèleeziyà emu dilòdòlò edi, mvwa mumumòne, nè mêmè kulabulangana nendè ku cyanza nè mukàjèndè nè mwanèndè udi paanyimà pààpa nàka. Ùvwa kuntwaku bwà kumumvwayè ùyiisha dilòdòlò adi. Ngèèla meeji nè bàdi kaaba aka, bôbò kabàyì bayè to, ndi ngùitabuuja nè yèyè mmulongeshi wa kàlaasà mu Louisville. Mu mìshindù yònsò, bàvwa kuntwaku bwà kumutèeleja.

<sup>183</sup> S’mbyà pabwàbì, muntu awu mmulwè kwànyì kumbèlu, yèyè nè mukwàbò (nè mwena Yudà), kùkaadi ndambù wa ngondo. Ke yèyè nè: “Mwanèètù Branham, ndi nè màpòlomè *bùngi*



Dyabùlù's ùdi pèndè mwà kwenza nànkù. Dyabùlù's ùtu mwitabi wà maalu ànu mùdiwu mafùndiibwe amu nè mwèndè mwònsò.

<sup>190</sup> Kàdi, mwanèètù, Yesù Kilstò wàkamba nè: “Muntu yèyè kàyì mulediibwe kùdi Nyumà wa Nzambi kààkumòna Bukalenge bwà Nzambi to.”

<sup>191</sup> Kabiyì ànu nè mbwalu udi wamba nè: “Èyo, mémè ndi ngiitabuuja aci. Èyo, ndi—ndi ngiitabuuja nè mùshindù awu ke wùdibi. Ndi ngiitabuuja nànkù. Èyowà.” Aci kacýena cyèza bwalu to. Cìdi nè cyà kwikala dilabula dyà cyà bushùwà dyà Dilediibwa dipyadipyà. Bikèngela ciikalè cintu kampàndà pankaci pèèbè nè Nzambi cyùdi mumanyè nè wèwè udi muumùke ku lufù muyè ku Mwoyi.

<sup>192</sup> Yèyè nè: “Mwanèètù Branham, ndikù mwà kupeta Nyumà Mwímpè anyi?”

<sup>193</sup> Mémè nè: “Ndi mfùma ku ditentekela Hyman Appleman byanza kwínshì kwàka, nè yèyè mmwakidile Nyumà Mwímpè.”

<sup>194</sup> Mwena Yudà mukwàbò ewu kubangayè kudila mwadi, nè kushebeyayè verre uvwa pa kaamèèsà kakesè kàà kàfè kuntu kwàka, nè kudilayè nè bisonji kwenza cijiba cinène mwaba awu. Bònsò bàbìdi kwambabò nè: “Mwanèètù Branham, mmunyi mutùdi twakidila Nyumà Mwímpè?” Bamanyi bàà dibàla! Bàà meeji matwè à ngwengwengwe, bàà lungènyì lwà kacya! Bàà batàmbe bwímpè bàdiku mu ditùnga abu!

<sup>195</sup> Ke mémè nè: “Mùshindù wà bàpostòlò wà kwakidila Nyumà Mwímpè ngwà kubàtentekela byanza.” Ncyà bushùwà.

<sup>196</sup> “Ditentekelangana dyà byanza.” Ananiyà wàkalwa bwà kutentekela Pòlò byanza bwà wàmòna mwà kwakidila lumònù lwèndè nè kuujiibwa tètè nè Nyumà Mwímpè.

<sup>197</sup> Filipò kupwekayè kuntwaku nè kuyiishayè kuntwaku, nè kubàtiizayè musumbà mujimà awu mu Dìna dyà Yesù Kilstò. Nyumà Mwímpè kààkalwa pa muntu nànsha umwe to, bwalu Peetèlò nguvwa nè nsapì ayi. Ke kulwayè, nè kubàtentekelayè byanza, ke kwakidilabò Nyumà Mwímpè. Ncyà bushùwà anyi?

<sup>198</sup> Pòlò, mu Byenzedi 19, paanyimà pàà yèyè mumanè kupita kuntwaku. Apòlò, ùvwa Billy Graham mu cifwànyikijilu cyà kuntu kwàka, ùvwa wènzà ditàbuluja dinène nè dicyònkòmoka. Yèyè nè: “Nukààdikù bapètè Nyumà Mwímpè kacya nwítabuuja anyi?” kùdi musumbà wà ba-Baptistes awu.

<sup>199</sup> Bòbò kwamba nè: “Twètù tudi balondi bàà Yone. Tudi bamanyè! Apòlò mmuyiishi wetù, yèyè mmwakwidyanganyi mukùdimùne mucima, muntu mutàmbe kwikala wa meeji matwè mu ditùnga.”

<sup>200</sup> Yèyè nè: “Kàdi nukààdi bapètè Nyumà Mwímpè kacya nwítabuuja anyi?”

Yèyè nè: “Katwèna bamanyè nè kùtukù Nyumà Mwimpè kampàndà to.”

Yèyè nè: “Kàdi nwàkabàtìijibwa mùshindù kaayi?”

Bòbò nè: “Tudi babàtìijibwe kùdì Yone.”

201 Yèyè nè: “Wàkabàtìiza bwà kanyinganyinga, wàmba nè nwitabuuje Ewu ulwàlwa, Yesù Kilstò.” Nènku pààkumvwàbo Cyôci eci, bààkabàtìijibwa mu Dìna dyà Yesù Kilstò. Ke Pòlò kubàtentekelaye byanza nè kwakidilabò Nyumà Mwimpè, kubangabò kwakula mu myakulu nè kutùmbisha Nzambì. Aci ncitòòke tòò ànu mùndì mumanyè Mifùndu amu.

202 Mpindyewu, tàngilàaku, wèwè mulundà wanyì! Kùvwa kufwànyine kwikala dishiilàngana dikesè mwab’ewu mu mmwènenenu yènu, bwalu tudi babwelàkàne nè bintu byònsò. Kàdi tùdipàtùlaayi patòòke, kanùyì nuteeta bwà kwelamù dyènu dyumvwija nànsha. Amba cìdì Bible wàmba, ùCìbalè ànu mùshindù ewu.

203 Ke mèmè nè: “Cintu cìmwèpelè cìndì mumanyè, bânà bèètù, ncyà kutentekela byanza pa aba bàdì munkaci mwà kukèba Nyumà Mwimpè.”

204 Yèyè nè: “Udikù mwà kutùtentekela byanza nè—nè kulòmba Nzambì bwà kutùbènèsha nè kutùpèesha Nyumà Mwimpè anyì?”

205 Mèmè nè: “Nèngìikalè mwà kwenza nànkù.” Ke twètù kutwà binù panshì, nè mèmè kusambila nè kubàtentekela byanza. Nènku ndambù wa mbingu paanyimà pàà cyôci aci, bònsò bàbìdì bààkapeta dibàtìiza dyà Nyumà Mwimpè. Nènku Docteur Reidhead ewu pààkapetàye dibàtìiza dyà Nyumà Mwimpè, è kuditwayè mu dyakula dyà mu myakulu mikwàbò. Èyowà’s, mukalenge.

206 Ke Missions Soudanaises ayi kwamba nè: “Katwèna nè kaaba bwà muntu udi wakula mu myakulu nànsha.”

207 Ke kulwayè kùndì è kwamba nè: “Muntu udi wakula mu myakulu?”

208 “Mòna’s, mòna’s,” mèmè nè, “kabèèna nè mwaba bwà Yesù Kilstò to, bwalu Yesù Kilstò wàkaakula mu myakulu myenyi; nè wàkafwà, wàkula mu myakulu myenyi.”

209 Kabàvwa mwà kwitaba dilongesha dyà Pòlò to, Pòlò wàkaakula mu myakulu kutàmba bònsò bwàbò.

210 Mukwàbò wàkangambila makèèlèlà awu, wàmba nè: “Mbipìciibwe nè mèmè mwakùle myàkù yitaanu nè dyumvwa.”

211 Kàdi dilongesha dyà Pòlò dyàkamba nè: “Jingàayi cipòfetà, nè kanùkàndiki dyakula dyà mu myakulu nànsha.” Nè bòbò mbakàndikiibwe bwà kwakulabò mu myakulu!

212 Dyakula dyà mu myakulu ndipà dyà kùdì Nzambì didì dyà mu èkèleeziyà byà mwòmùmwe leelù ewu ànu mwàkadibi

ku cibangidilu amu. Aci's m'Bulelèlà bwà menemene. Èyowà, bushùwà! Aci ndilongesha dyà Bible. Ndiipà dyà kùdì Nzambi, kàdi nwènù nuvila ànu munùdì—munùdì nuvila Diledibwa dipyadìpyà amu, nudi nuvila byònsò byàkalongeshà Yesù panùdì nuteeta bwà kukòsa aci apu.

<sup>213</sup> Mpindyewu, nudi mwà kuya naaci nè kwà nàka, bààbúngì bàà kùdìbò mbayè naaci nè kwà nàka. Kàdi mémè ndi ngàmbe nè: “Aci cidi nè kàaci kaaba.” Bidi ànu mùdì mukòlò wà bisàbaatà; paùdì usùmbe mukòlò wà bisàbaatà, ndimì yidi munda mwàbi amu. Nè ncyà bushùwà. Paùdì usanganyiibwa mu Mubidi wà Kilistò, Nzambi ùdì nè mèèsà ònsò mùle nè bintu tètè, kaaba aka. Udi nè dinanga, Udi nè dìsàka.

<sup>214</sup> Mémè muyè ku mèèsà èbè awu nè musòmbe mwaba awu, wèwè kwamba nè: “Muyiishi, lwà ùdya naanyi,” ndi ngèla meeji nè udi munnangè. Nènku wèwè mwikàle nè nkùnde nè bilùngà byà mpàtaatà nè bilùngà byà kàrotè nè nzòòlo mukàlanga nè diwòji nè mabèèle matalaja, bitu byònsò bitèeka mwaba awu. Mòna's, ndi ngèla meeji nè nengikàlè mwakidila bilenga ku bilùngà ànu mùndì mwakidila bilenga ku nkùnde Cintu cimwèpelè ncyà nè, ndi ngiitabuujà nè nengikàlè mwakidila bilenga ku nzòòlo ànu múmvwà mwakidila bilenga ku diwòji amu. Byònsò bìdì ku mèèsà. Nènku cintu cimwèpelè cìndì mwà kwenza nkwamba nè: “Bwà luse udikù mwà kumpetsha ndambù wa diwòji adi anyi?” Nènku ndi ngiitabuujà nè mwoyi mwimpè wa mudìshikàmine, dinanga dyèbè kùndì, wèwè udi mufwànyine kwamba nè: “Ncyà bushùwà menemene, mwanèètù wanyi, kòsa citùpà cyàdì cinène.” Mmwòmò anyi? Bu mémè mwà kwamba nè: “Udikù mwà kuseemejila bilùngà byà mpàtaatà anyi?” “Mòna's, cyà bushùwà, mwanèètù wanyi, s'ki byòbi ebi.”

<sup>215</sup> Nè dibènesha dyònsò dyà bupikudi dyàkafwilà Yesù Kilistò nè kusùmbe ku difuta Dyèndè dyà cibawu ku Kàlvaryò òdi, nditèeka pa mèèsà nè mwena kwitabuujà yònsò mmusòmbe kumpàlà kwàdì. Alèluuyàh! Mémè mwikàle dijinga nè dyondopa, ndi ngàmbe nè: “Taatù, mpèeshèkù ndambù wa dyondopa,” nè ndi ndipòngolwela mu dilòngò dyànyì nè ndya cyà cinène. . . Mpindyewu, wèwè muswè kufwa nè nzala, sòmbe. Èyowà's, mukalenge. Nè piikalàbi nè ncipròfetà, dyakula mu myakulu. . .

<sup>216</sup> Nè—nè pashiishe muntu awu kufùndayè mwòmò amu, kàvwa mumanyè nè mémè mvwa mwakùle. . .mvwa mwakùle mu myakulu mémè mwinè to. Nè yèyè ùdì ùfùnda mukàndà ewu, nenùsanganè nè necitangalakè mu matùngà. Nè pa kuumusha cyòcì aci, muntu ewu ùdì nè bambi makùmi àbidì nè bàtaanu bàà dipòkò bàà Cìlongelu cyà Bible cyà Moody bènda bàkèbangana nè dipà dyà dyakula dyà mu myakulu. Bantu beena nè ànu mùdìbì bifùnda abu mbatònkòke panshì. *Mwoyi wà bwena Kilistò*, ewu—ewu ngondo, tàngilàayi cikàndàkàndà cyà *Mwoyi wà bwena Kilistò* cyà ngondo ewu, pa dibèji dyà

dikùmi nè citèemà, nè nùtàngilè docteur munène mu bunzambi awu, wàkamba nè: “Netwitabè eci anyi? Tudi bajimije cintu kampàndà anyi?”

<sup>217</sup> Ndi ngùmvwa mvùla wabúngi wènda ùlwa! Nudi nè bantu bàcìkònyangaja mu ditumba, kàdi byàfiki mu mùshindù wà nè Nzambi ùdi ùpèèsha bàà Bisàmbà byà bendè dinyùkushiibwa nè dibàtiiza dyà Nyumà Mwímpè, uMupòngolola nè kaabujimà Kèndè kònsò nè makolè nè bimanyinu nè maalu à kukèma. Cìndi mukwàcile. . . beena Mpenta bàvwa biipàcìibwe pambèlu mu disangu nè kulalukabò pa bintu byàbúngi mùshindù awu, cikondo kacivwa cyànji kukùmbàna to. Ke bwà cinyi mbapete dikolesha dyònsò dyà maalu edi. Kàdi aci mmulayi wà Nzambi wà Bunzambi nè Díyi dyà Nzambi dyà Bunzambi, nè Dyòdi didi nè cyà kukùmbana bwalu Nzambi ùkaadi mumanè kwamba nànkù. Nènku ndi ngùtabuuja nè pabwìpi menemene nè ndekeelu wa cipungu cyà bàà Bisàmbà byà bendè Nzambi nèapongololè pa biitabi bàà maalu ànu mùdiwu.

<sup>218</sup> Nudi mwà kucìbala mu *Reader's Digest* ngondo ewu, cikàndàkàndà cyàcì cyà ngondo wa cimungu wa mashika ewu. Ndàayi nùkacitàngilè, mùshindù wùvwà muyiishi wa ba-Méthodistes uvwa mu cyambilu kuntwaku, mwikàle ùsambidila muntu mulùme uvwa mulàadika mwab'awu ùpunga nè lufù pa bulàalù bwà lùpitaadi, nè buntèmù bwà Nyumà Mwímpè bwàkalwa nè muntu awu wàkondopiibwa ànu mu cità nè cità. Àlèluuyàh! Bushùwà's. Nzambi ùdi nè dyondopa dyà kùdi Nzambi disòmbe pa mèèsà apa! Yèyè ùdi nè cipròfetà cisòmbe pa mèèsà apa! Ùdi nè dyakula dyà mu myakulu pa mèèsà apa! Ùdi nè mapà citèemà à nyumà mu Mubidi, nè udi mwakidila bilenga ku dyònsò dyà ku ówò awu! Àlèluuyàh! Èyowà's, mukalenge, s'ki twètù aba.

**Neikalè. . . Ku ndekeelu kwà bàà Bisàmbà byà bendè, beena Yudà nebàpinganè anyi?**

<sup>219</sup> Èyowà's, mukalenge. Mifùndu yàbúngi, mwanèètù wa bakàji, mwanèètù wa balùme, nànsha yèyè mwikàle nganyì. Yowèlè ng'ùmwe nè: “Cyàkashiyàbo kùdi mukùmbi wà ngàzamà, mukùmbi wà hazilà wàkacidyà,” nè bikwàbò, mucì awu. Nè Yesù wàkamba Yèyè mwinè mùvwàbo mwà kubèngiibwa nè bikwàbò byònsò. Kaa, Mufùndu wònsò nkòòng, Danyèlè nè myaba yònsò, wùdi wùcyàmba. Èyowà, Yesù wàkamba nè: “Panùdi numòna mucì wà mfigi wèla ntòngà, nùmanyè nè cikondo cikaadi pabwìpi.”

Ndi ngèèla meeji nè lukwàbò elu lùdi pa cyòcì eci:

**6. Udi witabuuja nè dyalukila dyà beena Yudà—dyà beena Yudà mu Palèstinà didi dyula dyà cipròfetà cyà Bible anyi? Tuvwa bumvwe bamba nè uvwa uya ku Palèstinà, aci ncilelèlè anyi?**

<sup>220</sup> Èyowà's. Èyowà's, mukalenge. Lekèlè nzwambileku cintu kampàndà, cimwè cyà ku bidì bitàmbe bunène. . . Wèwè muswè

bwà kumanya nè tudi mu cikondo kaayi cyà cidimu, tàngilà ku kabala matùkù. Wèwè muswè kumòna nè ndìbà kaayi dyà bufùkù, tàngilà ntankù. Wèwè muswè kumòna nè mmu ditùkù kaayi mùdì nè mwoyi, tàngilà mwaba wùdì beena Yudà bàsanganyiibwa. Ke ntankù wa Nzambi nyèyè awu.

<sup>221</sup> Kàdì tàngilàayi's! Bufùkù mene, ditùkù mene, òwà Mwanjèlò wa Mukalenge mutuutakèene naanyi adi, cidimu cyà 1946, mu ditùkù dyà mwandamutekète dyà ngondo wa lumùngùlù adi, ku Green's Mill, mu Indiana, ditùkù òmwèdìwè adi cipungidi cyà ditalala cyàkatwibwa cyàlà bwà beena Yudà nè bàvwa bajaadikiibwe bu ditùnga bwà musangu wà kumpàlà munda mwà bidimu binunu bìbìdì nè nkàmà yitaanu. Àlèluuyàh!

<sup>222</sup> Nènku, dilòlò edi, dibèndelà dyà ditàmbe kwikala dyà kale pa buloba bujimà, mùtootò wà matumba àsambòmbò wà Davìdì, didi dìpeepa pa Yèlusàlèrà bwà musangu wà kumpàlà munda mwà bidimu binunu bìbìdì nè nkàmà yitaanu, kacya bààya naabò mu bupika mu Baabùlòònà. Yesù wàkamba nè: "Panùdì numòna mucì wà mfigì wèla ntòngà." S'ki wòwò awu! S'ki Yèyè awu nè: "Nùyìlè lusumwinu. Nwènù nyàwù nwamba nè 'muvù wà luuya ùkaadi pabwipi.' Panùdì numòna eci, nùmanyè nè cikondo cìkaadi ku ciibi." Tudi ku cikondo cyà ndekeelu mene.

<sup>223</sup> Tàngilàayi mùdì "cinyangu" cyà Danyèlè, nè bikwàbò, nudi bamanyè's, pàakambà Yesù apu. "Pààlwà Mfùmù munène awu, Yèyè neàmbe cipròfeta cyà—cyà matùkù cinunu nè nkàmà yìbìdì nè makùmi àsambòmbò," àvwà miikàle bidimu bisàtù nè ngondo yisambòmbò. Ke matùkù menemene àvwà Yesù muyiishè. Yèyè wàkalwa kùdì beena Yudà nkààyabò, dìbà adi Yèyè neàshipiibwè bu—bu mulàmbù bwà bantu. "Nè cinyangu aci cidi cyènga kabùtù," ba-Mùzùlùmanyi bààkaasa Mòskè wà Omar mwaba awu. "Nè bàvwa nè cyà kudyatakaja bimanu byà Yèlusàlèrà ku makàsà too nè" (yoyòyò! Too nè ku cinyi?) "pàakùmbanà cipungu cyà bàà Bisàmbà byà bendè." Nè pashiishe Yèyè neàpinganè cyàkàbìdì kùdì beena Yudà, nènku aci mpènzekà Mvità yà Haamagidòònà. . . Mwaba awu Yèyè wàkabìkila bàà Bisàmbà byà bendè, bwà kupàtula cisàmbà bwà Dìnà Dyèndè, Mukàj'Èndè-musèla. Mònaayi's. Èyowà's, mukalenge. Binunu lukàmà nè makùmi ànaayi nè bìnaayi byònsò abi mbeena Yudà bapikula bàdì nè cyà kwanji kwimana mwaba awu abu. Bònsò aba . . .

<sup>224</sup> Pashiishe pàangaciibwà Èkèleeziyà, Mòsà nè Eliyà bàdì bàmwènèka, mu Bwàkabuulwibwà 11, nè bàbàyiisha Yesù Kilistò. Nè Nyumà Mwìmpè mmuumùshìibwè ku bàà Bisàmbà byà bendè, nè Dyambwibwa dilwa bwà Èkèleeziyà kwangaciibwayè muulu. Nè beena Yudà bàdì bashààle kaaba aka aba nebàyiishiibwè munda mwà bidimu bisàtù nè citùpà, bwalu yèyè mmwambè nè: "Kùcidi mbingu makùmi mwandamutekète micìkàle ànu mikòsela cisàmbà Cyèbè, nè

Maasiyà neùmushiibwè munkacinkaci mwàyì.” PàngaciibwàYe, bàà Bisambà byà bendè nebàpeebwè kaaba, nè pashiishe kupetabò bidimu bikwàbò bisàtù nè cyàbibidì cìmwè cyà kuyiishiibwabò, bwà Yesù Kilistò.

225 Ncyà bushùwà, beena Yudà bàdi bàlwa. Nè ndi ngèèla meeji, mwanèètù, nè patwàfikà ku Pàlèstìnà cikondo eci. . . Kaa, sambilaayi! Bàdi munkaci mwà kubala Bible awu.

226 Ànu dīyī dikwàbò dimwèpelè dyà kwamba, pashiishe ndi nè kakonko kakesè, kīpī mwab’ewu, nè ayi ke yònsò yàyi. Elu nūnku lùdì mwab’ewu elu ngèèla meeji nè ndisambila kampàndà.

227 Tàngilàayi eci! Docteur Reidhead nguvwa wamba, mwimàne mwaba awu uyiikila nè Mùzùlùmanyi kampàndà wa meeji matwè. . .

228 Mpindyewu, mpaayi maci ènù. Mùzùlùmanyi kampàndà, mvwa mubàpetè batwè ku binunu makùmi àbidì bàlwè kùdì Mukalenge Yesù pààkamònàbo bimanyinu nè maalu à kukèma mu Àfrikè mwàmwa. Eci. . . Anyi, to, kī mbinunu makùmi àbidì to; bàvwa binunu makùmi àsàtù mu bònsò. Ngèèla meeji nè bàvwa binunu dikùmi bijimà bààkalwà, bwalu ciibúngì cinènè cìvwa—cìvwa cyà baaMuzùlùmanyi. Nènku pààkiimanàbo mwaba awu, ke mèmè kwamba nè: “Nganyi wa ku baprófetà beènù bàà mu ntempèlù udi mwà kufikisha muntu ewu ku disàngala?” Mèmè nè: “Ndwèpì lwà ku mpingù yènù, yènù nwènù beena kalaba, lùdì mwà kusàngaja muntu ewu?” Mèmè nè: “Nànsha lùmwe lwà kùdīyi! Muprófetà nànsha umwe mu ntempèlù. . . nè mwakwidi nànsha umwe, èyowà’s.” Ke mèmè kwamba nè: “Lupingù nànsha lùmwe kalùvwakù mwà kucyènza to. Nànsha mèmè pàànyi ncìvwa mwà kucyènzakù to. Kàdi Nzambì wa mu Dyulu mmubiishe Mwàn’Èndè Yesù Kilistò Udi nè mwoyi munkaci mwà bantu leelù ewu ewu, Udi mumwondàpe yèyè mujimà bu munùdì bamumòne mwimàne emu.” Muntu mwikàle nè munyòòlolò mu nshìngù mwèndè, bàvwa nè cyà kumulombola bu mùdì kabwà. Mu kasunsa kàmwe kàà dībà ùkaavwa mwimànyine kuulu, mwèndè nè kale nè musàngàle.

229 Ke Docteur Reidhead kungambilayè dilòlò adi patùvwà basòmbe mwaba awu mu màshinyi, yèyè nè: “Kaa, ekèlekèle!” wèla meeji pa bwalu abu’s. Yèyè kwamba nè Mùzùlùmanyi ewu wàkalwa kùdīye, nè kwambayè nè ùvwa wàkula nè Mùzùlùmanyi ewu, muntu mumanyi wa dibàla wa dikèma. Yèyè nè: “Èè, mukalenge, bwà cinyi kùyiku ulekela muprófetà webè wa kale mufwè awu, Muhamàdi?”

230 Mpindyewu, vùlukàayi nè, ba-Mùzùlùmanyi bàtu bìtabuuja Nzambì. Kule kwàka mu—mu Àfrikè, “mbeng” munène, “ngonga,” bilembèlèlè mùshindù ewu. Nè bàdi bàngata mombu munène wa cindundu nè bàmutuuta mùshindù awu, nè ùdi ùdila mu ditùnga dijimà. Nè Mùzùlùmanyi yònsò ùdi wimana, nè mwakwidi ùpàtukila ku lusongo lwà ntempèlù aku, nè wamba

nè: “Kùdi Nzambi umwèpelè mulelèlà nè udi nè mwoyi, nè Mùhamàdi mmupròfetà Wendè.”

<sup>231</sup> Ke bàna bàà Ishàmèèlà mbòbò abu. Nwamònu’s, Hagàà, bòbò mbàna bàà Abraham bàdi bapàtùkile mu Hagàà. Nwamònu anyi? Bàdi biitabuujà Yèhowàh Nzambi mulelèlà, kàdi bàdi bèèla meeji nè Yesù... (Aci cìvwa... Yèyè ùdi Mupikudi *wetu*, mutùmiibwe kùdi bàà Bisàmbà byà bendè kùdi mukàji mudishikàmìne; Izàkà, nwamònu’s, nè kupicila ku Sarah). Nènku mpindyewu, bàvwa bapàtùkile kùdi Hagàà, Ishàmèèlà, ke kulwabò ba-Mùzùlùmanyi.

<sup>232</sup> Ku lukità lwà Mùhamàdi, bikèngela nùye kamòna, bìdi bikèmesha, lukità lunène kuntwaku. Nè kùkaadi bidimu binunu bibìdi bìvwàbò batèèkakù kàbalù katòoke kaswikila cibàsà cyà disòmbelapù, kiimàne mwaba awu. Mùhamàdi mmulayè nè neàjuukè ku bafwè dīngà ditùkù nè kutùpikilayè pa kàbalù aku nè kucimunayè buloba. Nè cikondo—cikondo cyònsò bàdi ànu bàshintulula kàbalù bàaluja kakwàbò; bindile mwaba awu nè mulami wa lulamatu, mwimàne, mwindile bwà Mùhamàdi àbiikè ku bafwè. Bidimu binunu bibìdi bikaadi bipite kubangila ànu piinè apu.

<sup>233</sup> Bàdi biitabuujà Yesù, bàdi bàmba nè Yèyè ùvwa mupròfetà. Pa bimanu byà Yelusàlèma wa kale apu kùdi mwaba wà cijila munène mwibaka, awu wùdi bwà Mùhamadi kulwamù. Nè kazùbu kakesè menemene kàà cijila mwaba awu, mbwà Yesù. Nwamònu’s, bàakamba nè: “Yesù kàakapoopediibwa pa nkùrusè to, bàvwa bònsò basopàkàje cintu aci.” Bàkamba nè: “Wàkabànda pa kàbalù nè kukèndesha kuya.” Nwamònu anyi? Mpindyewu, bòbò—bòbò bàdi biitabuujà nànkù.

<sup>234</sup> Bàdi nè katòba kakùnze pankaci pàà mèsù àbò. Bantu bàdi bàya ku Inde kwàka, nenùkàmònè. Ekèlekèle, nebiimànè mwaba awu binunu nè binunu.

<sup>235</sup> Ke pashiishe Docteur Reidhead kwambayè nè ùvwa mwimàne mwaba awu, ke kwambayè nè: “Mpindyewu, bwà cinyi kùyikù ulekela mupròfetà wa kale mufwè awu bwà kwakidila Ewu Udi mubiikè ku bafwè awu, Kilistò udi nè mwoyi?” Mpindyewu, yèyè ùvwa mumanyi wà dibàla nè wàkamanya mwà kutèeka mèyi èndè.

<sup>236</sup> Kwambayè nè Mùzùlùmanyi awu kumutàngilayè, (muntu wa meeji matwè, mulongè tulaasà, münwemu mene mu Àmèrikè, ùvwa mulongè tulaasà münwemu emu) yèyè nè: “Mukalenge, mukalenge wa musàngèelu, cìdi Yesù webè mubiikè ku lufù ewu mwà kungenzela ncinyi kutàmba cìdi mupròfetà wanyi mufwè ewu mwenzè?” Yèyè nè: “Mupròfetà Wanyi mufwè mmundayè Mwoyi paanyimà pàà lufù. Ke cyàkenzà Yesù webè awu’s.” Èè, yèyè’s ùvwa nè cintu kampànda. Yèyè nè: “Mpindyewu, bònsò bàbìdi bàakafùnda mukànda. Udi witabuujà ewu wàkafùnda Yesù awu, mèmè ndi ngiitabuujà ewu wàkafùnda Mùhamàdi

awu. Bònsò bàbìdì bààkalaya Mwoyi.” Yéyè nè: “Ncinyi cikwàbò cidi Yesù webè awu mwà kungenzela kutamba cidi Mùhamàdi wanyì—wanyì mwà kungenzela?” Èè, muntu awu, mu maalu mapeepèle, s’mbulelèlè. Yéyè nè: “Kàdi anji indilà kakesè, mukalenge wa musàngèelu.” Yéyè nè: “Mùhamàdi wanyì kacya kàtukù mundayè bintu bu mwàkalaya Yesù webè awu to. Yesù webè wàkalaya. . . Bàākamba nè: ‘Yéyè wàkabiika ku lufù,’ nè ùvwa nè cyà kwikala neenù dîbà dyònsò, too nè ku ndekeelu kwà buloba; nè bimanyinu bimwèbimwè nè maalu à kukèma byàkenzàYe abi, nwènú nudi bafwànyine kàbìdì kwenza, too nè ku ndekeelu kwà buloba. Nudi bafwànyine kwondopa babèèdi, nè kubiisha bafwè, nè kukezula beena nsudì, nè kwipata badémons.” Yéyè nè: “Ndi mulonge bwena Kilistò, mu ndòndò.” Yéyè nè: “Mpindyewu ndekèlaayi nwènu balongeshi nnùmòne nupàtula Yesù Kilistò, nènkú nèngitabuujè nè yéyè mmubiike ku bafwè. Kàdi, pa kuumusha cyòci aci. . . Mùhamàdi kacya kàakatulayaku bintu bu nànkú to, yéyè wàkatùlaya ànu Mwoyi paanyimà pàà lufù. Nènkú ncintu ànu cyòci cimwècimwè aci cyùdì ulongesha, nè ucinguluka cikwàbò.” Muntu awu ùvwa mubingè, Mùzùlùmanyi awu ùvwa mubingè ànu menemene.

<sup>237</sup> Docteur Reidhead kwambayè nè wàkiimana nè kudila mwadi. Yéyè nè: “Mwanèètù Branham, wèwè kundwila mu meeji.” Ke kulwayè lùbilu mwaba ewu, nè kubwela, ke mèmè kumutentekela byanza, nè dibàtiiza dyà Nyumà Mwimpè dyàkalwa pambidi pèndè. Nènkú mpindyewu ùdi ùmòna nànsha bikèènà-kumòna nè bikwàbò byònsò. Mpindyewu lekèlaayi ànu Mùzùlùmanyi awu àtwilanganè nendè! Yéyè’s mmuntu mushiilàngàne!

<sup>238</sup> Ndi ngàmba nè Yesù wetù wàkabiika ku bafwè, Yéyè ùdi nè mwoyi leelù ewu. Nè Yéyè ùdi wènza bintu bimwèbimwè abi leelù ewu byàkenzàYe musangu awu, bimanyinu nè maalu à kukèma byà mishindù yònsò. Nè nwènú bantu beena nè ànu mùdìbì bifùnda nudi basòmbe mu nyungulwilu emu nuteeta bwà kuumvwija mùdìbì kabiyi nànkú, nè nupangila citùpà mene cyà nshindameenu cyà Bible. Aci ncyà bushùwà menemene. Yesù Kilistò, Mwànà wa Nzambi mubiike ku lufù awu, ùdi mwà kwakwila mu myakulu mikwàbò ku wèwè, Yéyè ùdi mwà kwamba cipròfeta ku wèwè aku, Yéyè ùdi mwà kuleejila bikèènà-kumòna ku wèwè, Yéyè ùdi mwà kwandamuna myakulu myenyi ku wèwè. Nè byònsò abi ncitùpà Cyèndè.

<sup>239</sup> Nè kwangata *eci* citùpà Cyèndè nè kushiya *cyàcyà* citùpà Cyèndè, ncifwànyine kwikala bu kunkòsa mu bitùpà bibidi nè kwangata cimònu cyànyì nè mikòlò kàdi kwamba nè udi naanyì, paùdì kùyì mwà kwakidila *eci* citùpà.

<sup>240</sup> Anyì udi nè cyà kungaakidila mèmè yònsò. . . Nènkú ke bwà cinyi mèmè ndi muyiishi wa Èvànjeeliyò mu kaabujimà udi witabuujà nè byònsò bìdì Nzambi mwambè nè m’Bulelèlè. Amen! Butumbi’s wè! Ndi ndyùmva ànu bu munsantu

mubùnguluki wa mu malaba patùdì twakulangana apa. Èyowà's, mukalenge. Ndi muCitàbùùje!

**7. Maatàayi 24.29, ùdì wàkula bwà “Dìbà dilwa mìdimà, ngondo kàakufila bukênkè bwèndè to, nè mìtootò neyiponenè mu dyulu.” Eci necyènzekè kumpàlà anyi paanyimà pàà Dyambwibwa, anyi pabwìpi menemene nè Yesù kulwa bwà ku . . . kukòokèsha pa buloba?**

<sup>241</sup> Ku dyànyì diitabuuja dyà dipwekèlè, mpindyewu, ncyèna mufwànyine . . . Ncyèna mumanyè to, ngèèla meeji nè ùdì wakula bwà Maatàayi 24, mwaba awu. Mpindyewu, Yesù wàkula bwà mìtootò nè bikwàbò bintu bidì bimata, ndi ngiitabuuja nè aci cidì ànu kumpàlà kwà Cikondo cyà Dikènga dikolè kutwàdijiibwadì pa buloba.

<sup>242</sup> Mpindyewu, ndi nè meeji à pabwàwù kaaba aka nè bààbùngì bàà kunùdì nebiikale mwà kupanganangana naanyì pa cyòci eci, mòna's, ndi ngèèla meeji nè bàmwè bàà ku bikondo byà kale bàdì bùumvwa dilongesha ditwàkapìcilàmu. Nwamònu's, ncyèna ngiitabuuja nè Èkèleeziyà nèapicilè mu Cikondo cyà Dikènga dinène to. Mèmè ndi ngiitabuuja nè Èkèleeziyà nèapicilèmu . . . Tàngilàayi, mèmè . . . Mùshindù wùmwèpelè wùndì ndongesha Dipungila Dipyadipyà nku mundidimbì wà Dipungila Dikùlùkulu, ànu mùdì Nyumà Mwimpè kaaba aka bwà ditùkù dyà nsabatu nè bikwàbò. Byònsò bidì mundidimbì kale wàwa.

<sup>243</sup> Mpindyewu, tàngilàayi kale wàwa mu Dipungila Dikùlùkulu. Panùdì numòna bipùpù bimata, bìvwa mu Èjiipitù. Kì mmwómò anyi? Nè Nzambi úvwa munkaci mwà kupàtula bantu Bèndè bwà kuya naabò ku buloba bulaya. Ncyà bushùwà anyi? Kàdi Izalèlèlè kàakapetakù cipùpu nànsha címwè to. Ànu mùvwà bipùpu . . . kumpàlà kwà kutwàdijaci, bààkabwela mu Goshènè. Ncyà bushùwà anyi? Nè dìbà kacya kadyàkabwìcidila to, nànsha tumwe katwàkalwa to, nànsha ndimbà kayìvwamù to, nkùsù nànsha umwe kàvwamù to, nànsha bipeepèlè bikole kabìvwamù to, mipenyì yà mvùla kayìvwamù nànsha, kakùvwa dishipiibwa dyà bimunà nànsha, nè bintu byònsò bìvwàbo naabì bìvwa bikùbìibwe mu Goshènè. Ncyà bushùwà anyi? Ncìfwànyikijilu cyà Èkèleeziyà udi uya ànu kumpàlà kwà Cikondo cyà Dikènga dinène. Yesù wàkamba nè: “Pààbangà bintu ebi kwenzeka, ambùlùlaayi mutù wènù, bupikudi bwènù bùkaadi pabwìpi.” Nwamònu anyi?

<sup>244</sup> Ndi ngiitabuuja nè ngondo nè dìbà nè mìtootò . . . Pashiishe bààkamba nè . . . Tùngunukà nè kuCìbala, wàmba nè: “Nè bantu bànyeema bènda bàsokoma mu . . . nè bàdìshìnda pa yàbò . . . kukèbabò bwà kudishipabò bóbò biinè, kàdi kabàyi mwà kucyènza to, nè bikwàbò byònsò.” Ndi ngiitabuuja nè aci cidì cyènzeka ànu pabwìpi nè Dikènga dinène.

245 Mpindyewu, tàngilàayi, Dikènga dinène didi dilwa. Pàdi Dikènga dinène didituuta, Èkèleeziyà ùdi ùbànda. Mpindyewu, vùlukaayi nè, ànu èkèleeziyà wetù wa pàtupù ewu udi kàyi nè Nyumà Mwímpè ke udi upicila mu Cikondo cyà Dikènga dinène. Ànu Basungula mbàdi bàya.

246 Kaa, ndi mufwànyine kulaaba cintu kampànda cyà cicolè kaaba aka, ànu bwà katanci kakesè cyanàana. Nudikù mwà kumpèesha kàbidi tusunsa túsàtù anyi? Ncinyi cidi ba—bantu bàdi bambwibwe abu bàbiikidiibwa, mbàshàadilè anyi? Mmwômò anyi? Èyo. . . Ndi—ndi muswè kwamba nè m—m’Mukàji—musèla. Mpindyewu, bàshàadilè bàvwa bashàale.

247 Mpindyewu, pàdi mukàji uya bwà kakòsa citembelu bwà jipè, nudi nwakula bwà cyòci aci. Ùdi wàdija cilàmbà (mmwômò anyi?), cipese cyà cilàmbà. Nènku ùdi wàdija citembelu cyèndè pa cyòci eci. Ùdi ùsungula mwaba wùdi citembelu nè cyà kukòsediibwa. Mmwômò anyi?

248 Kaa, mwanèètù, eci’s cidi cìnwènzela bìmpè menemene: Nganyi udi usungula? Nzambi ngudi usungula’s! Mmwômò anyi? Ki mmèmè udi nè cyà kwamba to, n’Yèyè udi nè cyà kwamba. Nè Yèyè ùdi ùtèeka citembelu pa ewu udi Yè muswè. Ncyà bushùwà anyi?

249 Mpindyewu, kùvwa baavirgò dikùmi bàakapàtukà bwà katwilangana nè Mubàki. Ncyà bushùwà anyi?

250 Nganyi udi “virgò”? *Virgò* mbwena kwamba nè “mukezùke, wa cijila.” Ncyà bushùwà anyi? Nsongàakàji virgò n’nganyi? Mmwànà wa bakàji utu kacya kàyiku mwànji kulengiibwa to, yèyè m’virgò. Ncintu kaayi cidi cikezùke, bu mùdi màfutà mapyamàpyà à olèvà? Mbwena kwamba nè àvwa mataaciibwe too nè mùdiwu àsaganyiibwa mu bu-virgò bwàwò, mmakezùke. Ngòlò mupyamùpyà ncinyi? Ndìbà didi dimòmà dyònsò. . . dyengùlùkile mu kapyà nè bintu byònsò nè bisabisha bipàtula dimòmà dyònsò. Ncyà bushùwà anyi? Cyamù cifilke cyònsò nè bunyingunyingu bwà soufre, nè bikwàbò byònsò, mbisàbìshìibwe, ùdi ànu mu bukezùke bwèndè.

251 Mpindyewu, kùvwa dikùmi bàakayà bwà katwilangana nè Mubàki. Ke mwàkambà Yesù. Ncyà bushùwà anyi? Mbanganyi bàdi biitaba aci, bàmbè “Amen.” [Disangisha didi dyamba nè: “Amen.”—Muf.] Dikùmi bàakaya bwà katwilangana Nèndè. Mpindyewu, tàngilàayi, bònsò bwàbò bàvwa bàà cijila. Èè, bwà kwikala bàà *cijila* bìvwa bìkèngela bwà kwikalabò “bajidiibwe,” bwalu ke dikezula dimwèpelè ndyòdi adi, musùlù wà cijila wùdi Nzambi naawù awu, ndijidiibwa. Ncyà bushùwà anyi?

252 Mpindyewu, tàngilàayi. Bònsò dikùmi abu bàvwa bajidiibwe, kàdi bàtaanu kabàvwa nè Maanyi mu myèndù yàbò to, nè bàtaanu bàvwa nè Maanyi mu myèndù yàbò. Ncyà bushùwà anyi? *Maanyi* àdi àleeja cinyi? Mpindyewu,

kí mbukezùke, anyì bu-virgò to. *Maanyi* àdi àleeja “Nyumà Mwímpè.”

<sup>253</sup> Mpindyewu, bu mèmè mwà kwamba eci kùdì . . . nè kunùtapa kakesè ku mwoyi, ncyènà muswè kwamba mu mùshindù wùndì ncyàmbe ewu to. Mpindyewu, nwamfwilaayikù luse, nè kanùshààdikù kule nè èkèleeziyà to. Mèmè ndi mu cyambilu emu ànu bwà kuteeta kunùkwàcisha. Nwamònu anyi? Mpindyewu, tàngilàayi, lekèlaayi nnùleejè.

<sup>254</sup> Kakwènakù èkèleeziyà kampàndà pa buloba apa udi mwà kwikala nè nsòmbelu wa mutàmbe kukezuka kutàmbe ba-Nazaréens mu malongesha àbò to, ba-Pèlerins de la Sainteté nè bakwàbò abu. Ncyà bushùwà anyi? Kakùyì mpatà to bàdi bìitabuuja bukezùke bwà dijidiibwa, kí . . . nànsha too nè bààbò bakàjì kabèèna bàvwàla tukànu, nè cintu kanà cyònsò to. Bukezùkè nè dijidiibwa, mùshindù wònsò, bàdi bàciitabuuja. Malongolodi à Cijila awu, beena nè ànu mikenji bònsò abu, ke dilongesha dyàbò ndyòdì adi, bàdi bàciitabuuja. Wa cijila! Bakàjì biikàle nè nsukì mile nè njipè mile. Mulùme kàyì nànsha mwà kuvùnga mabòkò à mutèèlù wèndè to, bààbùngì bàà kùdìbo. Bintu byònsò, kàyì nànsha mwà kulenga . . . kunwà mfwankà, kunwà maalà, ní ncinyi . . . Nànsha cimwè cyà ku byòbì abi, nwamònu's. Wa cijila! Kwèna mufwànyine kwikala nè nsòmbelu mukezuke kubàtàmbe to.

<sup>255</sup> Kàdi ànu èkèleeziyà wa ba-Nazaréens umweumwe awu, muntu yéyè mwà kwakula mu myakulu mu èkèleeziyà, s'vàwva bafwànyine kumukùpa pambèlù pàà ciibi apu. Nè bàwva bàmba nè kabàwva bafwànyine nànsha kusòmba nè muntu bu nànkù to. Mpindyewu, aci's ncilelèlè. Wèwè kùyì ucìitabuuja to, citeetebì musangu wùmwèpelè, kàdi ùjandulè. Jandùlèbì musangu ùmwèpelè. Bàdi bàkina meeji mene à cintu aci. Bàmba nè: “Ndyabùlù!”

<sup>256</sup> Bàtaanu bàà kùdìbo . . . Bònsò dikùmi bàwva baavirgò. Bàtaanu bàwva nè Maanyi mu myèndù yàbò, nè bakwàbò bàtaanu bàwva ànu bakezùke nè bàà cijila kàdi kabàwva nè Maanyi to (bàwva bajidiibwe, kabàyi nè Nyumà Mwímpè to).

<sup>257</sup> “Kùdì bàsàtù bàdi bàfila bujaadiki pa buloba: màyi, mashi, Nyumà.” Yone Munsantu 5.7 . . . Yone wa Kumpàlà 5.7, èyowà's wè, mmwambè nè “Kùdì bàsàtù bàdi bàfila bujaadiki mu Dyulu: Taatù, Mwàna, nè Nyumà Mwímpè, bàsàtù aba bàdi Umwe. Kàdi kùdì bàsàtù bàdi bàfila bujaadiki pa buloba: màyi, mashi, nè Nyumà, kabèèna umwe to kàdi bàdi bùumvwangana bu umwe.”

<sup>258</sup> Mpindyewu, kwèna mwà kwikala nè Taatù kùyì nè Mwàna to. Kwèna mwà kwikala nè Nyumà Mwímpè kùyì nè Taatù to, Mwàna, nè Nyumà Mwímpè. Bàdi Umwe. Wèwè . . . Kabèèna mwà kutàpuludiibwa to.

<sup>259</sup> Kàdi udi mwà kubingishiibwa kùyì mujidiibwe to. Nè udi mwà kujidiibwa kùyì nè Nyumà Mwímpè to; kwikala mukezùke,

kwikala nè nsòmbelu mukezùke, kàdi kwikala nè cimwènekelu cyà difwàna dyà Nzambi, kàdi kuvila Bukolè bwà dyondopa nè dyakula dyà mu myakulu nè mapà manène à Nzambi (nè dyònsò dyà kùdiwu Mwómò amu).

<sup>260</sup> Ke baavirgò bèèbè bàtaanu bàvwà nè Maanyì mu myèndù yàbò mbòbò abu, Diitabuuja dyà Dyambwibwa, biikàle biitabuuja bimanyinu byònsò, maalu à kukèma, bipròfeta, nè bikwàbò byònsò. Nè bàtaanu aba bakòsa mu bàshààdilè bààkuumushiibwa.

<sup>261</sup> Nè bakwàbò abu bàvwà ànu baavirgò nè kabààkujimina to, kàdi nebàpicilè mu Cikondo cyà Dikènga dinène. Yesù wàkamba nè “Nekwìkalè. . .”

<sup>262</sup> Ke kwambabò—kwambabò nè: “Tùpèèshaayikù ndambu wa Maanyì ènù awu, tudi dijinga nè Nyumà Mwímpè mpindyewu.”

<sup>263</sup> Mpindyewu, muntu kanà yònsò ewu mmumanyè nè Nyumà Mwímpè, Zekàayi 4, nè, kaa, Yakòbò 5.14, bònsò mbamanyè nè— nè cidì cileeya Nyumà Mwímpè. Mpindyewu, bààkamba. . . Ke bwà cinyi tudi tulaaba maanyì, bìdi bìleeja Nyumà Mwímpè; mpindyewu: “Maanyì à Nyumà,” mùdi Bible mwàmbe.

<sup>264</sup> Mpindyewu, *aba* bàvwà nè Nyumà Mwímpè; nè *aba* bàvwà bajidiibwe. *Aba* bàvwà bajidiibwe *kusangisha* nè Nyumà Mwímpè, biikàle biitabuuja maalu à kukèma nè byònsò byà Bukolè bwà Nzambi. Cyònsò cyàkambà Nzambi Apa aci, bàvwà naaci, biikàle bàciitabuuja. *Aba* bààkambwibwa muulu.

<sup>265</sup> Nè *aba* kwambabò nè: “Tùpèèshaayikù, twètù, mpindyewu.”

<sup>266</sup> Bòbò nè: “Tudi naawù ànu bùngi bukùmbàne bwà kubwelamù naawù,” nènku ke bòbò bàyaaya mu Dyambwibwa abu’s.

<sup>267</sup> Ke kwambabò nè: “Ndàayi nùkasùmbe kùdi bàdi bànùsùmbishawù abu,” mwàkambàbo. Ke kuyabò bwà kuteeta bwà kusambila too nè ku ndekeelu dîbà adi, bwà kupetabò Nyumà Mwímpè, kàdi cipungu cyà bàà Bisàmbà byà bendè cikaavwa cijikè nè dikèngeshiibwa kukùtuka. Ke Yèyè kwamba nè: “Bààkeediibwa mu mîdimà yà pambèlu mwikalà myadi nè ditwà dyà mikèmu nè disùmakaja dyà mènù.” Kàdi mu dibìikà dyà ku lufù diibìdi bòbò nebiikalè mikòkò yidi mitàpùlùla nè mbùji, kàdi Mukàji-musèla nànsha, kî m’Musungula nànsha. Abu mbàshààdilè bàà ku Dimiinu dyà mukàji abu.

<sup>268</sup> Cishààdilè ncinyi? Katùpà kàdi kakòshìibwe, kashààle. Bilàmbà byà mùshindù wùmwèwùmwè awu. Ncyà bushùwà anyi? Udi ukòsa cilàmbà utela nkanzu ku calico, nè wolola mpeesà munène wa calico nè umukòsa umùpàtulumu. Wèwè ngudi usungula mwaba wùdi utèèka citembelu. Nzambi ngudi usungula pàdiYe utèèka citembelu aci. Ùdi ùcikosa bìmpè. Mmwómò anyi? Nè mpindyewu eci, cidì cishààle ku calico aka, cidì ànu calico kimpè bu kàdi ku nkanzu aku. Mmwómò

anyi? Kàdi's ndisungula dyà Nzambi. Nzambi ùdi ùsungula Èkèleeziyà Wendè, Nzambi ùdi ùdyànjila kulongolola Èkèleeziyà Wendè; Nzambi wàkadyànjila kulongolola cyòci aci, ùdyànjila kulongolola Èkèleeziyà Wendè, nè Yèyè ùdi ùpàtula Èkèleeziyà awu pambèlu! Nè bàshààdilè abu mbàdi nè cyà kupicila mu Cikondo cyà Dikènga dinène.

269 Ke mwaba wùdi balongi bààbùngì bàà Bible leelù ewu basopàkàjile maalu, bèèla meeji nè Mukàji-musèla ùdi ùsanganyibwa mu Dikènga dinène mwàmwa. Muntu mukwàbò wàkangambila, wàmba nè: “Neyèna mufwànyine kukwambila to, Mwanèètù Branham.” Yèyè nè: “Ndi mumòne Mukàji-musèla mu Dyulu. Nè dragon ùpwidija màyi mukana mwèndè bwà kwenza Mukàji-musèla awu mvità. Nè binunu lukàmà nè makùmi ànaayi nè binaayi abi, bìdi Mukàji-musèla awu, biimàne pa Mukùnà wà Sinàayi.”

270 Mémè nè: “Kaa, to. To. To. Udi mubicyòmpàkàje byònsò. Mukàji-musèla ùvwa mu Dyulu.” Nè bàshààdilè bàà ku Dimiinu dyà mukàji abu, kí nyèyè to. . . kí ncitembelu aci to, bàshààdilè bàvwà mwaba awu, nè dikèngeshiibwa (Bukalenge bwalàbàle bwà Loomò) pààdisangà cyena Kàtòlikè nè nebàsangishè makolè àbò pàmwè nè èkèleeziyà Munène awu.

271 Mòna's, bàdi ànu naaci. . . Cìvwa ku ntelèviziyò dilòlò adi. Èkèleeziyà wa ba-Méthodistes ùdi ùteeta bwà kusanga ba-Méthodistes nè ba-Baptistes nè èkèleeziyà yònsò mu kaabujimà yà Kilistò yidi yiteeta kudisanga nè cyena Kàtòlikè nè kwimana kumpàlà mu cyambilu cijimà amu. Mwèpiskòpò wàkamba cinyi pààkamulumbulwihàbo dilòlò adi, kuntu kwàka bwà diikala Communiste? Mvwa mwimàne, munkaci mwà kuditàngidilaci ku télévision. Tusumbu twàbò twònsò atu! Nè pàdi cikondo aci cìlwa, nekwikalè dikèngeshiibwa dyàjuukà. Dìbà adi Nyumà Mwimpè neàmatè, nè ba-Méthodistes, nè ba-Baptistes, nè bònsò, nebààkulè mu myakulu, bàtùmbisha Nzambi, nè bòndopa babèedi nè bàmba bipròfetà, nè bimanyinu byònsò nè maalu à kukèma nebùikalè munkaci wàmà kulwa. Basungula nebàbandè, nè bàshààdilè nebàshaalè mwab'ewu bwà kupicila mu Cikondo cyà Dikènga dikolè. Nè ku ndekeelu kwà cikondo, pààmònàbo cidì cyenzèke, nebikengelè bwà kupwekabò mu difwilà dyà diitabuujà.

272 Pashishe tàngilàayi. Wèwè udi wamba nè: “Èè, mpindyewu, Mwanèètù Branham, udi uswa kungambila nè nekwikalè. . . ke—ke bantu bìikalàku ku Cilumbulwidi cyà Nkwasa Mutòoke abu anyi?” Nebùikalè. . . Mukàji-musèla kààdyàkulumbulwishiibwakù to. To, mukalenge. Yèyè ùdi munda mwà Kilistò. MMunyi mùdi ubwela mu Kilistò? “Ku Nyumà umwe nkutùdi bònsò babàtìjìibwe mu Mubidi wùmwè.” Neyà bushùwà anyi?

273 Mpindyewu, tàngilàayi, tàngilàayi kùnweku.

Bible mmwâmbè nè: “Cilumbulwidi cyâkatwâdija, nè Mikândà yâkabuuludiibwa.” Ncyâ bushùwà anyi? Mikândà yâ bangènzâmpèkâàtù. “Nè Mukândà mukwâbò wâkabuuludiibwa,” wùdi Mukândà wà Mwoyi, nè muntu yònsò wâkalumbulwishiibwa mùshindù awu. Ncyâ bushùwà anyi? Nè uvwa ulumbulwisha nganyi? Yesù nè Bansantu. Yèyè nè: “Wâkalwa bwà kusadila, Udi wetù Mukùlumpile Matùkù awu, Mwena nsukì yìdi bu myòsà yâ mùkòòkò awu.” Ke yèyè nè: “Binunu dikùmi kuvudija ku binunu dikùmi kulwabò Nendè, nè kuMukwacila mudimu ku Cilumbulwidi.” Apa Yesù ùdi wâlukila bu Mfùmù nè Mukalenge-mukàjì, Dibàkà dyàjìkì, nè Yèyè mmusèlàngàne. Ke Mfùmù nè Mukalenge-mukàjì abu biimàne apa. Ke musumbà wà bajidiibwe awu mwimàne mwaba awu, Nzambì kwambayè nè: “Imànaayi ku dyâbalùmè dyànyì eku.” Ke Mukândà awu wâkabuuludiibwa, uvwa bangènzâmpèkâàtù nè: “Ikàlaayi ku dyâbakàjì Dyànyì.” Apa mbwòbò aba bàvwà nè ménà àbò mafùnda mu Mukândà wà Mwoyi wà Mwânà wa mùkòòkò.

274 Wèwè udi wamba nè: “Mwanèètù Branham, dìnà dyànyì ndifùndamù, nênye!” Anjì indilà kakesè! Yudààsà Mpongoloki wâkajidiibwa. Yoyòyò! Mwaanèètù, juukà mpindyewu, dicìnte, bwà wamòna mwà kuumvwa Eci, nudi numòna’s.

275 Yudààsà Mpongoloki, nyumà wendè ngudi mufwilakanyi nè Kilistò leelù ewu. Aci’s nudi bamanyè. Yesù ùvwa Mwânà wa Nzambì, mufùmìne kùdi Nzambì nè wâkaalukila kùdi Nzambì; Yudààsà uvwa mwânà wa kabùtù, mufùmìne mu ifernò nè mwâlùkile mu ifernò. Yesù wâkangata ngènzâmpèkâàtù uvwa unyingalala awu kuyaYè nendè; Yusààsà kwangatayè uvwa kàyì ùnyingalala awu nè: “Ní udi! Ní! Ní! Ní udi mwondopi wa kùdi Nzambì, enzàbi *cikampàndà*, Wèwè ní udi *Cikansanga*, enzà *cikankènga*.” (Nwamònu’s, cikonkelu aci mu Dìyì dyà Nzambì.) “Matùkù à bishimà àkaadi mamanè kupìta. Byòbì nànkù, anjì ndeejèkubi *eci*. Byòbì nè! Byòbì nè! Byòbì nè!” Nwamònu anyi?

“Byònsò mbilelèlè,” mwàkambà Nzambì.

276 Mpindyewu tàngilàayi. Yudààsà Mpongoloki awu wâkabingishiibwa ku diitabuuja, nè wâkiitabuuja Mukalenge Yesù Kilistò nè wâkabàtìiibwa. Bible mmwâmbè nè: “Yesù—Yesù wâkabàtìiiza bayiidi, bayiidi Bèndè.” Èyo.

277 Yone Munsantu 17.17, kumpàlà kwà Yèyè kubàtùma, Yèyè wâkamba nè: “Bàjidilè, Taatù, ku Bulelèlè. Dìyì Dyèbè m’Bulelèlè.” Nè Yèyè ùvwa Dìyì, kumpàlà mene kwà difuta dyà cibawu kwenjiibwadi. Mu ngaakwilù mukwâbò nè: “Bu didyànjila-kumòna, Taatù, dyà Mashi Àànyì meela panshì, Ndi njidila bòbò aba.”

278 Wâkabàpèèsha bukòlè bwà kulwisha nyumà yâ bukooyà, nè bààkapàtuka nè bààkiipata baadémons. Ncyâ bushùwà anyi? Nè bààkondopa babèèdi. Ncyâ bushùwà anyi? Ke kwalukilabò,

bajidiibwe, bènda bàcyònkomoka, bàtùpika, bèèla mbilà, nè bàtùmbisha Nzambi. Ncyà bushùwà anyi? Ke bóbò nè: “Nànsha démons miine’s yìwwa mitùkòòkèle.”

<sup>279</sup> Ke Yesù kwamba nè: “Kanùsànkì nè bwalu démons mminùkòòkèle to, kàdi sànkàayi bwalu mènà ènù mmafùnda mu Mukàndà wà mu Dyulu.” Mmwômò anyi? Nènku Yudààsà Mpongoloki uvwa naabò, umwe wa kùdìbo, mubiikila bwà kupàtuka, mujidila, nè dìnà dyèndè difùnda mu Mukàndà wà Mwoyi wà Mwànà wa mùkòòkò. Balàayi Maatàayi 10 bwà kumòna ní kì ncyà bushùwà. Yèyè wàkabiikila muntu nè muntu wa kùdìbo, nè Yudààsà nè yònsò wa kùdìbo, ànu mwaba awu mene. Yèyè wàkàbàtùma, è kubàpèèsha bukolè bwà kulwisha nyumà yà bukooyà.

<sup>280</sup> Mpindyewu tàngilàayi! Swikaayi mukàbà. Kàdi pààkalwilà Yudààsà ànu mu èkèleeziyà amu mene, bu mulami wa cibùcilu cyà èkèleeziyà, ùkwàta mudimu nè mpaasàtà, kùdi. . . Yesù. Kàdi pààkalwà cikondo cyà Mpenta, wàkaleeja meekala èndè. Wàkaleeja ciwàye. Nènku nè—nè nsòmbelu mulenga mukùmbàne mu yèyè, wàkadishipa nè kudikùdika ku mucì wà sycomore, bwà kuuja cipròfetà aci. Nènku nyumà wa Yudààsà awu neàbandè buludì nè wìtabuuja Mukalenge Yesù Kìlistò. Bu mwàkambà Yesù nè: “Baadémons bàdi bìitabuuja nè bàzakala.” Yèyè neàbandè buludì nè neàlongeshe dijidiibwa, ànu nsòmbelu wètù wa cijila mukezùke ewu nè mwèndè mwònsò; kàdi pàkaadibi bìkafika ku dibàtiiza dyà Nyumà Mwímpè nè mapà à Nyumà, yèyè neàMuvilè! Yèyè neàleeje meekala èndè dìbà dyònsò. Ke nyumà awu wa- . . .

<sup>281</sup> Nè Yesù wàkamba nè: “Dìmukàayi!” Maatàayi 24, cyàkàbìdì. “Nyumà yìbìdì ayi neyìikalè mifwànàngàne menemene mu mùshindù wà mifwànyine kuseeswisha nè Basungula mene. . .” Ncyà bushùwà anyi? Mwaba wùdì citembelu aci cisanganyibwa. . . Mwanèètù, mbìmpè kwìtabuuja mu mùshindù wà cyena kale, bayiishi bàà Nyumà Mwímpè mu nyùngulukilu emu nè bàdìlongolola kumpalà kwà Nzambi. Ncyà bushùwà. Kwìkadi nè cimwènekèlu cyà difwànà dyà Nzambi to nè uvila Bukolè bwàdì to. Amen! Bantu bònsò bàdi bàdyùmvwakù bìmpè anyi? [Disangisha didi dyàmba nè: “Amen.”—Muf.]

Patwàfikà bònsò mu Dyulu,  
Ditùkù kaayi dyà dicyònkomoka diikalàci’s  
wè!

Patwàmònà bònsò Yesù,  
Netwìmbè misambu twela mbilà yà bucimunyi.

Patwàfikà bònsò mu Dyulu,  
Ditùkù kaayi dyà dicyònkomoka diikalàci’s  
wè!

Patwàmònà bònsò Yesù,

Netwĩmbè misambu twela mbilà yà bucimunyi.

282 Àlèluuyàh! Twìmanàayi kuulu ànu katanci. Mbanganyi bàdi baMunangè nè mwoyi wènu wònsò? Elà cyanza muulu, wamba nè: “Mukalenge àtumbè.” [Disangisha didi dyambulula paanyimà pàà Mwanèètù Branham—Muf.] “Mukalenge, mèmè ndi ngiitabuuja Èvànjeeliyò mu kaabujimà. Nkwàcishèku bwà mèmè kwikala musadidi Webè.” Àlèluuyàh! Àlèluuyàh! Nudi baMunangè anyi? [“Amen.”] Mu Bible bòbò . . .

283 Mukàji kampàndà kungambilayè òmòwè . . . nsongààlùmè kampàndà, ùdi mwà kwikala munkaci mwà kutèèleja dilòlò edi, mmusòmbèle ànu dìn sambù dyà mùsèèsù ewu. Kuseemenaye mwab’awu. Ke Mwanèètù wa bakàji Lula uvwa nè ciibidilu cyà kulwa mu èkèleeziyà emu awu, ùvwa wèla mbilà paanyimà apu. Mvwa nyiisha, Mwanèètù Neville. Ke nsongààlùmè awu kungambilayè . . . Mpindyewu, yèyè ùvwa mulongeshi wa kàlaasà kàà Dyàlumingu kuntweku ku èkèleeziyà wa ba-Baptistes wa Kumpàlà. Yèyè nè: “Billy, mvwa nsanka nè diyiisha dyèbè tò nè pàakabangà mukàji awu kwela mbilà nè kwela mikunda nè: ‘Twasàkidila, Yesù! Mukalenge àtumbè!’ Nènku ku musangu nè ku musangu” yèyè nè “muntu kampàndà ùvwa wamba,” (Mwanèètù Seward) “wèla lubilà lukolè nè: ‘Mukalenge àtumbè! Amen!’” Nènku mvwa nyiisha pa *Dijimija Makenji Èbè À Bwanààbutè*, Esawù wàkasùmbisha bukenji bwèndè bwà Bwanààbutè. Nènku mvwa ntùngunuka, nè bòbò bàvwa ànu munkaci mwà kwela mbilà, batùngùnùke. Ke yèyè nè: “Kaaaa,” yèyè nè: “aci—aci cìdi ànu cìmvwayisha mubidi.” Yèyè nè: “Ncyèna mwà kutwàla aci to!”

284 Mèmè nè: “Mwanèètù, bu wèwè ànu mwà kufikakù mu Dyulu s’udi mufwànyine kuuminyina mashika kwamba kufwà.” Mèmè nè: “Ncyà bushùwà nè kùdi mbilà mu Dyulu, muunya nè butùku.” Nènku aci ncyà bushùwà, mwanèètù. Kaa, èyowà’s, mukalenge!

Kaa, ndi muswè kuMumòna, kubandila mpàla  
Wendè,  
Mwaba awu bwà kwimba kashidi bwà ngàsà  
Wendè udi usùngila;  
Mu misèèsù yà Butùmbi mbandishe díyì  
dyànyì;  
Ntátù yònsò mimanè kupìta, ndekeelu ndi  
kumbèlu, bwà kucyònkomoka kashidi.

Kaa, ndi muswè kuMumòna, mbandila mpàla  
Wendè,  
Mwaba awu bwà kwimba kashidi bwà ngàsà  
Wendè udi usùngila;  
Mu misèèsù yà mu Butùmbi mbàdisha díyì  
dyànyì;

Ntàtù yònsò mimanè kupìta, ndekeelu ndi  
kumbèlu, bwà kucyònkómoka kashidi.

<sup>285</sup> Amen! Èyo, Mwanèètù Neville. Nzambì àkubènèshè. Juukilà  
wêwè ànu kuulu mwab'awu bwalu ncyèbè wêwè, wamònu's. 🙏

53-0729 Nkonko Nè Mandamuna Pa Genèsè  
Branham Tabernacle  
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)